

NIZOLIODI
DASCALVS,

Siue,

Monitor Ciceronianorum
Nizolianorum,

Dialogus Henrici Stephani.

Horatius lectori,

Ridebit Monitor non exauditus, vt ille
Qui malè parentem in rupes protrusit asellum,

*Auctoris Iam n-
ti, sed hoc per
curriculum est.*



Excudebat Henricus Stephanus,
Anno M. D. LXXVIII.

1001 1001
H A Z A R D

2002

1001 1001

1001 1001

1001 1001

1001 1001

1001 1001

1001 1001

1001 1001

1001 1001



HENR. STEPHANVS
HVBERTO LAN-
CVETO, VIRO CLARISS.

S. D.

NON DVBITO quin simulac li-
brum hunc conspexeris, vir clarif-
sime, recôrdaturus sis, me ante annos a-
liquot Viennæ Austriæ tecum deambu-
lantem, in eum sermonem venisse vt di-
cerem esse quosdam velut minorû gen-
tium Ciceronianos, qui suam Cicero-
nianitatē (vtar enim vel illis inuitis hoc
vocabulo, quum ipse Cicero Appietatē
& Lentulitatē dixerit) non ex ipsis fon-
tibus, sed ex riuulis duntaxat aut etiam
ex lacunis quas deriuata ex illis aqua ef-
ficat, (id est, nō ex ipsius Ciceronis libris
sed ex Nizolii & quorundam aliorum
obseruationibus) haurirēt. Nihil minus
tamen tum temporis quàm de scriben-
do Nizoliodidascalo, siue Monitore Ci-
ceronianorum Nizolianorum, cogita-
bam: sed quum mihi non ita pridem

A.ii.

quædam talium Ciceronianorum scripta risum mouissent, & mihi visus essem deprehendisse quid illorum Ciceronianitatem planè ridiculam redderet, faciendum putauì vt illos de eo quod deprehendissem monerem. Hoc enim officium, monstrandæ errantibus viæ, detrectare, non minus religio mihi erat, quàm illi religioni habent à viâ quâ Nizolius monstrat, vel latum vnguem discedere. Quam tamen illorum cautionem, non religionem, sed superstitionem, & quidem vanissimam, vocandam esse fatebuntur, vt spero, qui Dialogum hunc attentè legerint. Quid dico superstitionem vanissimam? meritò certè periculosissimam addiderim; quum quamplurima huius rei exempla Dialogus hic suppeditet.

Tantum abest autem vt veri Ciceroniani offendi hoc libro debeant, vt contra gratiam ab illis eum inire æquum sit, quòd ostendat quatum inter illos velut minorum gentium (vt antea dixi) Ciceronianos, & ipsos, qui maiorum gentium

Ciceroniani eadē appellari ratione possunt, sit discriminis.

Quod si potuissem illos ita monere ut nulla Nizolii mentio fieret, longè id gratissimum mihi fuisset: sed nihilo magis fieri hoc potuisset, quàm moneri quispiam de adhibenda in posterum aduersus aliquem morbum cautione, sine vlla eius rei quæ morbum illum ei peperisset mentione. Inducō igitur quendam Marcū, qui quānuis ita sit Nizolianus ut pro libro Nizolii tanquā pro aris & focis pugnare paratus sit, tandem tamen obmutescere cogitur, multis Nizolianæ. siue inscitix siue socordix manifestissimis exemplis obrutus. Quis enim aut inscitix aut socordix non accuset illum qui plerasq; voces pro synonymis affert quæ nihil minus sunt quàm synonymæ? plerasque tanquā cōtrarias proponit quæ quiduis potius quàm cōtrariæ sunt? illum, inquam, quem si sequamur, fatendum erit Ciceronem composita verba cum simplicibus, passiuā interdum significationē cum actiua, aut

vicissim, tam in nominibus quàm ver-
bis, confunderet: negare denique nō po-
terimus, Ciceronem, sine vllō delectu,
vel hoc, vel istud, vel illud vocabulum
seu loquendi genus vsurpare: nec vlla
iam erūt adiectiua quæ nonnullis tan-
tū substantiuis iuncta certā quandam
significationē apud eum habeant. Exē-
pli gratia, quoniā Insanas substructiones
Cicero dixit pro magnis, quiduis
quod magnum sit, Insanum vocare Ci-
ceronianis licebit, autore Nizolio. Ita
Insanus homo dicetur qui erit magnus,
Insana mulier, quæ erit magna: Insanus
equus, asinus, canis, id est magnus: Insa-
nus liber, Insana domus, Insana vrbs.
Quicquid denique ad magnitudinem
eam peruenerit ob quam dici magnum
in suo genere possit, illam Insani appel-
lationē effugere non poterit. Neq; ta-
men est cur ii qui magni sunt Nizolio
de appellatione illa succenseant: quoniā
eius acerbiteriam alius cuiusdam dulce-
dine compensat, quum eos qui magni
sunt, sicut Insanos, ita etiam Bonos ap-

pellari posse existimat. Hæc enim sunt
ipsissima eius verba, **M A G N U S**, Am-
plus, Grandis, Non mediocris, Non par-
uus, Vberior, Bonus, Latè patens, Imma-
nis, Infinitus, Vastus, Insanus, Longè la-
tèque patens. Nimirum quòd Bonam
partem pro magna legisset apud Cicer-
ronè. Nec minus (sæt scio) hæc mirabe-
ris synonyma, **A T T E N T E**, Silentio,
Attento animo, Benignè, Diligenter,
Clementer. Sed alia quæ multo maio-
rem tibi mouere admirationem vel po-
tius risum possint, in ipso Dialogo vi-
denda relinquam.

Examinatur autem in eo illa etiam
velut Appendix ad Observationes, in
qua pro barbaris vocabulis, aut Latinis
quidem (vt ipse ait) sed non Ciceronia-
nis, alia substituit. Examinatur, inquam,
in illa Appendice multa Nizoliana quæ
vel Heraclito risum cōcitarent. ex qui-
bus ænigmatica etiam nonnulla esse &
OEdipum quempiam requirere videri
queant. Quale est hoc, pro Græca voce
Pleonasmos dicendum esse Occultæ in-

fidia, Ciceronianè quidem certè loqui
volenti. Inquiritur etiã in id illius iudi
ciũ, quo quæcunque vocabula aut lo
quedi genera extãt in scriptis iis quæ Ci
ceronianis sunt inserta (ne exceptis qui
dè vel illis veterũ poetarũ versibus qui
multa obsoleta habent, vel ineptissimis
illis & à sermonis Latini puritate remo
tissimis declamationibus) nõ solũ ad
mittit, sed in eodẽ quo Ciceroniana gra
du collocat, parĩq; honore dignatur: at
quædã quibus Teretius, Sallustius, Cæ
sar, Virgilius, Horatius, vñ sunt, reuoc.
Quid igitur? estne inutilis tãtus Nizolii
labor? Illis quidẽ qui toti ab illiº iudicio
pendet (ex quibus sunt mei illi minorũ
gentiũ Ciceroniani) magis periculosum
quã vtilẽ esse, at illos qui de illius iudi
cio ferre iudiciũ possunt, quædam bona
multis malis permixta inuenire dico. E
rit tamen tuæ (quæ plurimis etiã princ
ipibus perspecta est) prudentiæ, rationis
meas, priusquã quicquã pronunties, po
derare. Quare rogo vt libeat quãprimũ
quicquid esse poterit in legendo hoc o
pusculo tædii deuorare. Vale.



NIZOLIODIDASCALOS,

SIVE


MONITOR CICE-

ronianorum,

Dialogus Henr. Stephani.

PERSONAE DIALOGI,

FABIVS, MARCVS, CAMILLVS.

 VÒ te, Marce, pedes? an (quònia
duct) ad Aulum? MAR. Ad
illum certé. FAB. Quem tu li-
brum (obsecro) ex eius biblio-
polio expetis? M. Nizolii Ob-
seruationes in Ciceronem. F. Quem ad v-
sum? M. Hui: quasi non sit vel pueris notis-
simus Nizolii Observationum vsus. F. No-
tissimū igitur est pueris, quod mihi, quan-
tis iam firmata uirum me fecerit ætas, est igno-
tissimum. M. Tu verò Camille idémne te
ignorare dicis? C. A. M. Quis esse Nizolii
vsus vulgò existimetur, scio: & condum pro-
mum Ciceronianæ Latinitatis haberi non
ignoro: sed an eū suis lectoribus vsum præ-
stet quæ expectant, id verò nihilo magis
noui quàm Fabius. F. At ego (nequid iam
B. i.

dissimulem) fat scio, ex eius lectione fructum illum non posse percipi quem expectant. M. Quid audio? F. Quod verum est. M. Quid? vllusne est liber, ei qui Ciceronianus cupit euadere, magis fructuosus (ne dicā necessarius) quàm Nizolius? F. Ipsum saltem Ciceronem excipere debueras. M. Excepissem, si aliud apud Nizolium quàm Ciceronem ipsum haberemus. F. Apage talem Ciceronem. M. Apage Ciceronem, inquis? F. Non equidem: sed talem Ciceronē. Illū enim ipsum quem ibi querendū putas Ciceronē magna afficis iniuria, dū Nizolii exstimationē vis tueri. M. Quid ita? F. Quia, si verum est quod dicis, vnum idēque esse Ciceronem & Nizolium, inepta esse apud Ciceronem multa, quod ad linguam Latinā attinet, dicendum erit: quoniā multa eiusmodi habet Nizolius. M. Bona verba, quāso. F. Ego à dissimulatione tam sum alienus quàm qui maximè: *Τὰ σῦκα σῦκα, πῶ σκάφω σκάφω λέγῃ*, vt comici Græci vtat prouerbio. M. Itāne apud Nizolium multa esse inepta ais? F. A. Aio. si tamen aliud vocabulum Latinitas suggereret, quo rem illam *κατ' εὐφημοσμόν* declarare possem, eo vterer: sed Latini vnum istud habēt quo eam rem significant: Græci autem ne vnum quidem, si Ciceroni ipsi credimus. M. A. R. At vide

Fabi, ne ipse potius ineptus (quod pace tua dixerim) deprehendaris, dum inepta nōnulla in Nizolio deprehēdere tibi videris. F A. Imò vide Marce (qui Nizolium, aliquem virum principem fingere videris, cuius ego maiestatem læserim) ne, si bilem mihi mouere pergas, aliquid multo grauius de tuo Nizolio, vel potius, pro vno verbo multa eaque longè asperiora audias. M A R. Non dubito quin tibi facile futurum sit multa illi obiicere: verum nobis vicissim ea diluere, non difficile futurum spero. C A M. Ne dicas Nobis, sed tantum Mihi. ego enim tibi meam hanc ad rem operā non polliceor: præsertim quum ipse quoque cum alia tum verò iudicium in Nizolio desiderem. M A R. Atqui ne Hercules quidem contra duos. F A. At si vnus ego Nizolium accusassem, tum verò dixisses, Vnus vir, nullus vir. M. Fortasse. Sed quænam ambo illi obiiciatis scire cupio, etiamsi me illis refellendis parem minimè futurum sperem. Tu Fabi eris *καταγρηγορίης*: tuū Camille erit *δευτεργρηγορίης*. C A M. Imò verò Fabio non solū *καταγρηγορίης*, sed etiā *δευτεργρηγορίης* & *τριταγρηγορίης* partes relinquo. F. Nimiū graue onus mihi imponis: idcōque non totum suscipiam, ne illi succumbam. Nōne versuum Propertianorum recordaris?

Turpe est quod nequeas capiti committere pōdus,

Et pressum inflexo mox dare terga genu.

C A M. Verūm haud minus turpe fuerit talē *δευτερογενῆς* tali *δευτερογενῆς* succedere.

M A R. Fatetur interim vterque vestrūm, accusationē Nizolii, rem esse difficilem. C A.

Simulamur potius quā́m fatemur. F A.

Nēpe tu rem alioqui facilem, valde difficilem reddis, magnā́que nobis solitudinem iniicis, dum te pro Nizolii obseruationibus non aliter quā́m pro aris & focis, pugnare paratum esse ostendis. Videris enim non fore nobis nisi multis rationum quasi machinis expugnabilis. C A M.

At ipse futurū spero vt oppugnatione tantū́m opus sit, nec ad expugnationem venire oporteat. F A B.

Quid ita? C. Quoniā́ vel prima quā́ admo- ueris machina perterritus Marcus, de faciēda deditiōe cogitabit. M. Adeon' mihi parum esse Martium pectus existimas?

F A B. Tibi nomen esse Marco, in mentem mihi non veniebat. C A.

Quid? an Marcis Martium magis quā́m aliis est pectus? F A B.

Inauditū́ mihi quoq; est illud: sed tamē talis quā́dam fiducia huic nostro Marco inesse videtur.

M. Μάρκιον ὁ σῆτος, πῶς πικρὴ δόκιμος ἔη. C. Vel hoc certē versu magnā́ prę se fert fiduciam.

F A. Sed aliud est fiduciam prę se ferre, aliud,

duciam habere. M A R. Cur non, iocos mis-
os faciens, ad illam accusationem venis,
uam ego arduam vtrique vestrū futurā
dixi, & iterum dico? F A B. Iam ad illam
cingimur: sed nobis (quandoquidem rem
arduum aggredi nos existimas) hoc præfa-
per te liceat,

Ardua molimur: sed nulla nisi ardua uirtus.

M A R. Etiam Musarum auxilium, poetarū
more, implorare si libet, tibi concedo: sed
liutius tergiversari per me tibi non licet.

F A B. Itāne hæc quæ à nobis breuiter
πεπαγκται, tergiversationem appellas?

Quasi verò mihi in promptu & velut in nu-
merato non sint illæ rationes, quibus addu-
ctus, ita de Nizolii in Ciceronem Obserua-
tionibus paulo antè loquutus sum: aut in-
ad hanc rem Musarum opem implorare o-
porreat: ut tu, irridens potius quàm iocās,
dixisti.

M A R. Cedo igitur illas rationes.

F A B. Haud ullus creditor ullū debitore ma-
gis vrgeret. At ego antequam illas rationes
proferam, in ipsū operis Nizoliani titu-
lum volo inquirere. C A M. Rem mihi longè
gratissimā facies. sepe enim miratus sum cū
suū illud opus Observationes in M. T. Ci-
ceronem appellasse. M. Iam animaduerto
vestrā quandā in Nizoliū maleuolentiā: quæ
facit ut quālibet eius reprehēdēdi occasio-

nem captetis. F A. Bona verba quæso : ut ipse paulo antè mihi dixisti. vnde enim maleuoli sumus Nizolio , qui vel ante nos natos vita excessit , vel certè antequam nos illum natum esse scire possemus ? Amicos potius illi nos esse par est , futuros alioquin omnino ingratos : quum iis saltem quibus vñ sumus præceptoribus labor illius multè utilitatis attulerit , cuius pars aliqua in nos redundarit . M A R. Egregiam verò narras amicitiam , egregium amicorum officium , amicum accusare. C A M. Memento Marce , dicti illius , Amicus Plato , sed amica magis veritas. M A R. Imò , quòd ipsum titulum calūniamini , id certè cæteram accusationem vestram mihi suspectam reddit , atque vñ parum veritatís illi credam subesse , facit. C A M. Præclarè tecum nunc agitur , quòd cum tui similibus , id est iracundis , hominibus tibi res non sit. nihil enim aliud quàm iracundia illud verbum tibi extorsit. M A R. Quid refert , iracundiàne an alio modo extorta mihi sit veritas ? Nisi fortè mihi quòque amicam esse illam non existimatis. C A. Quid ? si amica esset , an extorqueri tibi vñ neres ? F A. Vereor , Camille , ne hominis irā augeas , si cogere illū velis ad hæc respondere. Potius igitur placidè ostēdamus nos non absque ratione ipsum quoque libri titulum ,

ipsam inscriptionem (vt Ciceronianè &
 rtasse magis etiam Latinè loquamur) re-
 ehendere: ideóque calumniatores hac in-
 non esse. C. Tuum cõsilium probó: atq;
 oc addo, vbi de illis verbis, *Observatio-*
es in Ciceronem, disseruerimus, aptè ve-
 e corollarium, adiunctum iri obseruati-
 idem Ciceronis mentionem. F A. Non in-
 lligo quid velis. C A M. Dico mentionem
 ptè factum iri eius quoque quod idem
 izolius scribit in ea quam operi suo præ-
 xit epistola ad Ioannem Fránciscum Gam-
 aram, sc Ciceronem obseruasse. Eius enim
 ac verba sunt, *Quamquam Ciceró ipse per se*
a defensus est ut nullis cuiusquam maledictis ta-
uiri autoritas diminui possit. In quo ego ob-
seruando si et tibi et cæteris qui tantopere genus
hoc lucubrationis cupere uidebantur, satisfecit
audeo, uehementérque lætor. F A B. Meminero,
 nunc autem de inscriptione illa dicendum
 est. C A. Attentam nunc Marce aurem præ-
 be Fabio. M A R. Lubenter præbebo. F A B.
 Ita igitur censeo, Marce, non satis aptè Ni-
 zolium librum suum appellasse *Observatio-*
es in Ciceronem: quoniam quælibet Ci-
 ceronis vocabula, etiam maximè vulgaria,
 quasvis eorum significationes, etiam maxi-
 mè vulgares, ex quibuslibet locis in illum
 collegit: neque vllum in vlla triũ harum

rerū delectū adhibuit. Adeo ut ibi etiā vbi
affert nobis ex Cicerone vulgaria & passim
obuia vocabula: cuiusmodi sunt, Magnus
vel Parvus, Calidus vel Frigidus, Bonus vel
Malus, Pater vel Mater, Ego vel Tu, Facio
vel Dico: hæc quoque, & alia huiusmodi, Ni-
zoli Observationibus accepta ferre oporteat,
si illo eius libro utamur, & illam eius
inscriptionem sequamur. M A R. Quid igitur
requireres in Nizolio, ut librum suum
Observationes in Ciceronē appellare posset?
F A B. Ut adhibito delectu quædam magis
insignia Ciceronis vocabula, vel loquendi
genera, aut ratiōra, aut obscuriora,
(nisi potius hæc tria simul) annotaret atque
explicaret. M A R. Vellem certē alia esset
vix voce Nizolius, ut tibi aliisq; adeo morosis
satisfaceret: sed si error huic appellationi
subesse dici potest, at certē in re leui & leuiter
dici debet errasse. F A B. Quid quod
Ciceronem se obseruasse dicit? M A R. Sic-
cine loquutus est noster Nizolius? F. Quasi
verò non audieris Camillum locum quædam
ex eius præfatione recitantem, in quo
se obseruasse Ciceronem ait. M A R. Non
quidem audiui: quoniam tunc animum ad
ea quæ à vobis dicebantur non attendebam.
Sed hæc verba, Obseruasse Ciceronē, quidnam
illi significāt? F A B. Nihil aliud quam

Observationes in Ciceronem scripsisse.
 C A M. Mirum sanè est Nizolium, qui se Ob-
 servationum scriptorem profiteretur, ne i-
 psum quidè verbi Observare vsù observasse.
 F A B. Non tam mirum certè est quàm pu-
 dendum, illum ne hoc quidem observasse,
 se non bene vti verbo Observare. M A R. Sa-
 tis erat Mirum dixisse, cur Pudendum etiã
 addis? F. Imò nō satis erat: sed Camillus al-
 terum addere non audebat. Tu verò an e-
 tiam hīc Nizolio vis patrocinari? M A R.
 Non equidem: sed eum velim à te minus
 asperis verbis accipi. non dubito enim quin
 cætera omnia in illa eius præfatione bel-
 lè se habeāt. F. Imò verò pauca ibi satis bel-
 lè se habent: quædam alium quemuis po-
 tius stylum quàm Ciceronianum sapiunt.
 C A. Ipse verò aliquod etiam vocabulum in
 ea legisse me recordor, quòd tantum abest
 vt Ciceronianum, vt vix Latinum esse cre-
 dam. M A R. Qui antea urbis oppugnatio-
 nem moliebamini, nūc ipsorum suburbio-
 rum oppugnatione contenti estis. C A M.
 Quid sibi vult, Fabi, hæc allègoria? F A. In-
 telligit Marcus, nos, qui antea ipsum Ni-
 zolij opus accusabamus, totam accusatio-
 nem in præfationem operi præfixam con-
 uertere. C A. Illam igitur præfationem mis-
 sam faciamus; & ad opus ipsum venientes,

amplissimam nobis accusationis materiam suppeditare ostēdamus. F A. Rectè mones. sed vereor vt oratio nostra audientiam sibi apud talem iudicem possit facere. M A R. Hac de re minimè solliciti esse debetis: iam aures incipio arrigere. F. Audiēt tamē quod nolent. M A R. Imò si nihil aliud quàm quod verum sit audiant, nihil audient quod nolint. Sed memineris te dixisse, illud opus Nizolij multa inepta habere. F. Non adeo sum obliuiofus, vt hoc mihi à te in memoriam reuocari necesse fuerit. Quid si verò non inepta solùm sed ineptissima etiā quædam proferam? M A R. Quæ tuo & Camilli iudicio inepta aut ineptissima etiam erunt, non protinus meo & aliorum talia futura sunt. F A B. Quòdnam igitur, Marce, tuum erit iudicium de Ciceronianis vocabulís quæ à tuo Nizolio malè exponuntur? de iis quæ tanquam synonyma, aut contrà tanquam opposita ab eo afferūtur: quum neque illa, synonyma, neq; hæc, opposita esse dici possint? Quænam tua futura est sententia de plerisque Ciceronis locis ab eo permixtis, in quibus quanuis sint vnius eiusdémque verbi aut generis loquendi exempla, quanuis etiā eēdem propemodū voces, non eundem tamen sed valde diuersum vsum habēt? C A M. Omittis duo multo illis quæ cōme-

morasti ineptiora. F A. Quænam sunt illa? nunc enim fortasse in mentem mihi non venient. C A. Vnum est, quod multa vocabula pro Ciceronianis affert, quæ quavis in quopiam ex libris Ciceronis reperiuntur, sunt tamen non eius, sed alicuius ex poetis qui multis annis illud eius seculum præcesserant, aut certè alicuius eorum qui quavis non eodem seculo tantum sed eodem tempore eodemque in loco vixerint, non eodem tamè stylo (valde etiam diverso nonnulli) utuntur. Alterum, quod nonnulla, & ea quidem non pauca, tanquam Ciceroniana, ceteris intermiscet, in quibus non Ciceronianam Latinitatem, sed dormitantis librarij errorem agnoscunt qui non omnino sunt insagaces: quedam denique pro Ciceronianis à nobis vult haberi quæ vix Apuleio, aut Macrobio, aut Solino digna videri possint. F A. De his non tacere quidem, sed mentionem seorsum facere statueram: & quidem de horum nonnullis eum non accusare solum sed simul etiam excusare. C A. Quid tu ad hæc Marce? (de iis autè præsertim loquor quorum Fabius mentionem fecit) an ne hæc quidem digna censes quæ inepta vocentur? Itane repente obmutescis? M A R. Quomodo ad hæc non obmutescerem? præsertim quum vobis ta-

lia de Nizolio dicentibus neque fidem habere possem, neque derogare audeam? CA. Imò verò te non nobis sed tibi ipsi fidem habere, tuis ipsius oculis credere volumus. FA. Nónne hoc saltem à te impetrabimus vt tuis ipsius oculis credas? MAR. De quibus verò vultis me illis fidem habere? FA. De iis quæ legenda proponemus. M. Habenda erit certè. nihil enim (vt opinor) valere hîc possunt præstigiæ. FA. Quòd si etià valere aliquid possent, cum præstigiatoribus rem tibi non esse satis nosti. M. Ecquis talia extare in Nizolij opere, persuadere vnquã mihi posset? veruntamen vbi oculis meis ea vsurpauero (vt Lucretianis verbis vtar) illud mihi persuadeã, aut certè illos allucinari suspicer necesse erit. FA. Eamus igitur in rem præsentem. id est, illud ipsum opus de quo agitur visamus. M. Non procul ab illo Auli bibliopolio absumus. CA. Non tamen autor fuerò vt illic visamus, quum & multi fortasse superuenturi sint qui sermonem nostrum interpellent, & ipsi bibliopolæ rem minimè grãtã finis facturi, vbi nos non ad emendum Nizolianas Obseruationes, sed ad inquirendum in illas venisse animaduерterit. MAR. Quid igitur faciendum censes? CA. Eundem in bibliothecam meam, quæ opus illud habet,

& quidem ex editione Italica, anno M. D. x x x v. publicata. MAR. Quâvis lōgiusculum sit iter, non recuso tamen illuc proficisci: tanto videndi locos illos teneor desiderio. FA. Mirum certè est te locos illos videndi desiderio teneri, quum in illis nihil aliud quàm ineptias visurum te, iam toties prædixerimus. MAR. Atqui non eos videre cupio quòd ineptias in illis libenter visurus sim, sed vt sciam vtrum mihi posthac credendum sit, Nizoliúmne ineptè quædam in illo suo opere scripsisse, an vos ineptire dum illum ineptiarum accusatis. CA. Nónne hoc posterius malles, si tibi optio daretur? M. Mallem profectò: vt iam liberè loquar. CA. Quí fit vt tantopere de Nizolij existimatione labores? MAR. Quoniam de mea quodammodo agi puto. recordor enim illorum Horatij versuum,

Qualem commendes, etiam atque etiam aspice: ne mox

Incutiant aliena tibi peccata pudorem.

CA. Tu igitur Nizolium nonnullis commendasti. MAR. Plurimis certè plurimum commendavi. FA. Hinc illæ lacrymæ: vereris ne palinodiam canere cogaris, & ita Nizolij ignominia in te redundet. MAR. Ah, nimium aspero verbo vteris. etiamsi enim veræ comperirentur omnes illæ tuæ re-

prehensiones, non tamen ignominiam illi
 afferre possent, sed tantum de existimatio-
 ne eius aliquid detraherent. F A. Multum
 profectò detraherent: hoc saltem fatearis
 necesse est. Sed cur Detraherent dico? imò
 verò detrahunt. verè sunt enim, siue à te
 comperiantur tales, siue non. C A. Quum
 iam propè à meis ædibus absimus, ubi in
 rem præsentem (vt dictum est) veniemus,
 hanc controuersiam in tempus illud diffe-
 rendam, & de vtilissimo illorum Horatij
 versuum cōsilio differendum censeo. M A R.
 Quid? an succurrit quidpiam in illis pro-
 pter quod locum habere hîc nō potuerint?
 C A. Vnde ista tibi repentè suboritur suspi-
 cio? M A R. Ex eo quòd vtrunque vestrū,
 ἐγκληματὶκὸν siue φιλεγκλήμονα esse nouerim.
 C A. Vereor ne istud conuitium audierit
 Fabius. actum est autem de te si hoc aures
 illius pepulerit: vel (vt Plautinis verbis utar)
 si eius aures sonum hūc vsurpauerint. M A R.
 Quamobrem? C A. Quoniam crabrones ir-
 ritasti. M A R. Danda mihi est venia: quòd
 me apud homines, non apud crabrones,
 verba facere existimarem. F A. Quidnam
 mouit Marcum, Camille, vt nostrū vtrū-
 que ἐγκληματὶκὸν & φιλεγκλήμονα (hec enim in-
 audij) vocaret? C. Narrabo rem omnem.
 Dum tu illum tuū veterem amicū, factura

tibi obuiam, alloquereris; illam de Nizolij
 locis quos reprehendimus controuersiam
 bibliothecæ meæ referuandam esse dixi, quæ
 nobis ipsum Nizolij opus exhibitura esset:
 interim verò de vtilissimo illorum Horatii
 versuum consilio disserendum mihi videri.
 Hic ille, An succurrit quidpiam (inquit) in
 illis versibus propter quod locum habere
 hic non potuerint? Quum autem rogassem
 vnde hæc repentinè suborta illi esset suspicio,
 Ex eo (respondit) quòd vtrunque vestrum,
 ἐγκληματικὸν siue φιλεγκλήμονα esse nouerim.
 F A B. Quid? tu Marce, qui tam enixè as-
 pèra (vt ipse vocas) in Nizolium verba de-
 precaris, in nos non aspera tantùm sed atro-
 cia etiam iacere audes? Nisi fortè quis pro-
 prius sit illarum vocum Græcarum vsus aut
 non meministi, aut non satis nunc quidem
 expendisti. C A. Veniam Marco de verbis
 illis Græcis dandam censeo: quippe quem
 illa inconsideratè protulisse existimen,
 quum alioqui φιλεπμητιω' esse vtrunque in-
 telligeret. F A. Quid? an hoc verbum in te
 iactatum velles agnoscere? C A. Ne hoc
 quidem certè: sed minus asperum tamen il-
 lis esse fatendum est. F A. Quid verò erat de
 quo eum volebas reprehendere quod ad
 versus illos attinet? C A. Minimè profectò
 de vlla eius reprehensione cogitabam, sed

de illis versibus aliquid dicere volebam, quod mihi interim memoria excidit. F. A. At ego amplam eius reprehendendi occasionem nactus esse mihi videor: quam nequaquam prætermittendam censeo, ut non immerito *φιλεπιδριμής* ab eo appellatus dicar: quum alioqui nihil tale facturum essem. C. A. Qua de re eum reprehendendis? F. A. De non satis apto illorum Horatii versuum usu. C. A. Satius fuisset tacuisse Marce, quam verbis illis Fabium aduersus te cõcitasse. M. A. R. Mirum ni & aduersus ipsum Horatium sit cõcitatus. C. A. Cur his Fabium verbis magis exasperas? M. Quoniam eius iram non magis metuo quam culicem elephas Indicus formidat. Nihil autem nunc aliud quam aliquam sophismaticam decipulam super isto Horatii loco aduersum me scio meditari. F. Imò iam meditatum à me & cogitatum est non sophisma quodpiam super eo, sed aliquid quod *ἀπλοῦ τῆς ἀληθείας μῦθον* ipse vocaret Euprides. Dico enim te in proferendo illo Horatii loco alium dedisse usum verbo Commendare, quam ipse Horatius dederit: perinde videlicet ac si Laudare ibi significaret: quum tamen ibi sit quod Græci dicunt *ἐπαινεῖν*. M. A. R. Ideo scilicet ita intellexit Horatius, quia tibi ita libet exponere. F. Imò verò ipsemet ita exponit Horatius: quum

subiungit.

subiungit,

Fallimur, & quondam non dignum tradimus.
 C. A. Nimis obscura est Marco fortassis ista expositio, quod non satis intelligat quidnam hic verbum Tradere valeat. F. A. Quid ais? Ciceroniano Marco not⁹ nō erit hic Ciceronianus verbi Tradere vsus? M. Quasi verò ego Ciceroniani nomen mihi aut tribuam aut affectem. C. A. Quinetiam ē Ciceronianis quempiam posset vsus ille verbi istius latere. F. A. Imò certè mirum nō fuerit illum omnes eos Ciceronianos latere quorum præceptor est Nizolius, quum hunc ipsū latuerit. Videri autem Latinos in hac verbi Tradere significatione eam Græci *ἀλλοτρίως* imitari, à qua dicitur *ἀλλοτρίως* ὁμιλοῦν, didici ex iis quæ nuper Henricus Stephanus scripsit in Cicero- nis epistolas ad familiares. C. A. Sed nonne Fabi, Tradere plus est quàm Commendare? F. A. Plus certè: ideoque ubi utroque simul vtuntur, illud postponunt. C. A. Mihi autē videor legisse apud Horatium Laudare & tradere. F. A. Minime falleris: extat enim apud illum hic versus,

scilicet ut tibi se Laudare & tradere coner.

C. A. Quid? nonne hic versus pro Marco facit? F. A. Nequaquam. quanuis enim Lau- dare & tradere dicat Horatius, quod Cō-

mendare & tradere numeri versus dicere non permittant, non tamen in illo altero versu de quo mota est inter nos contro- uersia, Commendes exponere possumus Laudes: nisi & in aliis omnibus aliorum scriptorum locis dicamus, Commendare, quod pro Græco *συμμενῶμαι* positum sit, pos- se itidem generali verbo Laudare exponi: & quæ Commēdatitiæ vocantur epistolæ, posse Laudatorias etiam appellari. C A. Quomodo autem Horatio pro Commē- dare & tradere, licuit dicere Laudare & tra- dere? F A. Respexit (opinor) Horatius ad id unde orta est significatio illa verbi Com- mendare, à qua Cōmendatitiæ literæ di- cuntur. Neque enim dubito quin ex eo sit, quòd eum quem alicui commendamus & tradimus, quem velut fidei alicuius com- mittimus, laudare soleamus. C A. Qui ergo alicui quempiam commendat & tradit, is eum laudat: (sequendo vulgarem commē- dationis modum) quum vicissim dici non possit, quicumque laudat, etiam commen- dare & tradere. F A. Rectè. C A. Cupiebam Marce tibi patrôcinari: verum

Causa patrocini non bona maior erit,
vt Nasonis vtar verbis. M A R. At ipse ali- quid afferrem quo meam tueri causam possem fortasse: nisi quum iam ad tuas e-des

peruenerimus, ubi te Nizolium nobis exhibiturum promissisti, in cœpta de illius opere disputatione horas istas collocare malletm. F. A. Atqui cessabit omnis illa de Nizolio siue disputatio siue altercatio, simulatque ipse comparuerit. M. Cessabit illa: quia Nizolius silentium tibi imponet. F. Imò tibi. C. En vobis tandem boni illius viri Observationes. F. Vnde vis initium euoluendi illas sumamus, Marce? M. A. R. Ab illo verbo Tradere: vt videam an verè à te dictum sit (ignoscas velim mihi, si te suspectum habeo) nullam eum mentionem facere eius vsus verbi illius Tradere, quem tu Horatio cum Cicerone communem esse dixisti. F. A. Lubentissimè initium inde sumam, vt me hac primùm suspitione apud te liberem. Verum ne meæ quidem recitationi habiturum te fidem existimo: idcirco vt oculos ipse quoque admoveas rogo. At Camillo eius verba recitabo. T. R. A. D. O, *dis*, Do, Dedo, Doce. M. A. R. Videamus iam singula exempla. nō dubito enim quin illius etiam significationis exemplum aliquod simus inuenturi. F. A. Exemplum fortasse aliquod illius inueniemus, sed temere cæteris, id est, cæterarum significationum exemplis, interiectum: non autem ab illis distinctum, vel peculiari aliqua expositione.

ne notatum. MAR. Ecce vnum saltem exemplum, sic te *Cæsari commendavi & tradidi* grauiſſimè diligentiffimeque potui. FA. Nōne id videmus quod nos viſuros ſuſpicabimur? MAR. Quidnam. FA. Temere aliis exemplis permiffum hoc eſſe, nullāque expoſitione notatum. MAR. Expoſitione opus non erat, quòd verbo *Commendavi* præcedente exponatur ſequens *Tradidi*. Adde quòd non is eſt Nizolii mos, vt quos in exemplum affert locos exponat; ſed omnes ſuas expoſitiones ſolet ipſi vocabulo ſubiungere, antequam ad exempla veniat. FA. At debuerat ſaltem hunc locum à cæteris ſecernere: contrà verò illum video in hoc etiam peccare quòd duos locos, qui ſignificationis illius duo ſunt exempla, longiſſimo interuallo ſeparet. Nam cum loco illo quem ex fine recitaſti, conuenit iſte qui ordine eſt tertius, *Totum denique hominem tibi trado, de manu (ut aiunt) in manum, &c.* Quod autē dicis, Nizolium ſolere ſignificationes omnes ipſi vocabulo ſubiungere, antequam ad exempla veniat, videamus an id verum comperturi ſimus vel in illo altero verbo de quo ſermonē habuimus: in illo, inquam, verbo *Commendare*. Libetne? M. Libet. FA. COMMENDO. Probo, Fidei alicuius cōmitto, In tua fide ac religione depono, Concedo,

in uestra fide atque humanitate totam causam re-
pono, Ciuitas in Catonis fide locata, Qui natio-
nes deuictas bello in fidem accepissent, Omnia in
idem et quodammodo patrocinium mei consula-
us sunt collata, in fidem meam accipio. C. A. Itá-
ne hæc omnia illi verbo Commendo, tan-
quam eius expositiones, subiunguntur? F. A.
Si mihi recitanti ne tu quidem fidem vis ha-
bere, idem facito quod Marcus, ut tuus ti-
bi sis ἀπαρχῆς. C. A. Egón' tibi fidem dero-
gem? haud sanè tuam fidem in dubium vo-
cantis, sed Nizolij mentem mirantis erant
illa mea verba. M. A. R. Interim verò admira-
tione dignum tibi Nizolium videri fateris.
C. A. Imò longè aliud intelligo, mirari me
quid homini in mētem venerit, ut talia scri-
benda putauerit. F. A. Perlegendus est tamē
à me hic locus, ut cætera quoque audias:
tum demum de Nizolij mente differemus.
Addit igitur, In tutela alicuius sum, Alicuius
uirtuti, fidei, felicitati sum commendatus. Primū
autem vsus verbi illius Commendo exēplum
affert hoc; Quum eum præter simulatam tri-
stitiam nulla res commendaret. Cui subiun-
git istud, Neque enim omnium iudicio malim me
à te commendari quàm ipse tuo iudicio dignè ac
mereor esse commendatus. Addit alia multa,
nullum in illis certum ordinem tenens, sed
more suo ea permiscens atque confundēs.
 C. iij.

Alioqui primum illud exemplum proximè sequi debuerat istud, *Lenis oratio commendat reos.* Hoc autem subsequi istud, *vox, quæ una maxime eloquentiam commendat.* Contrà verò tria hæc tribus interuallis longulis separata esse videmus, & interiecta esse alia quæ non ad hanc sed ad aliam significationem pertinent. C A. Sed non consideras fortasse, Fabi, quod peius etiã est, inter expositiones tã varias (si vocari expositiones possunt pleraq; ex illis verbis voci Cômêdo subiunctis) nullam esse quæ vllò modo quadrare queat primo exemplo, cæt erisque duobus quæ subsequi debuissent dixisti. Neque enim in locis illis Commendo, est Probo, vel Fidei alicuius committo, vel In tua fide & religione depono, vel Concredo: multo etiã minus quicquam ex iis quæ sequuntur. F A. Ignorâsne, an oblitus es, hunc esse Nizolij morem vt significationes plerasque, & quidem interdum præcipuas, omittat? & earum tamen nōnunquam exempla cæterarum exemplis permisceat? C A. Iampridem certè illius opus non euolui: hinc fit vt oblitus sim. Sed hic verbi Cômendare vsus, de quo tacet, est omnium elegantissimus. F A. Est certè: sed simul omnium difficillimus explicatu. C A. Vno quidem verbo vix explicari posse arbitror. F A. Vix ac ne vix qui-

dem inueniemus vnum quo vim eius satis exprimamus. MAR. Eo magis ignoscendū esse dicam Nizolio, quo vos magis in ea quam prætermisit explicatione laborare videbo. FA. Atqui non difficile nobis est illud verbum exponere, sed in eo tātū hæremus, quomodo vnum vno, non pluribus, exponamus. CA. Quid verò periphrasi nos uti vetat? FA. Nihil certé. atque adeo utendum est. Dico igitur, in locis illis verbum Commendare nihil significare ex iis quæ à Nizolio ibi coaceruantur, sed rem aliquam dici quæpiam commendare, quum nostrū fauorem ei conciliat: vel, quum facit ut placeat, ut gratus sit nobis & acceptus: aut etiam ut sit in pretio, vel maiore in pretio. Atq; ut res aliqua cōmēdare quæpiā, à Tullio, & aliis, ita vicissim quispiā re aliqua se commendare dicitur ab Horatio, ex qua fauorem siue laudem, vel vtrunque simul captat. veluti quum epistola decima octaua libri prioris scribit,

*Est huic diuersum vitio vitium propè maius,
Asperitas agrestis, et incondita, grauisque:
Quæ se commendat tonsa cute, detibus atris,
Dum vult libertas mera dici, verâque uirtus.*

Suo autem (ut ita dicam) modo loquens idem poeta dixit,

Quod me Lucanæ iuuenem commendet amica.

CA. Cur hinc more suo loquutum esse Horatium dicis? Hoc si ita est, latet me vera huius versus explicatio. FA. Quomodo eum explicas? CA? Quod me, qui iuuenis sum, commendet amicae Lucanae. FA. Apage absurdam hanc expositionem, & aperte falsam. quis enim nescit Horatium iam tum vetulum fuisse? CA. Ignosce mihi: nesciebam illum de seipso loqui. Sed quid est igitur accusatiuo illo *iuuenem* faciendum? F. Sui, inquam, modo, siue suo more usus est illo Horatius. CA. Sed quis tandem ille est? FA. Illum inde discas volo unde & ipse didici. CA. Unde? FA. Ex Henrici Stephani Observationibus in Horatium, quas appellauit Diatribas. Cedo eius editionem. scio enim tuam bibliothecam ea non carere. CA. Iam iam a me afferetur. MAR. Proditne iam pridem illa editio? F. Haud satis recorder quam pridem. C. En tibi librum quem petis. FA. En tibi vicissim explicationem quam audire expetis. Nam de aliis huiusmodi Horatij locis facta mentione, tandem haec addit, Sic & quum de se dicit Horatius, Epist. 15. lib. 2, *Quod me Lucanae iuuenem commendet amicae*, valde fallitur qui Horatium sibi iuuenilem aetatem tribuere existimabit, quum ea iam praeteriisset. Intelligit igitur, *Quod mihi iuuentutis commenda-*

tionem apud illam tribuat, Quod me, non minus quàm iuuenem, vel, perinde ac iuuenem, commendatum illi reddat, Quod faciat vt æquè sim illi acceptus ac si iuuenis adhuc essem. Atque his subiungit ista, Quod autem hîc de iuvene, idem vicissim de vetula intelligendum est, Ode 13, lib. 4, (sic tamen vt aliter quàm illic resoluator oratio) *Seruatura diu parem Cornicis vetulæ temporibus Lycen*. Neque enim dicit Lycen esse vetulam, atq; adeo tam vetulâ vt sit par temporibus cornicis vetulæ: (id est, vt vocari ipsa quoque possit τεκνοῦρων ος) sed significare vult, eam futuram parem, siue effectûri parē. Intellige igitur, *Seruatura diu Lycen, & effectura parē*. Vel, *Seruatura donec effecta sit par*. Hactenus ille de duobus istis locis. Affert verò & alios: atque in his vnum, vbi non animaduersa ista Horatiani sermonis consuetudo in magnum vel potius maximum errorem lectores impulit. C A. Charior mihi erit quàm antea hæc editio. F A. Ad Nizolium autem vt reuertamur, nōne vides Marce, & fatearis, illum insignem illam verbi Commendo significationem prætermisisse? M A R. Et videam & fatear necesse est. F A. Illa autem expositionum rudi indigestâque mole (quæ dicenda chaos) illa, inquam, mole exposi-

tionū quę verbo illi Cōmēdo subiūguntur
 à Nizolio, quid faciem ē c. Animaduerto,
 tuis illis verbis perterrefactū esse Marcū. a-
 liis min' dithyrābicus vtendū tibi est. f. Imō
 ad ipsamet Nizolij verba iā venio: & Marcū
 rogo quā potuerit Nizoli' verbū cōmēdo
 exponere, *In tutela alicuius sum: itē, Alicui' ut-
 tuti, fidei, felicitati sum commendatus.* c A. Aliā
 quā actiui verbi naturā habere existima-
 uit: vt pro Marco respondeam. f A. Atque
 actiuis verbis in eo exponendo vsus antē
 fuerat. c A. Inteligo, illum arbitratum es-
 se, verbum Commendo, prāter illam actiui
 verbi naturam, aliam quoque habere. m A. R.
 Te pro me respondere dicis Camille: sed ir-
 ridentis potius quā respondentis personā
 suscipis. Vtinam verò Ciceronianus quidā,
 mihi perfamiliaris, hīc adesset: is (vt opinor)
 omnium harū expositionum ita rationem
 vobis redderet, vt nulla irridēdi occasio su-
 peresset. f A. Nempe mysteria quādam sub
 verbis Nizolij latere putas: mysticas esse e-
 ius expositiones credis: ideo ad Ciceronia-
 nos, tanquam mystas, confugiendum cen-
 ses. At ipse, quanuis minimē Ciceronianus,
 qualia sint hęc expositionum mysteria, (si
 tam honorifica est vtendum appellatione)
 non minus quā quisquam Ciceronianus,
 videor perspicere. Sunt enim expositiones

istæ ex variis Ciceronis locis congestæ, & quidem eiusmodi vt in iis expositionū materiā potius quàm expositiones habeamus. c. Apertius istud declares velim. F A. Exēpli gratia, verba ista, *Ciuitas in Catonis fide locata*, sunt verba Ciceroniani cuiusdam loci quæ expositionis verbi Commendo materiam suppeditant: quum ex illis possit excerpī isto expositio, *In alicuius fide loco*. Idem verò de istis dicēdum verbis, *Omnia in fidem & quodammodo patrociniū mei consulatus sunt collata*. Hinc enim poterat itidem excerpī ista verbi Cōmēdo expositio, *In fidem & quodammodo patrociniū alicuius conféro*. Quidam verò sunt loci vbi non adeo magna mutatione opus fuisset. ex quibus est hic, *In uestra fide atque humanitate totam causam repono*. Duntaxat enim pro *uestra* dicendū erat *alicuius*, & *aliquid*, pro duobus illis accus. *totam causam*: vt Cōmendo diceretur esse, *In alicuius fide atq; humanitate aliquid repono*. vel, *quidam repono*. sicut paulo antè, pro *In tua fide ac religione depono*, potius dicēdum fuisset, *In alicuius fide*, &c. Sedenim (vt verum fatear) alio potius quàm expositionum nomine hæc Ciceroniana dicta vocanda sunt: ideóque à cæteris verbis separari debuerāt. C A. Possuntne ex omnibus quos affert locis, eodem modo quædam excerpī, si non expli-

cātia proprietatem verbi *commendo*, at certè ad illud pertinentia? F A. Non equidem. nam hunc etiam locū verbo illi, tanquā expositionem, subiungit, *Qui nationes devictas bello in fidem cepissent*: quum tamen absurdū futurum sit, dicere, *Commendo*, esse *In fidem aliquid capio*. C A. At Nizolio minimè visum fuisse absurdum, ostēdunt hęc ipsa eius verba (paucissimis interiectis) *In fidem meam accipio*. F A. Alia multa videbimus multo his absurdiora & ineptiora, quę tamen absurda & inepta esse, nihilo magis animadvertit. F A. Quid si verò his contentus sit Marcus? M A R. Atqui nondum quicquam protulisti quod non censeam leniorem quopiam nomine appellādum. F A. At proferā, antequam hinc abeam, quæ ipsemet non inepta tantum sed ter quaterque inepta esse fateberis. M A R. Vix. C A. Ambiguum est illud Vix. dubiū enim est an intelligat te vix talia esse prolaturū: an se, etiā si talia pferas, talia esse vix confessurū. M. Libuit ambigūe loqui. F A. Nondum hac de re vrgendus est Marcus, Camille: sed tantum ut patientem nobis commodet autem rogandus. M. De eo quod vltro facio, minimè sum rogandus. F A. Ab hoc verbo ad aliud trāseundum censeo: si tamen prius monuero, ne illam quidem expositionem cui primum

lat locum, satis veram videri. Est enim
 robo verbum primum quo *Commendo* expo-
 nit Nizolius. C A. Nimum vis omnes Ni-
 zolianas huius verbi expositiones *ἐξουχίζειν*:
 ad aliud (vt dixisti) transeundum cenleo:
 interiecto tamen prius (si per vos liceat) il-
 lo de Horatianis versibus sermone quem
 mihi repentè memoria excidisse, antea cō-
 querebar. F A. De quibus loqueris Horatij
 versibus? C A. De istis,

*Qualem commendes, etiam atque etiam aspi-
 cæ: ne mox*

incutiant aliena tibi peccata pudorem.

F A. Lubenter audiam quid tibi super his in-
 mentem venerit. M A R. Lubenter & ipse.
 C A. Cogitaui certè non absimile verò esse,
 Horatium, quum hoc præceptum traderet,
 non tantum ad id quod experientia quoti-
 diana docet, sed nominatim ad illud quod
 Xenocrati contigit respexisse. F A. Quid il-
 lud est? C A. Vt à Polysperchonte tyrāno,
 (siue Polyperchonte, vt alij scribunt) de
 quadam commendatione reprhēderetur:
 & iuberetur in posterum *ἐξελέγειν* quos cō-
 mēdaret. id est, (Horatianis vtendo verbis)
 etiam atque etiam aspicere quales essent
 quos commendaret. F A. Pro verisimilibus
 quotidie afferuntur, quæ minus quàm hoc
 verisimilia sunt, M A R. Multo certè minus.

C A. Fateor alioqui, videri etiam posse ad hos Theognidis versus respexisse,

Μύποτ ἐπαμνησῆς πρὶν αἰεὶδῆς αἴδρα σαφ' ὦν,

Ὀργὴν καὶ θυμὸν καὶ βόπην ὅς τις αἶψ' ἦ.

Sed minus est periculi in laudando (quod prohibet nos facere Theognis, priusquam ingenium & mores eius quem laudaturi sumus, planè cognouerimus) quàm in laudando simul & commendando. Commendatio enim facit ut non solùm falsa pro veris habeantur, de illis qui falsò fuerint laudati, sed beneficia etiam in illos conferantur quibus omnino sint indigni. Atque hactenus à me interrupta sit tua Fabi in Nizoliū inquisitio. F A. Cur non potius dicis Nostra, quum tuam mihi operam sis pollicitus? & dicti Homerici, σὺν τε δὲ ἐρχομένη, memineries?

C A. Atqui me velut χροφὸν πρὸς σάπην esse vides.

F A. Imò te nequaquam talem Marco ostendisti antea. quem ego aduersarium metui: quia vereor ne aliquid à Ciceronianis didicerit quo tandem omnia quæ obiecta fuerint refellat. De Ciceronianis autem Nizolianis loquor. C A. Atqui de his dicendum esse puto, similes habere labra lactucas. Times (credo) ne Marcus plumbeo quopiam gladio à Ciceronianis sibi tradito te iugulet. M A R. Itàne ludos me facere pergitis?

A B. AEdilium est ludos facere. M A R.
 ed non tales. C A. Haberm hâc quod di-
 erem, si oleum incendio addere vellem:
 quum potius id restinguere cupiam. F A. In
 causa es Camille cur ad has verborum veli-
 ationes ventum sit. C. Quî fit vt in causa
 in? F. Quoniam tuum mihi ad hanc in Ni-
 zolium inquisitionem auxilium denegasti.
 C. Quid si meum tibi quantumuis ficulneû
 auxilium pollicear, statimne ad sermonem
 nostrum reuertemur? F. Statim. C. Iam igitur
 polliceor. F. Ego vicissim eò iam nunc
 reuertor. C. Sed quem ordinem vis tenere?
 F. Vt in singulis orationis partibus exem-
 pla quæpiam earum expositionum propo-
 namus quæ nobis reprehensione digne vi-
 dentur, ac debent ipsi etiam Marco, & ve-
 ro omnibus qui aliquo in Latinitate iudi-
 cio valent, videri. C. Libet igitur alia quæ-
 piam in ea parte orationis quæ Verbum vo-
 catur, exempla quæramus? F. Libet. C. Ve-
 rum suntne aliqua quorum nunc recorde-
 ris? F. Nequaquam: quippe qui Nizolium à
 duobus iam annis non euoluerim. C. Vt i-
 gitor nobis librum eius nunc euoluentibus
 offerent, ita ea proferemus. F. Omnino.
 Ac iâ certè in vnû incidi. C O N T O R Q V E O,
 Connoluo, Deflecto, iaculor. vnâ enim ex tri-
 bus istis expositionem esse falsam dico. C.

Nónne secúdam? F A. Maximè. F A. Potius certè *Detorqueo* quàm *Contorqueo*, significare posset *Deflecto*. M. Videndi sunt & attentè considerádi loci quos affert. F A. Hunc laborem non detrecto. Ac video iam profectò quid illum mouerit : id est, in errorem impulerit. Vltimus enim eorum quos affert locus, est hic ex Ciceronis opere De diuinatione, *Quosdam amnes in alium cursum cōtortos & deflexos uidemus*. M A R. Quidnam illud est quod eum in errorem impulsisse arbitraris? F A. Non arbitror tantum, sed omnino persuasum habeo, illum, quū videret participio *cōtortos* subiungi *deflexos*, existimasse hæc esse synonyma. solet autem, ex iis quæ à Cicerone copulari videt, & synonyma esse credit, vnum ad alterius expositionem afferre. M A R. Nónne velut synonyma ponuntur à Cicerone duo ista participia? F A. Minimè. neque enim participium *cōtortos* separandum est ab illis præcedentibus verbis *in alium cursum*. Quod autē quatuor verbis & per periphrasim dixerat *cōtortos in alium cursum*, postea vno dicit verbo *deflexos*. veluti si quis interroganti quid sit deflectere amnes, responderet esse, in alium cursum cōtorquere, vel in alium cursum conuertere. Fingamus enim Ciceronē ibi dixisse non *Contortos*, sed *Conuersos*

(vt certè Conuertere & Torquere ab eo cōiungi videmus) quid? an itidem Conuersos idem valere diceremus quod Deflexos? C A. Puto iam tibi acquiescere Nizolium. Sed aliqua nobis illius Nizoliana cōsuetudinis, cuius modò mentionem fecisti, quærenda sunt exempla. F A. In illo ipso verbo Conuerto inuenietur aliquod fortasse. Imò non iam inuentum iri fortasse, sed inuentum esse dicendum est. Audite enim: C O N V E R T O, *Commuto, Traduco, Confero, Deuoluo, Refero aspectum aliquò, Reciproco, Vicissim retrò commeo, Pono, Retido, Conuersum habeo.* C A. Quòdnam verò est ex his verbis, quod tanquam synonymum ad expositionem illius Conuerto attulerit? F A. Traduco. quoniam à Cicerone cōiungi vidit *traduxi & conuer-ti*, in hoc quem inter alios affert loco, *Tum omnem orationem traduxi & conuertim incre-pandam Cepionis fugam.* Quòd si animaduertisset in eo qui hunc proximè sequitur loco itidem coniuncta *conuertit & rapit*, non dubium est quin ad alias verbi Conuerto expositiones additurus fuerit etiam Rapio. In illo enim scriptum est, *Quicumque aliqua his ampla & honesta res obiecta est, totus ad se conuertit & rapit.* M A R. At ego non dubito quin id animaduernerit: sed multum horum vnum ab altero differre, quanuis coniun-

gantur, viderit. At verò inter Traducere & Conuertere nequaquam tantam differentiā possis constituere. Imò & ab aliis fortasse quàm à Nizolio idem in loco illo valere iudicari possint. C A. De his duobus verbis postea disceptabimus : nunc autem hoc dico, etiamsi Conuertere & Rapere idem valere dixisset Nizolius, tolerabilius id videri potuisse quàm quod alibi scribit, Rapere idem esse quod Vocare. Vísne Fabi locū illum inspiciamus? F A. Volo. C A. Audigitur: R A P I O, *Voco. Cic. Offic. 3. 4. Quū utilitas ad se rapere, honestas contrā reuocare videtur.* F. Huius expositionis occasionē illi præbuit verbum Reuocare. C A. Præbuit certè: sed debuitne præbere? F A. Nequaquam. quāuis enim verbū *Reuocare* opponatur hīc verbo *Rapere*, non tamē perinde est ac si dictū esset, *Quum utilitas ad se vocare, honestas contrā reuocare videtur.* M. Cur perinde nō est? F A. Quia multo vehemētius est Rapere ad se, quàm Ad se vocare. Imò ne vehemētia quidē vlla huic subesse videtur, quum illud non vehementiam solū sed violētiam etiam præ se ferat. M A R. Quid? an Cicero inuenire non poterat duo verba sibi opposita, quorū eadem vis & energia esset? F A. Quis hoc neget? Poterat enim verbis Trahere & Retrahēre (vt alia quædā prætermitt-

am) vti. M A R. Quare aut his aut aliis huiusmodi vti noluit? F A. Quoniam voluit ostendere, maiorem vim utilitatis quam honestatis esse, ac multo plus illam apud homines quam hanc valere. C A. Gratiam tibi habeo quod meas partes susceperis. vix enim vnquam ita Marco respondere potuissem ut illi satisfacerem. Sed rogo ut etiam de illo verbo Cōvertere, quod Nizolius exponit Traducere, illi respondeas. F A. Quid aliud respondere possim, quam Nizolium non bene considerasse quis proprius verbi Traduco esset usus? Hoc enim si bene perpendisset, Traducere prius quodammodo esse vidisset quam Conuertere: quum Traducamus id (proprie loquendo) quod ab vno loco abducētes in alium adducimus. C. Idē mihi videbatur. Sed vísne & cæteras expositiones illius verbi *Conuerto* examinemus? F. Quidni velim? sed repetendæ fuerint illæ. C A. Repetā. C O N V E R T O, *commuto, Traduco, Confero, Deuoluo, Refero aspectum aliquod, Reciproco, Vicissim retrò commueo, Pono, Recido, conuersum habeo.* F A. Ut de prioribus expositionibus prius verba faciā, hoc dico, me, quanuis ostenderim esse cur secunda illa expositio (qua Cōuerto dicitur esse Traduco) reprehendi possit, cogi tamen illam tolerabiliorē esse fateri quam vel tertiā vel quartā:

id est, quàm fateri, *Cōuerto* idē esse vel quod *Confero*, vel quod *Deuolo*. De quinta pronuntio, fieri nullo modo posse vt verbum *Conuerto* sine adiectione aliqua significet. Refero aspectum aliquō. Octauæ rationem (sed quæ mihi nullo modo satisfacit) ipsemet reddit, quum affert ex Salustij (vt ipse vocat) oratione in Ciceronem, *Qui auitas incommodum in gloriā suam ponit.* & addit, *id est, conuertit.* Cæteras me non satis intelligere fateor: sed hoc tamen animaduvertere, locū eas habere non posse, nisi *Conuerto*, eius etiam verbi quōd neutrum grammatici vocant, naturam habere dicamus. Videamus itaque an in vllō ex iis quos affert locis verbum istud dici neutrum posse videatur. CA. Percurrēdi sunt igitur omnes. FA. Nul- lum inuenio præter vltimum de quo tale quid suspicari possim. In eo autem legitur, *sed hoc vitium huc uni in bonū cōuertebat,* ex Ciceronis De claris oratoribus libro. CA. Iudicium ferri de illo non poterit, nisi ipsummet Ciceronem adeamus, & ex eo quæ hunc locum præcedūt ac quæ sequūtur audiamus. FA. Affert igitur Ciceronis opera. CAM. Accipe. FAB. In qua libri illius parte locum quo nobis inuento est opus, inuenimus? CA. Id nihilo magis quàm tu scire possum. Sed dum tu paginas quæ à sinistra

parte sunt percurres, ego eas quæ à dextra
sunt percurram. F A B. In locum illum in-
cidi. Audi me recitantem, & quidem al-
tius repetentem. Sed cum hæc magna in Anto-
nio, tum actio singularis: quæ si partienda est in
gestum atque nocem, gestus erat non uerba ex-
primens, sed cum sententiis congruens: manus, hu-
meri, latera, supplotio pedis, status, incessus, omni-
que motus cum uerbis sententiisque consentiens.
Vox permanens, uerum subrauca natura: sed hoc
uitium huic in bonum conuertebat. Habebat enim
flebile quiddam in questionibus (ita enim, vel
conquestionibus, non autem questionibus scri-
bendum est) aptumque cum ad fidem facien-
dam, tum ad misericordiam comouendam. M A R.
Totum illum librum à te recitatum iri exi-
timabam. F A. An ægrè fers altius repetitum
à me esse locum? Ex eo certè perspicis me
nonnisi valde circumspectè de illis Nizolij
expositionibus sententiam ferre uelle. M A.
Quæ igitur tandem est illa? F A B. Non
rectè ab illo exponi Conuertebat, tan-
quam uerbum neutrum. Vt enim de a-
liis quæ afferuntur lectionibus, (conuertebatur
& uertebat) taceam: etiamsi retineatur
conuertebat, non video cur neutrum esse
uerbum necesse sit, quum nominatiuus na-
tura subaudiri ante ipsum possit. vox per-
manens (inquit) uerum subrauca natura: sed

hoc uitium huic uni in bonum conuertebat.

MAR. Atqui nomen natura, quod præcedit, non nominatiui sed ablatiui est casus. CAM. Quid tum? nõne sæpe v-

suuenit vt ex præcedentibus vox aliqua repetita subaudiatur, in alio tamen casu?

MAR. At *uertebat*, quod alij legunt, possetne esse neutrum, & significationem habere absolutam? FAB. Posset. MAR. Quid-

ni possit & *conuertebat*? FA. Quoniam verbi Vertere ita vsurpati exempla supersunt,

at verbi Conuertere defunt. Quid iam pro tuo Nizolio respondes Marce?

MAR. Periculosum esse de huiusmodi expositionibus illius pronũtiare: ne fortè tandem aliqui alij reperiuntur loci quibus illæ conuenire

possint. FA. Imò quis dubitet quin ille diligentissimè eos præ cæteris excerpserit quibus se suarum expositionum fidem lectoribus facere posse existimabat?

MAR. Hoc præterea credibile est, illum, quanuis vocem tantum actiuam ponat, expositiones

tamen plerunque afferre quæ & ad passiuam pertineant. Quibus & hoc addo, quædam

verba pro expositionib⁹ haberi, (vt pote illis permitta) quæ tamẽ expositiones non sint.

FA. Qualia igitur esse verba illa dicemus? an synonyma? M. Partim synonyma, partim

velut synonyma. Exemplis autem melius

declarabo quod sentio. Verbe *conuerto*
 cùm alia apponit, tum verò hæc, *Traduco*,
Confero. Sed quum hoc facit, ad quosdam
 Ciceronis locos respicit, vbi verba illa ex-
 tant, eidem rei cui & illud, adhibita. Ec-
 ce enim, ex oratione De arusp. resp. *Ludi*
penè ad eadem & ad finis ciuitatis conuersi
sunt. Ecce ex eadem, *Ludi ab lætitia ad metū*
etraducti sunt. Etiā hæc ex eadē, *Qui ludos ad*
luctum cōferre uoluit. FAB. Non parum certè
 tibi pro istis excusationibus debent manes
 Nizoliani: sed eiusmodi sunt tamen vt ali-
 quid accusationis secū trahant: præsertim
 quum eum dicis cum expositionibus mi-
 scuisse illa quæ aliquid aliud sunt quàm ex-
 positiones. CA. Ego verò dico, si vera sint
 quæ iste Nizolij excusator affert, Nizo-
 lium non quemuis lectorem, sed doctio-
 rem quàm ipsemet fuerit requirere. Sed
 addo, quosdam esse locos in quibus lecto-
 res, quo doctiores erunt, eo magis quid
 in mentem venerit Nizolio mirabuntur:
 præsertimque illa synonyma aut veluti sy-
 nonyma legentes (vtrouque enim modo ap-
 pellanda censes) plerunque sibi visum iri
 somniare. Exempli gratia, quæ fieri pos-
 sit vt verbum Peto synonymum sit aut
 velut synonymum verbo Coniicio? &
 tamen inter alia ponitur. Locum ipsum
 D. iij.

adeamus. **CONIICIO**, *Coniectura assequor uel consequor*, *Coniecturam facio*, *Coniectura prospicio uel perspicio*, *Agnosco*, *Auguro*, *Interpretor*, *Diuino*, *Existimo*, *Diuido*, *Peto*, *Confero*. **F A B.** Miraris quid hîc agat verbum *Peto*: quid non miraris etiam quid hîc verba *Diuido* & *Confero* agant? **C A.** Imò: sed inulto etiam minus illud quàm hæc duo habere hîc locum posse videtur. **F A B.** An verò in editione Basiliensi, quæ Cælij Secundi Curionis labore atq; industria multo prodit auctior (vt ipse titulus prædicat) talia emendata non fuerunt? **C A.** Nescio: sed breui scire potero, quum illam quoque habeam. **F A.** Quanto certè plura in Nizolio lego, eo magis apud me de illo dico quod ab Horatio de Plauto dictum fuit (& quidè meritò, quod ille immeritò videtur de Plauto dixisse) nimium patienter, ne dicam stultè, miratos illū esse quosdā. **C A.** Affero editionem illam Basiliensem: nōne placet in locis illis de quibus antea egimus vnam cum altera cōferamus? **F A.** Placet. **C A.** Incipiam à verbo *Commenda*. Vides vt eadem sint omnino? *Probo*, *Fidei alicuius committo*, *In tua fide ac religione depono*, &c. *Consulam* hanc editionem & de verbo *Contorqueo*. Hîc quoq; eadem sunt expositiones, *Conuoluo*, *Iaculo*, *Deflecto*. mutatæ sunt tan-

um duarum posteriorum sedes. F A. Vide
 n in ea quoque *Rapio* exponatur *Voco*. C A.
 Eadem & ibi est expositio. F A B. Quære &
 verbum *Conuerto*. C A. Huius verbi omis-
 sæ sunt expositiones duæ, *Confero* & *Deuoluo*.
 F A B. Mirum est omissas fuisse potius illas
 quàm has, *Reciproco*, *viassim retrò commeo*,
Pono, *Recido*, *Conuersum habeo*: ac præsertim
 quàm istam, *Recido*. Ad *Confero* certè quod
 attinet, nihilo magis omitti debuerat quàm
Traduco: quum (vt antea ostendit Marcus)
 in duobus his verbis ad duos Ciceronis lo-
 cos respexerit Nizolius, vbi hæc verba eidẽ
 rei cui & illud essent adhibita. C A. Ne ipse
 quidem Cælius (quantum video) satis Ni-
 zolij mentem vbique intellexit: ac vereor
 vt satis cautè in alieno opere fuerit vbique
 ingeniosus. Ideoq̃ue iam malim illa editio-
 ne, in qua purum putum Nizolium habe-
 mus, contèti simus. F A. Hoc & ipse malim.
 c. Tibi verò Marce an idẽ placet? M. Quid-
 ni placeat? C A. Nec verò iam singulis ver-
 bis, quorum expositiones afferemus, tam-
 diu immorari (vt opinor) necesse erit. Quid
 enim iam longa disceptatione apud Mar-
 cum opus sit, quum illam pristinam in de-
 fendendo Nizolio pertinaciam deponere
 statuerit? M A R. Pertinaciam in defendẽdo
 Nizolio deponere statui, sed non defensio-

nem tamen abiicere. C A. Onerosa tibi est (quantum ex tuis verbis perspicio) hæc defensio. tu enim de illa, tãquam de onere quopiam, loqueris. M A R. Quasi verò, Abiicere defensionem, intelligi tãtùm possit Abiicere susceptum onus defensionis: ac non etiã, Abiicere illius defendendi consilium, siue voluntatem. C A. Vide quid agas Marce:

In causa facili cuius licet esse disertò.

At causa quam vis tueri, minimè facilis est. de hoc ego te pro nostra veteri amicitia præmoneo. F A. Noli Marcum à Nizolij defensione abstergere Camille: sed eũ hortare vt cautius quàm antea illum excuset: ita nimirum vt excusando, simul accusare dici non possit, atque, dum vno crimine absoluit, interim aliud nō impingat. Qualiacũque tamen erunt quæ ad Nizolij defensionem corrogauerit (nolo enim emendica-uerit dicere) ea in accusationis finem referuet. C A. Audiuit Marcus quæ dixisti: & tuum, vt opinor, consilium sequetur. ego verò ad quẽdam alia verba propero, quibus miras expositiones (non audeo enim ineptas dicere, ne Marcum offendam) adhibitas esse recordor. E M E R G O, Exeo, Enado, Aperio. Quis hoc arcanum nobis aperiet, Emergere esse interdum idem quod Aperire? Venio ad aliud, quod nō procul abest.

MO, *Coemo*, *Mercor*, *Paro*, *Comparo*, *Cauponor*, *Nundinor*, *Pecuniam in aliqua re colloco*.
 cio *Cauponor* idem esse quod *καπηλεύω*: &
 nihilo magis *Cauponor* esse idem quod
μο, quàm *καπηλεύω* est idem quod *πρίαμαι*,
ήνευνομαι. FA. Idem & ipse dico. CA. Audi
 quandam non minus vel potius multo ma-
 gis ineptā expositionem verbi *Cresco*. Scri-
 bit enim, C R E S C O, *Augesco*, *Adaugesco*, *Ac-
 cresco*, *Adolesco*, *Exolesco*, *Mano*, *Serpo*, &c. FA.
 Ineptam expositionē dixisti *ὑποκορίζομαι*.
 Illa enim qua dicitur *Cresco* accipi pro *Exole-
 sco* (ea autem est, opinor, de qua & tu id dixi-
 sti) non inepta tātū & ridicula, sed omni-
 no falsa est. Itāne verbum *Cresco* non mi-
 n⁹ *Exolesco* quàm *Adolesco* significare cre-
 dituros lectores putavit Nizolius? Sed cō-
 sulamus editionem Basiliensem, (quanvis
 eam non amplius adhibendam in cōsiliū
 dixerimus) vt videamus an hīc Nizolij ho-
 nori consultum in ea fuerit. CA. Nondum
 procul abest. Vides vt hęc quoque Nizo-
 lio suū *Exolesco* intactū reliquerit? FA.
 Et video, & miror: præsertim quū illius e-
 ditionis titulus modonō montes auri pol-
 liceatur. CA. Recordor nunc & cuiusdam
 significationis quæ verbo *Accipio* datur ab
 eodem: quæ tibi non minus noua, vt opi-
 nor, erit, quàm earum vlla de quibus facta

fuit hætenus mentio. F A. Quærendum est
 igitur verbum illud. C A. Audi. A C C I P I O.
*Capio, Recipio, Vtor, Interpretor, Intellego, Mu-
 tuor.* Vt taceam de expositione postrema,
 qua docemur *Accipio* esse interdum idem
 quod *Mutuo*, qualis est illa, obsecro, qua ex-
 ponitur etiam *Vtor*? F A. Interroga etiã qua-
 lem esse oporteat lectorem cui hoc à Ni-
 zolio persuaderi possit. C A. In mentione
 verbi *Intellego* (nam *Accipio* vides cùm a-
 liis verbis tum etiam hoc exponi) venit mi-
 hi in mentem miræ cuiusdam expositionis
 verbi etiam illius, quam aliis quampluri-
 mis adiicit. Vísne omnes recitem? F A. B.
 Quidni? C A. M. Vereor vt sine tædio audire
 possis. C A. I N T E L L I G O, *Cognosco, Sen-
 tio, Teneo, Capio, Percipio, Interpretor, Mentis
 complector, Cogitatione comprehendo, Cogitatio-
 ne complector, Perspicio, Comprehendo, Animum ad-
 uerto, Intelligentiam habeo, Accipio, Discō, Ani-
 mo percipio, Intelligentia & ratione comprehen-
 do, Ratione & intelligentia teneo, Animo & co-
 gitatione comprehendō, Constrictum conscientia te-
 neo, Persequor, Sententiam alicuius interpretor.*
 Quam ex his esse putas expositionibus que
 mihi risum moueat? F A. Nō dubito quin in
 ea qua *Intellego* dicitur esse *constrictum cō-
 scientia teneo*. C A. Bonus coniector es. F A.
 Imò quiuis idem assequi cōiectura potuif-

et. Sed in eo à te dissentio quòd talia stoma-
 nachum mihi moueant, quæ tu risum mo-
 uere tibi dicis. Sed quid, obsecro, cogitasse
 putabimus Nizolium, quum *intelligo* signi-
 ficare etiam *Constrictum conscientia teneo* di-
 ceret? Hic certè coniectore optimo esset o-
 pus. C A M. Videamus an hæc quoque ex-
 positio seruata sit in illa editione Basilien-
 si. F A B. Hoc ipsum à te petere vole-
 bam. C A. Seruata certè est à Cælio Secun-
 do. Non dicam autem itidem me mirari
 quid & hic cogitaret: sed potius illā ab hoc
 aliud cogitante seruata esse. M A R. Ab
 eo aliud cogitante dicis? vnde hoc scire
 potes? Animaduertit fortassis ille quòd re-
 spiceret Nizolius, quum dixit, *intelligo*
 significare inter alia, *Constrictum conscientia*
teneo: & quod te latet, illum non latuit.
 F A. Imò nō me solū sed alios omnes latere
 puto, ipsumque itidem Cælum latuisse.
 C A. Expectandum est igitur dum reui-
 uiscens Nizolius arcanum illud pandat.
 Verūm de hoc monendi fuerant lectores
 Nizolij, vt non frustrā se torquerent, quas-
 dam expositiones arcanas esse & mysticas,
 & quæ expositione ipsæmet opus habe-
 rēt: verūm hāc ab ipso Nizolio, quum reui-
 uisceret, expectandā esse. M A R. Nunquā-
 ne me irridendi finem facies? C A. Nun-

quámne risu digna loqui de tuo Nizolio defines? F A. Ciceronianorum sacris initiā-
 dus es Camille, vt quale sit illud Intelligere
 intelligas. C A. Nizolianis sacris potius. et
 enim ne ex ipsis quidem Ciceronianis vl-
 lum ad tanti mysterij cognitionem pene-
 trare posse existimo. Neque verò vllum ex
 Ciceronianis, qui iudicio valeat & Nizo-
 lium intus & in cute norit, adeo siue auda-
 cem siue temerarium fore puto vt exposi-
 tionum illius, vel in iis vocabulis quæ vul-
 garia sunt, patrociniū suscipiat. Audi enim,
 obsecro, quomodo Odi exponat. O D I, O-
 dio habeo, *Odiū in aliquem habeo, Inuideo, A-*
lienum animum ab aliquo habeo, Odiū alia-
ius rei habeo Aliqua res mihi odiosa est. Quale
 enim hoc est, dicere, *Odisse* idem significare
 quod *Inuidere*? Hoc si verum est, mentiun-
 tur philosophi, qui magnum discrimen in-
 ter odium & inuidiam ponendum esse tra-
 dunt: nugatur Plutarchus in toto eo libel-
 lo quem *περὶ φθόρου ἐμισύς*, id est *De inuidia*
 & odio, inscripsit. F A. Quid? an vis legibus
 philosophorum astringere Ciceronianos?
 C A. Dic potius Ciceronianos Nizolianos.
 ne veris Ciceronianis tantā fiat iniuria. Hi
 enim vlex suo Cicerone discere possunt,
 quemadmodum Græco prouerbio dicitur,
Χωρίς τῆ Μουσῆς ἔ Φρυγῶν οἰήματα, ita etiam di-

endum esse, *Χωρὶς τὰ μίτου τὸ φθόρου ὀείματα*.
 A. Tu verò Marce quid ad hæc respondes?
 onne & hîc Nizolij causam vis tueri? MA.
 Amplius deliberandum cenſeo: res magna
 est: vt inquit ille apud comicum. FA. Res
 profectò non magna est solùm, sed maxi-
 ma, quę tanto separata sunt interuallo, vel-
 le coniungere. FA. Rectè dicis non Coniũ-
 gere, sed tantùm Velle coniungere. nam in
magnis (vt dixit quidã poeta) *exuoluisse sat est*.
 FA. Miror Marcum non dixisse aliquod sub
 illa quoque verbi Odi expositione myste-
 rium latere. CA. Dixisset profectò, nisi tuam
 irrisiõnem reformidasset. FA. Atqui tu illi
 multo hac in re molestior es quàm ego, i-
 deoque formidabilior. MAR. Imò neuter
 estrum mihi iã est formidabilis: quippe qui
 aduersus omnes vestros cachinnos, omnes
 lannas, me armauerim. CAM. Quibus ar-
 mis? MAR. Quibus se armare solebat So-
 crates. FAB. Sed quòdnam erit ius illud
 quod tibi cum inermibus armato, certa-
 re concedet? MAR. Idem quo duo cum
 vno certatis. Verùm vt à iocis ad seria
 veniamus, quid si ad vocabulum *Inuisus*
 respexerit Nizolius, quum dixit, Odi inter
 alia significare *Inuideo*? FAB. Hoc certè di-
 cere, esset Nizolium ipsis etiam pueris risui
 exponere. Nã licet *Inuisus* dicatur qui odio

est, siue qui est odiosus, non tamen est ab Inuideor (quo utitur Horatius) id est φθονοῦμαι: sed is est propriè Inuisus qui à Græcis, nominatimque à Sophocle, δὲ καλῶς diceretur. MAR. Aliquid aliud tandē in mētem mihi venit quod excusare posse Nizolium videtur. FA. Quid illud est, obsecro? MAR. Quòd inuidiā pro odio in quibusdā loquendi generibus vsurpare Latini solēat. Neque enim id mihi negare potes vbi dicitur AEstuare inuidia, vel Ardere inuidia, vel Flagrare inuidia, aut etiam Conflagrare inuidia, vel Conflagrare incendio inuidiæ: (nam his quoque utitur Cicero) item vbi dicitur Concitare alicui inuidiam, vel Conflare, aut Parare: & Rapere aliquem in inuidiam, vel Trahere, vel Adducere. Itidēque vbi aliquis Capere inuidiam vel Colligere inuidiam dicitur, aut etiam Cumulare sibi inuidiam. FA. Quàm prodigius es exemplorum. An timebas ne ego hanc nominis Inuidia significationem in dubiū vocarem? Tantum certè abest vt id facturus fuerim, vt etiam de adiectiuo Inuidiosus, quod itidem pro Odiosus ponitur, cōmonefaciendum putarim, si fortè prætermitti à te viderem. CA. Gratiam habeto Fabio Marce, operam tibi nauanti. MAR. Atqui nequaquam de his mihi assentiretur, si quicquam

quicquam ad causę meę defensionem profuturū existimaret. C A. Itāne causam tuam appellas? M A R. Non causę meę, sed causę Nizolianę, dicere volui. F A. Imò tibi id excidit imprudenti quod sentis quidem, sed cupis dissimulare. M A R. Quid illud est? F A. Causam tuam agi tibi videri, quum Nizolij causa agitur. C A. Non immeritò certè hoc dicit Fabius. quis enim nescit accusari Ciceronianos, quum accusatur Nizolius? F A. Ne dixeris tantum Ciceronianos, ne videaris de omnibus loqui: sed adde Nizolianos. Nolo enim veris Ciceronianis iniuriam fieri. M A R. Hunc de Ciceronianis sermonem missum facias velim, & siquid habes quod iis quę à me pro Nizolio dicta sunt opponendum existimes, ad id quamprimùm venias. F A. At ego te attentum esse velim: quando quidem tanto illud audiendi desiderio teneris. Primùm significationē illam nominis Invidia, qua dicitur de odio, ex vulgi abusu natam esse dico. Neque enim dubium est quin vulgus, vt alia multa quę aliquid affinitatis habent solet confundere, ita hæc quoque confuderit: atque hinc illa superiora aliąque nonnulla eodem pertinentia loquendi genera profecta fuerint. Deinde, etiamsi Invidia pro odio positum inueniamus, non tamen & vicissim

Odium in significatione inuidiæ inueniri, multo igitur minus debuisse Nizolium Odi exponere Inuideo. M A R. Vnde verò fidem mihi facies, ex vulgi errore ortum esse vt Inuidia de odio in illis sermonis formulis poneretur? F A. Vel ex principio illius libelli cuius paulo antè mentionem feci. M A R. Illiusne libelli Plutarchi? F A. Certè. Prima enim illius verba sunt hæc, Οὕτω δὲ καὶ δοκεῖ μὲν τοῦ μίσους διαφέρειν ὁ φθόνος, ὃν οἱ αὐτοὶ εἶναι. M. Atqui nō dicit δοκεῖ τοῖς πολλοῖς, sed tantum δοκεῖ. F A. Hoc saltem fateberis, rationi esse consentaneum vt ea in re aliisque huiusmodi vulgus potissimum falli dicamus. M A R. Si ea in re erratur, à vulgo potius quàm à doctis errari crediderim: sed nondum inter nos de errore conuenit. Neque verò si quis illa tantum verba legat, minus dativum ἐμοὶ quàm illum quem dicis, subaudire possit. Idémque & in Latino sermone dicendum erit de verbo Videtur, si Græca illa his Latinis reddas. Sic etiam inuidia nihil ab odio differre sed eadem res esse videtur. F A. Fateor fieri posse Plutarcho iniuriam, ab aliquo qui hæc eius verba tanquam de suo sensu iudicantis afferret: verum mala eius fides statim deprehenderetur, vel ex iisque proximè sequuntur. C A. Miror verò tale illius libelli principium, Οὕτω δὲ καὶ δοκεῖ. F A.

Mirarer & ego hæc verba, si ab iis Plutar-
 chum sumplisse initium existimarem: ac nõ
 potius, hæc quæ de odio & inuidia legimus,
 esse longioris cuiusdam & latius patentis
 disputationis ἀπαρσμοα, persuasum haberẽ.
 C A. Quid ais? ἀνίφαλος est hic liber, siue
 hæc disquisitio? F A. Quis talem esse non fa-
 ceatur? C A. Illam igitur voculam οὐτω hæc
 tum præcedentibus iungere existimas. F A.
 Nimirum. Continuari enim eum sermonẽ
 existimo qui institutus esset de aliis quæ à
 vulgo solent confundi, quum tamen non
 paruum à literatis discrimen inter ea ponat-
 ur, ponique debeat. Sed faceſſat Plutar-
 chus, reuertatur Nizolius. M A R. Satis agi-
 tatus est, vel potius exagitatus, ille Nizolij
 locus. C A. Ideo ad aliũ tranſeundum est.
 F A. Nonne ad aliam orationis partem trãſ-
 eundum cenſes? C A. Nondum: quia me-
 moria mihi quædam inſuper ſuggerit ver-
 ba, quorũ expoſitiones nobis ſunt itidem
 pugnandæ. Atque adeo hoc ipſum ver-
 bum *Oppugno* in illo eſt numero: quippe
 id ab illo cũ aliis modis tum verò *Pro-*
ponitur. Nec tacẽdum *Erogo*, quod di-
 ſtinguere *Curo*: hunc Ciceronis locum
 ſcens, *Erogaſti pecunias ex ærario tuis le-*
gis. & alios addens in quibus verbum il-
 lud de pecunia itidem dicitur. Quid quod

idem ille Ciceronianorum antistes *Castigo* exponit *Obiurgo*? MAR. Vide ne tua memoria nimium fidas. CA. Non illi sed tuis tantum oculis fidere te volo. ecce locum FA. Quid iam dicis Marce? MAR. Me mirari. Potuit tamen exponi *Obiurgo*, sed alia expositio adiungenda fuit. FA. Imò ne sic quidem locum habuisset illa expositio: sed dicendum fuisset, *Castigo uerbis* esse *Obiurgo*. MAR. Atqui non semper additur hic ablatius. FA. Vbi non additur, relinquitur subaudiendus, ut grammaticorum utar vocabulo: eodemque modo datius *uerberibus*, in altera significatione. Sed quum sine adiectione ponitur, frequentius atque usitatius de hoc quàm de illo castigationis genere dicitur, ac sepius hic ablatius *uerberibus*, quàm ille *uerbis*, prætermittitur. At sequendo Nizolium, etiam vbi pater dicitur castigare filium, non aliud intelligendum erit quàm filium obiurgare, quum tamen contra nemo sit qui hic non potius *κολάζει* quàm simpliciter *νυθίζειν* verbo Castigare sit intellecturus. MAR. Sed nimium leni verbo uteris quum *νυθίζειν* dicis. FA. Vis σκληροτέρως dicam? MAR. Hoc quoque nimium lene fuerit. Deindustria (ut opinor) retices *ἐπιτιμᾶν & ἐπιπλήσσειν*. F. Multo asperiorē esse *πλεονεξία* *ἐπιτιμήσιν* fateor quàm sit *νυθίστης*, &

σωφρόνις, siue σωφρονισμός: quinetiam ὀπίπλη-
ξιν maiorem quandā asperitatem præ se fer-
re quàm illā ipsam ὀπίμησιν: sed tamē casti-
gationē filij tanto his omnibus esse asperio-
rem quanto verbera verbis sunt asperiora.
M A R. Quid? an nullus pater est, Fabi, qui
non sit Demea? F A B. An nullus pater est,
Marce, qui non sit Mitio? M A R. Nimum
certē mitis erat Mitio: utpote ne ὀπιμνηχός
quidem: quantum ex versibus istis conii-
cere possumus,

*Amat? dabitur à me argentum dum erit com-
modum.*

Vbi non erit, fortasse excludetur foras.

Fores effregit? restituentur. Discidit

Vestem? resarcietur. est (diis gratia)

Et unde hæc fiant, & adhuc non molesta sunt.

Sed vicissim nimiū Demea erat φιλεπμητής,
nimium fuerat φιλεπμητής & Menedemus.

At ego cum etiā patrē qui rebus quæ κόλασιν
poscunt ὀπιμνησιν tantūm adhibeat, Mitionē
vocandum esse dico. c. Fabius haud negat,
Marce, patrem castigare filium posse dici,
etiam quum illum obiurgat tantummodo:
sed tamen, vbi nihil adiicitur, id est, non di-
citur Castigare verbis, sed tantūm Casti-
gare, rationi consentaneum esse dicit ut de
obiurgatione illa intelligatur quæ ad ver-
bera vsque progreditur. Quod si ita est, nō

debut Nizolius illa verbi Castigare expositione esse contentus, vt diceret esse Obiurgare. Alioqui certè fatetur, absque adiectione etiam dictum Castigare, esse interdum nihil aliud quàm Obiurgare, siue Increpare. Legimus enim inter illos Cicero-
 nis, qui à Nizolio afferuntur locos, *Castigamus etiam segnitiam hominum*. Itidémque apud
 Liuium, *Castigarétque segnitiam populi*. Sic
 verò & qui apud Maronem, vel potius què
 (nam de formicis loquitur) *castigant moras*,
 dici possunt castigare segnitiam: quanuis
 non idem hoc in loco quod in illis segnitie
 sit genus. F A. Nonius tamen aliam expositionem
 huius verbi in illo Maronis loco commentus est. C A. Quam? F A. Vt Castigare
 ibi sit Expedire. C A. Sed quid erit Expedire moras? F A. Fateor expositionem
 hanc alia expositione opus habere. C A. Apud me
 quidem certè opus habet. F A. Sic & aliæ multæ eius expositiones expositores
 desiderant: & quædam non tam expositores
 quàm correctores. C A. Ne ipse quidem
 Martialis, vt opinor, illam explicationem
 vel intellexisset, vel intellectam approbasset,
 vbi illud genus loquendi imitans dixit, *—iã turpidus uocat magister, Castigatque moras*.
 F A. Persequere, obsecro, tuum illum sermonem. C A. Dicebam, à te non nega-

ri quin Castigare, sine adiectione etiam, pro Obiurgare duntaxat positum inueniatur: additurusque eram locis illis in quibus ita accipi necesse est, etiam alios. F A. Eos velim nunc addas. C A. Hoc inter alia dicturus eram: videri mihi verbū istud valde proprium de segnitiei & segnium obiurgatione fuisse: quum ad illos quos attuli locos accedat hic Cæsaris, lib. I, De bello ciuili, *Segniores castigat atque incitat*. Alioqui tamē de qualibet etiam obiurgatione, id est, ob quodlibet erratum siue peccatum, dictum fuisse, minimē sum nescius: idēque & in deriuatis spectari, Castigatio, Castigator, Castigatus, Incastigatus. Nam apud Horatium sēni à natura hoc est insitū vt sit castigator minorum. Apud eundem legimus,

*Nec me dimittes incastigatum, ubi plura
Cogere quā satis est ac non cessare uidebor.*

Et quoniam in horum eius locorum mentionem incidi, addam huic & tertium qui quandam sibi peculiarem habet significationem. Is est in Arte poetica vbi Castigare pro Emendare dicit,

*Vos o Pompilius sanguis carmē reprehendite
quod non*

*Multa dies & multa litura coeruit, atque,
Perfēctum decies non castigauit ad unguem.*

Verū vt ad illam de qua nūc agitur signi-

ficationem reuertar, eam nimirum qua pro
Obiurgare siue Increpare ponitur, vt in ea
Castigare absque adiectione plerisque in
locis inueniri fateor, ita illi in nōnullis ad-
iectum inueniri dico ablatiuum Verbis vel
Dictis: & quidem ab ipsis etiā poetis. Huius
saltem versus recordaberis, vt opinor, Mar-
ce, qui apud eorum principem extat,

Hic grauis Entellum dictis castigat Aæstes.

Cur verò addidisset *dictis*, nisi timuisset ne
Castigat de verberibus potius intelligeretur
ab iis qui locū hunc non perlegerent? MAR.
Existimas igitur priorem & magis propriā
esse illam significationem verbi Castigare
qua ponitur pro Punire, quā eam qua
tantum pro Obiurgare, seu Increpare. CA.
Existimo equidem: & in eo assentior Fabio,
MAR. At Nonius ab utroque vestrum dis-
sentit, qui prius huius quā illius signifi-
cationis mentionem facit. CA. At nos tam
in ea re iudicio caruisse Nizolium respon-
demus, quā in eo quod Castigant moras
exposuit Expediunt. M. Ego verò pro Ni-
zolio respondeo, has significationes ope-
ras mutuas quodammodo tradere dici pos-
se: quum vt Castigare dicimur aliquem non
solum verbis sed etiam verberibus, id est, nō
solum obiurgare, sed etiam verberare: ita
etiam verbera obiurgatrici (vt ita dicam)

linguæ tribuantur ab Horatio. C A. Vt itur-
 oratius verbis illis? M A. Nequaquã: (ideo
 elut veniã petens, addidi, Vt ita dicã) sed
 cit *patruæ uerbera linguæ*. Hinc etiã *verbe-*
re cõuitiota cõtæ cogitationis dixit Quint⁹ Ci-
 cero: itẽ, *Mirificam mihi uerberationẽ cõssationis*
pistola dedisti. Sic verò & Græco *ἐπιπλήξω*,
 uum sonet Incrẽpare, seu Obiurgare, sub-
 se quãdam uerberationis significationem
 i eius origo spectetur) non ignoratis. F A.
 t tu in eo quod de voce illa Verberare di-
 isti, te à tuo Nonio discedere ignoras for-
 asse. M. Ignoro sanẽ. F. Tu igitur ab illo hoc
 uoque scribi scito, Verberare non solum
 verberibus sed à verbis etiam esse dictum.
 A R. Non adeo certẽ in Nonij verba iu-
 ui vt hoc etiam credere necesse habeam.
 A. Multo etiam minus in ipsius Nonij ver-
 a iurabis, vbi quas in eum Henricus Ste-
 phanus scripsit animaduersiones legeris.
 A R. Huiusne etiam loci mẽtionem facit?
 A. Ita: & dicit minimẽ hoc dicturũ fuisse
 i sciisset aut recordatus fuisset eundẽ ver-
 o Ferire vsum tribui quẽ illud in Plautino
 habet loco, qui ei hoc comminiscendi an-
 am præbuit. Sed tu, mi Marce, sicut in No-
 nij verba iurare non vis, ita & in Nizoliana
 ne posthac iurato, sed potius iudicem tam
 iniquum (de iis quæ ad sermonem Cicero-

nianum pertinent) eiurato. Alioqui vide ne verba ad rem conferamus: id est, ne post lōgam de castigatione disceptationē, tuā castigationi manus admoueamus. MAR. Nouè certè Terentiano illo genere loquē diu'teris. Sed quānam erit illa castigatio? Non ea erit, opinor, quam Vlpianus castigationem fustium appellat. FA. Non equidem: sed ea quæ à iurisconsultis castigatio modica vocatur. MAR. Quānā ea est? CA. *Inridici certant, et adhuc sub indice l'us est.* MAR. Itāne Fabi non intelligis quid mihi mineriis? FA. Egōne minari velim quod non intelligam? MAR. Intelligis ergo quod iurisconsulti non intelligunt, si verum est quod Camillus dixit. FA. Imò, quanuis quānam fuerit à veteribus iurisconsultis appellata castigatio modica non minus dubitē quā à Bartolo, Baldo, Accursio, & ab Alciato post illos, aliisque post Alciatum dubitatū fuit, quæ tamen ea sit de qua uti aduersus te cogito castigatio modica, satis superque intelligo. CA. Apage mihi omnem hunc sermonem, qui nos ab illa nostra inquisitione potest ἀπαχθῆναι. Iam enim mihi memoria excidere incipiunt permulta quæ ad eam pertinent. FA. Tātūm aperiendus est liber Nizolij, alia statim exempla emergent. CA. Iam nunc aperiam. Incidi certè iam in vniū.

F I O, *Conſto*, *Conſlor*, *Euado*, *Euenio*, *Accido*.
 F. Quid hîc agût *Conſto* & *Euado*? C A. Ipſe ex
 te hoc ipſum quærere volebã. F A. Id ipſum
 igitur cuius ſum nescius, ex me ſcire vole-
 bas. C A. At ego te nescire nesciebam. Au-
 di verò & verbi *Fungor* expoſitiônẽ. F V N-
 G O R, *Efficio*, *Colo*. Idem hîc ex te quæro de
 verbo *Colo*, quod modo de *Conſto* & *Euado*:
 an idem reſpõdes? F A. Idem. C A. Audi nũc
 & compositi *Perfungor* expoſitiônẽ. P E R-
 F V N G R *vtor*. An de hoc *vtor* non aliud
 à te reſpoſum accipiam? F A. Non aliud.
 C A. N O T O. *Animaduerto*, *obſeruo*, *Deſi-*
gno, *Conſtituo*. An de hac quarta expoſitio-
 ne reſpondes illud ipſum? F A. Iſſiſſimum.
 C A. Verbum autem D I C O, cùm alia ſigni-
 ficat, ſi illi credimus, tum verò *Ago*. F A.
 Fortaſſe perperam pro *Aio* ſcriptum fuit.
 C A. Imò ibi præcedit illud *Aio*. Audi ve-
 rò & verbi *Declamo* expoſitiones. D E C L A-
 M O, *valde clamo*, *Exercor*, *Ludo*. Quem
 hîc locum habet verbum *Ludo*? vt de *Exer-*
cor taceam. F A. Ipſe de illa expoſitione in-
 terrogare te voluiſſem. C A. Venio ad quaſ-
 dam periphrasticas expoſitiones. An igitur
 I N C I D O, producta media ſyllaba, idem
 eſſe dicis quod *Securim iniicio*? vel I N-
 C H O O, idem quod *Sementem facio*? F A.
 Si de alterutra expoſitione aſſentiendum

illi esset, minus de hac quàm de illa assentiri grauari. C A. Atego maluissem *Fundamenta iacio*, quàm *Sementem facio*. F A. Neq; verò à me aliter hoc probatur quàm velut è duobus malis minus. C A. Quædam autè sunt verba quibus non vnâ tantùm expositionem periphrasticam, sed plerasque tribuit, (aliis intermistis) & quidem quæ non duobus solùm sed pluribus verbis constât. F A. Tales quasdam periphrases antea mihi videor animaduertisse inter eas quas attulisti: sed quænam hæ sunt quæ nunc in mentem tibi veniunt? C A. Attende quomodo *Attendo* exponat. ATTENDO, *Animaduerto*, *Animum attendo*, *Noto*, *Diligenter percipio*, *Attento animo summa cum benignitate audio*, *Mentem aurésque erigo*, *Silentium orationi alicuius tribuo*, *Animum et mentem adhibeo*, *Aures ad alicuius vocem admoueo*, *Attentum animum ad detoris cōseruationē teneo*, *Adsum animo*. Quæ est tua de his periphrasibus sententia? F. Bonas malis esse permistas. C. Hæc verò, *Mentem aurésque erigo*, vllōne modo fieri posse tibi videtur? F. Nequaquam. neque enim *Mentem* & *aures* erigere est *Attendere*, sed potius *Præparare* se ad attendēdum. C. Hoc certè vel vnus ex iis Ciceronis quos affert locis, docere eum & potuerat & debuerat: *Erigite mentes aurésque uestras, et me da*

inuidiosis rebus (ut ille putat) dicentem attendite.

Lubenter autem Cicero vni eidemque verbo nomina duo iungit, quorum vnum ad corpus, alterum ad animum pertinet, & quidem ab illo ad hunc transferens. Nam vt hîc Erigere mentibus tribuit, ab auribus, parte corporis, mutuatus, sic alibi in verbo Admouere idem sibi permittit: vbi scribit, *Mentes uestras, non solum aures, ad aruspicum uocem admouete.* Simul autem lenitur hic verbi Admouere vsus. durius enim alioqui videri hoc posset Admouere mentem, quam vt Ciceronis sermoni conueniret. F A. Pulchra sanè hæc observatio. C A. Eam Henrico Stephano acceptam fero, sicut & quasdam alias ad Ciceronianum stylum pertinentes: sed quum huius alia quædam insignia exempla mihi protulerit, nunc illorum duntaxat possum recordari. F A. Si fortè in eorum memoriam redieris, à te mihi communicari velim. Sed vnde subortus est Marcoris? Aliquid ego in sermone meo peccavi, aut saltem peccasse illi videor: id est, non satis Ciceronianè dixisse. C A. Scio quid sit: non satis Latinum esse putat illud genus loquendi, Redire in memoriam alicuius rei. M A R. Ciceronianum quidem certè haud esse arbitror. F A. At mihi, qui Ciceroniani nomen minimè affecto, Latinum esse sa-

tis fuerit: sed tamen non Latinum solum
 sed Ciceronianum etiam esse contendo.
 C A. Vide Fabi ne aquilam cornix prouo-
 casse dicatur. F A. Imò Dareti prouocanti
 Entellus restitisse dicetur. M A R. Saltem a-
 pud Nizolium exemplum illius loquendi
 generis extare non puto. F A. More multo-
 rum Ciceronianorum facis, quum Cicero-
 nianam Latinitatem chartarum Nizoliana-
 rum finibus circumscribis. Verum cedo mi-
 hi Ciceronis opusculum De senectute. C A.
 Iā trepidare mihi videtur Marcus. F A. Hæc
 mecum legito Marce, *sed his legendis redeo in
 memoriam mortuorum.* Videamus annon &
 ab ipso Nizolio sit annotatum hoc exem-
 plum. C A. Imò iam satis Marcum pudefe-
 cisti. nōne vides illum propemodum *εὐ-
 δαίμων ὑπὸ τῆς αἰγῆς*; Græca enim hyperbole
 vtendum est, quum Latina desit. F A. Quū
 iam Nizolianū opus in manus sumpsissem,
 vt de loco illo cōsulerem, vidē in quod pe-
 riphraseōn (id est periphrastaticarum exposi-
 tionum) chaos, quā rudem indigestā-
 que molem (vt de alio quodam eius loco
 antea dictum fuit) inciderim. A C C V S O,
*Causam uel culpam in aliquem confero, uel trās-
 fero, Culpam alicuius accuso, Postulo, Insimulo,
 Arguo, Compello, Appello, Criminor, Cito, No-
 men defero, Diem dico, In crimen uoco, Aliquem*

Reum cito, In iudicium uoco, Ad iudicium uoco,
Reum facio, In reos refero, In iudicium capi-
tis uoco, Litem intendo, Litem infero, mulctam
peto. C A. Multane supersunt? F A. Vix tertiā
partem recitauī. Attende. Litem capitīs in ali-
quem infero, Capitīs aliquem graſſo. C A. Ah
desine. non times ne vtriusque noſtrūm au-
res chaos illud nō dicam obtūdat, ſed ob-
ruat? F A. Rectē mones: deſino. Sed nihil-
ne hīc examinabimus? C A. Non certē quod
examinemus, ſed otium potius deēſt. F A.
De illa ſaltem expoſitione diſſeramus qua
dicat Accuſo eſſe mulctam peto. M A R. Quid? il-
lam tu improbaſ? F A. Improbo quidē cer-
tē. M A R. At ego contrā addi ab illo potuiſ-
ſe dico & mulctam irrogo. Sed tu Irrogare mul-
ctam, eſſe iudicis putaſ, non autem eiꝯ qui
accuſat. F A. Mēne adeo forenſium inſtitu-
torum (de Romano autem foro loquor) i-
gnarum exiſtinaſ vt hoc neſciam? M A R. At
ſi hoc noſti, cur expoſitio illa tibi non pro-
batur? F A. Quoniam Accuſo multo latius
patere dico quā Mulctam peto, vel irro-
go. C A. Nunc recordor me legiſſe apud Bu-
dæum quod à vobis dicitur, Mulctam irro-
gare, non eſſe iudicis (quum tamē alicui ver-
ba iſta quiddam ſignificare videri poſſint
quod ad iudicis officiūm pertineat) ſed a-
ctoris: atque apud Ciceronē id obſeruafſe.

Sed tamen non video quomodo quicumque accusat, multam irrogare dici debeat. Nec dubito quin tu quoque, si rem totā expēderis, statim fassurus sis, quicumque multam irrogat, vel petit, cum accusare: sed non vicissim, quicumque accusat, eum multam irrogare, vel petere. M. Eadem ratione apud Nizolium multa possis improbare, & quidem ex iis ipsis quæ ad huius verbi *Accuso* expositionē affert: veluti quū dicit, esse *In iudicium capitis uocō* siue *arcesso*, vel *Litem capitis in aliquem infero*, siue *Capitis aliquem arcesso*, *In capitis periculum uocō*, *Periculum capitis infero*, *In discrimen capitis adducō*: item quum dicit esse *Aliquem ambitus crimine arcesso*, item *Actionem per duellum alicui intendo*. C. Atqui hæc afferre, non est Nizolium excusare, sed ampliorem eius reprehendēdi materiam suppeditare. Esto enim, Nizolium non ignorasse, Accusare esse genus, at illa esse species: an satis fuit hoc scire? an ideo lectori ita confusa illa debuit exhibere? Sedenim ne tu quidem qui ei vis patrocinari, tanquam expositiones verbi *Accuso*, ab illo talia afferri negas. M. Improprie ita vocari fateor: sed alia in mentē non venit appellatio. F. Cur non potius synonyma, vel tanquam synonyma esse dixisti, ut antea loquutus eras? M. Ne hæc quidem

dem appellatio locum habere hîc potest. F. A. Tu igitur fateris multa ex iis quæ à Nizolio tanquam expositiones afferuntur, pro expositionibus minimè habēda esse: sed tamen aliud vocabulum quò appellare possis ea, nō inuenire. C. A. Fatetur Marcus quæ videt se nullo posse modo negare. F. A. Nōne fateris & in eo grauitèr peccasse Nizoliū, quòd verbis cōpositis apponat simplicia, vel simplicibus cōposita, perinde ac si idē vtrorumque vsus esset? M. Profer exēpla. F. A. Veluti quum *Absterreo*, idem quòd *Terreo*: *Admisco*, idem quòd *Misco*: *Commungro*, idem quòd *Migro*. Vicissim autē quū simplici verbo *Ab eo* apponit compositum *Trans eo*, quum itē simplici *Ligo* apponit composita *Alligo*, *Illigo*, *Colligo*. M. A. R. Nōne quædam simplicia licuisse illi explicare putas per composita, & vicissim? F. A. Puto: sed non in his aut talibus verbis. At de composito *Attingo*, quod exponit simplici *Tango*, & de simplici *Torqueo*, quod exponit composito *Intorqueo*, tacendum putauī, sicut & de aliis nonnullis quæ mihi suggerbat memoria: de quibus tamen fortasse quispiā *ἀπὸ τῶν ἁπλοῦν* minimè tacere voluisset. C. A. Exempla compositorum quæ malè exponuntur à Nizolio per simplicia vicissimque simplicium quæ malè per composita.

ta, protulisti: sed compositorum quæ malè sint aliis compositis explicata, mentionem nullam fecisti. F. A. Quasi verò possum omnium meminisse. Addere te hæc par est: *ni omnia possumus omnes*. C. A. Vnius saltem exempli recorder: cuiusdam nimirum loci ubi *Consisto* exponit non solum *Consto*, sed etiam *Insisto* & *Assisto*, & (interiectis his, *Commoror*, *Nitor*, *Pendeo*) addit *Subsisto*. F. A. B. Quid ais Marce? adeone in tui Nizolij verba iurasti, ut hoc quoque credas, *Consisto*, etiam *Insisto* & *Assisto* & *Subsisto* posse significare? C. A. Si Marcus virgeri se à te videat, statim tibi religionem iniiciet. F. A. Quam mihi religionem narras? C. A. Mysteriorum Nizolianorum. M. A. R. Nunquàmne me irridendi finem facies? C. A. Vide quid dicas an me putas velle religionem in risum vertere? F. A. Et velitationi huic & isti simul dissertationis nostræ parti finem imponendum censeo. C. A. Ab ea igitur parte orationis quam grammatici Verbum appellant, ad eam quæ Nomen ab illis appellatur trans-eundum fuerit. F. A. Nec diligentiam fortasse nec iudicium in Nizolio perinde hinc atque illic desiderabimus. C. A. Imò sibi similem esse hominē comperiemus, quod melius me nosse ipse potes. F. A. Nulla mihi nunc exempla succurrunt ex iis quæ ad hanc ora-

tionis partem pertinent: sed dum tu ea que
in memoria habes proferes, ego librum e-
uoluam, vt aliquod saltem possim & ipse
exhibere. C A. Verum hoc ita fiat velim vt
interim animum, aut aliquam saltem ani-
mi partem ad ea quæ à me dicentur atten-
das. F A. Ira fiet. C A. Ab vtris nominibus à
me initium sumi libet? F A. Ab iis quæ sub-
statiua vocantur. C A. A Paupertate igitur
ordiendum erit. M A R. Mali est ominis hoc
exordium. C A. Εὐφήμει Μάρκε. M A R. Σὺ οὐδὲν
ἐν δυσφήμει. C A. Ipse certè Nizolius malè
aminatam Paupertatem reddit, quum eam
ad Mendicitatem redigit. F A. Quid? an
Paupertatem in extremo gradu, sicut &
Mendicitatem, collocat Nizolius? C A. Ita.
F A. Quot sunt igitur pauperes, tot erunt
mendici. C A. Totidem. F A. Proh, quot
mendicos, vna Nizolij expositio efficit. M.
Videndus est Nizolij locus, antequam tam
vehementer exagitetur. C A. En tibi illum.
P A V P E R T A S, *Tenuitas, Angustia rei fami-*
liaris, Domestica difficultas, Inopia, Egestas, Men-
dicitas. F A. Aut non legerat locum Aristo-
phanis, aut eius non recordabatur Nizo-
lius, quum vltimam hanc expositionem cæ-
teris adiiceret. C. Quem Aristophanis lo-
cum ais? F. Illum qui est in Pluto, de discri-
mine quod est inter πτωχὸν & πένετα. negare

autem ne Marcus quidem possit quin πτω-
χοί & πένητες appellationes Græcæ planè re-
spondeant Latinis Mendici & Pauperis ap-
pellationibus. C A. Recordarisne illius loci
F A. Certè. C A. Recita igitur.

Πτωχοὶ μὲν γὰρ εἶσι, οἳ σὺ λέγεις, ζῆν ὅτι μὲν
ἔχοντα.

Τοὺς δὲ πένητες, ζῆν φιδόμην, ἐκ τῶς ἔργου ποσὶ-
χοντα.

Περί γίνεσθαι δ' αὐτὰ μὲν, μὴ μὲντοι μὴ δ' ὅτι
λείπειν.

Quum autē addit Aristophanes, ἐκ τῶς ἔργου
ποσὶχοντα, videtur ad ipsam vocis πενία ori-
ginem siue etymologiam alludere: quum
πενία dicatur ἀπὸ τοῦ πένεσθαι, in antiqua illa si-
gnificatione qua ponebatur pro πονεῖν, siue
ἐργάζεσθαι. Ad quam & Thessalos respexisse
crediderim quum seruos suos, πενέσας vo-
carunt. C A. Propriè igitur πένης (pro quo
habent Latini vocabulum Pauper) fueritis
qui labore victum quærit. M A R. Sed Men-
dicitatem nōne fatemini Paupertatis esse
sororem? F A. Imò verò qui hoc dicit (esse
nimirum τῆς Πενίας ἀδελφὴν τὴν Πτωχίαν) ap-
pud eundem poetam grauitè reprehendi-
tur. Quum enim dixisset Chremylus,
Οὐκοῦν δὴ περὶ τῆς Πενίας Πτωχίαν φαιδρὲν εἶπα-
δελφίω,
respondet Πενία,

Τρεῖς γ' οἱ τὸν καὶ Θεραπευτὴν Διονύσιον φάσιν
ὁμοῖον.

C A. Sed quid Aristophanis loco erat opus,
quum in oculos nostros tot quotidie exē-
pla incurrant eius quod inter pauperes &
mendicos est discriminis? Hunc igitur ser-
monem missum faciamus, & ad alias expo-
sitiones veniamus, quibus Ficinus nos eodē
quo illic modo πάντα κατὰ μίαν Μύκωνον docet
ponere. Audi igitur. IMPVDENTIA, Cō-
fidentia, Audacia, Os. Atque vt hīc Impudē-
tia dicitur esse Audacia: ita vicissim, vt par
pari referatur, Audacia dicitur esse Impudē-
tia. AVDACIA, Confidentia, Impudentia,
Cervix. F A. Malè profectò de audacibus, at
bene de impudentibus meretur Nizolius.
quantum enim illos dedecorat, tātum hos
decorare dici potest. M A R. Quid ita? F A.
Quoniam bellicosos viros & Martios non
minus vocare oportebit impudentes quàm
audaces: at, verò impudentes suam impu-
dentiā deriuare in Martem audaciæ princi-
pem poterunt, si suam impudentiam nihil
aliud esse quàm audaciam, possint osten-
dere. C A. Ad alia nobis exempla pergendū
est: quum nulla hīc à Marco expectanda sit
excusatio. F. Audacia nimirum & Impudē-
tia silentium illi imposuerunt. Sed Camille,
antequam hinc abeamus, ex te vel ex Mar-

coſſi moleſtum illi non eſt) ſcire velim cuſ
 Audaciam exponat etiam Ceruices. M A.
 Quoniam Cicero de vna eadēque re Au-
 daciam & Ceruices dicit. F A B. Memini
 me alicubi legere *Tantis æruicibus* apud Ci-
 ceronem: ſed quæri locum & inuentum ex-
 pendī cupio. M A R. Is eſt in Ciceronis Fru-
 mentaria. F A. Querendus eſt. M A. Iam in-
 ueni. *Tametsi qui erunt tantis æruicibus recu-
 peratores, qui audeant in provincia, quum præ-
 tor adſit, non ſolum contra uoluntatem eius, ſed e-
 tiam contra fortunas iudicare?* F A. An quia di-
 xit Cicero, *Qui erunt tantis æruicibus qui au-
 deant*, ideo vocabulum Ceruices ipſum per
 ſe pro audacia uſurpare licebit, & *Præditus
 æruicibus*, pro *Præditus audacia*, dicere? C.
 Eodē (ut opinor) ſenſu dicere potuiſſet
 Cicero, *Qui erunt tam erectis ceruicibus?*
 Tunc verò licuiſſet Nizolio dicere Audaciā
 eſſe Ceruices erectas. F. Nempe Ceruices
 demiffas audaciæ aut ſaltem fiduciæ oppo-
 ni dixiſſet eodem iure: Quòd ſi Ceruices
 erectas liceat exponere Audaciam, licebit
 fortasſe Indomitam ceruicem apud Hora-
 tium exponere Feritatem: quum dicat *Indo-
 mitæ æruicæ feros*. C A. Sed legim⁹ ſne Demif-
 ſas ceruices apud eundem orato: em? F A.
 Non apud eum, ſed apud Propertium ea
 verba me legere memini,

At dum demiffis ſupplex æruicibus ibam,

Diæbar. siat uilior esse. laar.

Minimè certè dubiū est quin demissæ ceruices erectis opponantur: sed quū dicit Cicero Tātis ceruibus, nequaquā perinde esse crediderim ac si dixisset, Tam erectis ceruicibus, neq; erectas ceruices eum dicturum fuisse de audacia quæ à natura cuipiam insita sit, sed tantū de sumpta fiducia: Ita enim Erectæ ceruices & Demissæ ceruices sibi vidētur opponi, vt Sumere animū & Abicere animū. C. A. An igitur quū ita loquutus est Cicero, Qui erunt tantis ceruicibus, perinde est ac si quis Græcè diceret, *τίνας ἐς ἔρται οὐ πρὸς αὐχένες*, vel, *αὐτὰς ἐς φλαύχες*? F. Nequaquam. sumpta enim est hæc metaphora ab equis. quauis enim illis natura ceruix sit ardua, videtur tamen ita erecta, nescio quid superbiæ præ se ferre. Aliud autem est, audacem, aliud, superbum esse, C. A. Quid si verò Tantis ceruicibus exponamus Tam tumidis? nam apud eundem oratorem Tumidas ceruices me legere memini. F. A. Ne hæc quidē expositio quadrare possit: quū tumor ille ab ira potius proficisci videatur. C. At Ciceronis locus ille cuius nūc sum recordatus, est ex oratione in Vatinium, non procul à principio, Repentē enim te, tanquam serpens è latibulis, dactylis eminentibus, inflato collo, tumidis ceruicibus, in-

culisti. Ibi quidem certè iræ mentio fit, in
iis quæ proximè præcedunt, *venisti iratus om-*
nibus. quod ego, *simulac te aspexi,* priusquam
loqui cœpisti, *quum antè Gellius, nutricula sedi-*
tiosorum omnium, testimoniū diceret, sensi atque
præiudi. An verò comparisonem cum ser-
pente in eò tātū esse putas quòd mentio
fiat latibulorū? F. Nihil vetat fortasse quo-
minus ad ea etiā quæ sequūtur illam exten-
damus. Verū sub ista hypotyposi vultus
hominis irati, quæ comparatione illustra-
tur, aliquid præterea latere existimandum
est, nimirum irrisiōem guttutis Vatinij: si
verū est strumosum illud fuisse, atque hinc
petita iocī materia, ipsum Vatinium, ora-
torem inflatum ab eo vocari. C. Quæ tan-
dem igitur illorum verborum explicatio
inuenietur? An Tantis ceruicibus dicemus
esse Tam duris, (vt quidam exponunt) &
sumptam esse à bubus metaphoram? F. A.
Quid? an qui duriores sunt ceruice boues,
cæteris audaciores existimantur? C. A. Ne-
quaquam: sed valentiores. F. A. Hoc si ita
est, cur nullam duritiei ceruicis mentionem
faciunt neque Virgilius, neque Varro, ne-
que Columella? Ita enim Virgilius,

...optima toruæ

Forma bouis: cui turpe caput, cui plurima ar-
nix,

Et crurum tenus à mento palearia pendent.

Vbi turpe caput vocatur quod est vastum & prægrande: atque hunc adiectiui istius vsus apud Varronē quoque obseruasse mihi videor. Sic etiam Gallicè dicimus, *Vne grande uilaine teste*. At *Ceruix* plurima dicitur quæ est longissima. Agnoscimus autem in illo Virgilij loco ista Varronis verba, *Cervicibus crassis ac longis, à collo palearibus demissis*. Columella quoque, *Cerviæ longæ et torosa palearibus amplius*. At duritiei cervicis in eligendis bubus nullâ fit mentio: imò quædam illi innasci durities traditur ab eodem Columellâ; libri eiusdem (qui sextus est) capite decimoquarto, quæ iugum non patiatur. C. A. Quæ igitur est dura cervix, à qua dicitur & Græca metaphora quispiam *σκληραύχην* siue *σκληροβράχμος* esse? F. A. Eadē (meo quidem iudicio) quæ & Rigida cervix & Indomita dicitur: non ea quæ iugum lubenter patitur, sed contrà quæ respuit. Ideoque Horatius *Indomita æruiæ feros* dixit: ac vicissim, *equum tenera docilem æruiæ*: atque idem allegoricè loquens, *Nondum subacta ferre iugum ualeat Cerviæ, nondum munia comparis æquare*. Denique dura cervix ea dicenda fuerit quæ & rebellis à quibusdā poetis appellatur. & *Ceruices*, sine vlla adiectione dictum, po-

tius pro peruicacia quàm pro audacia pos-
 se accipi crediderim: vt Ceruicosus à qui-
 busdam recentioribus vel potius recentis-
 simis scriptoribus appellatus fuit qui est
 peruicax & inexorabilis. C A. Quomodo
 igitur illa verba Tantæ ceruices, explicare
 oportet? F A. Fortasse tantas intelligere de-
 bemus Tam crassas. C A M I L. An per phy-
 siognomonas ita exponere licebit? F A R.
 Si non per omnes, at per aliquos. M A R.
 Quid? an necesse fuerit eadem orationis
 forma vti qua vsus est Cicero, vt illum in
 hac voce rectè imitemur? F A. Minimè verò
 ea lege & velut necessitate velim te altrin-
 gere. M A R. Quo igitur alio modo vti voce
 illa poterimus pro audacia, ita quidem vt
 reprehensionem vitemus? F A. Non dubito
 quin rectè vsuri simus vbi aliquid orationi
 addemus quod lectorem ad intelligendam
 significationem illam adiuuet. si, exempli
 gratia, ita loquemur, Considerate quæ sint
 illius hominis ceruices, qui rem eiusmodi
 aggressus fuerit. C A. Non minus molestus
 mihi est hic tam longus de ceruicibus Ni-
 zolianis sermo, quàm molestum esset oneri
 aliquod ceruicibus meis diu sustinere. F A.
 Cupis igitur ceruices Nizolianas à tuis cer-
 uicibus depellere. C A. Non cupio tantum,
 sed percipio. F. Quin tu igitur nobis occa-

sionem sermonis aliò transferendi præbes?
 C A. Præbebo statim. F A. Quod iam quæ-
 ris nomen? C A. Avaritia. habet enim (si be-
 ne memini) illud quoque nomen Nizolia-
 nam quandam expositionem. Me certè non
 sefellit memoria. audi enim. A V A R I T I A,
sordes, Inhumanitas, Auiditas. F A. Miror certè
 quis ille sit Ciceronis locus qui Nizoliū in
 hunc errorem impulit. M A R. Tam citò ex-
 positioni illi errorem obiicis? Quid? nōn-
 ne auari sunt inhumani? F A B. Et quidem
 plusquam inhumani eorum plerique: atque
 omnes propemodū alio etiam quàm vul-
 gari modo inhumani. C A. Quis ille est in-
 humanitatis modus? F A. Is quo in seipso
 etiam sunt inhumani: dum nimirum nulla
 in re non dicam valetudinis suæ, sed nec
 corporis nec animi sui rationem habent:
 dum non solum suum defraudant geni-
 um, sed in aliis etiam rebus nihilo magis
 corpori suo parcunt quàm si ἐν ἀμοτερίοις σά-
 μασι viuerent, vel omnis illorum ἐν Κελὶ ἐ-
 σὲτ ὁ κίνδυνος. Sed nōne in prodigos etiam
 (qui vitio avaritiæ omnino contrario labo-
 rant) cadit inhumanitas? Fateor alioqui
 avaritiæ comitem esse inhumanitatem po-
 tius quàm prodigalitati, aliisque nonnul-
 lis vitiis: sed ideòne avaritiæ idem quod in-
 humanitatis appellatione significari dicere

potuit? Avaritiam Paulus Apostolus dixit esse *ρίζαν πάντων τῶ κακῶν*: quidam verò τῶ ὕδατι συγγεφεύων (vt loquuntur Græci theologi) eā appellauit *μητρὶν πολλὴν τῶ κακῶν*: eadem igitur ratione qua dixit illā idem significare quod inhumanitatem, dicere posset idem significare quod impietatem, perfidiā, inuidiam, rapacitatē, crudelitatem. Illi enim ipsi quorum modò mentionem feci Græci theologi, avaritiam omnia simul Dei præcepta *περβαίνειν* ostendunt. C A. Ad illud quidem certè quod attinet, cui tanquam maximo, primus à Seruatore nostro datur locus, manifesta est in avaris illius *ὑπερβάσις*, quum enim eo iubeamur Deum amare tota totius cordis, totius animi, totius mentis affectione, hoc tanto amore avaros aurum tantum & argentum prosequi, & non Deo, sed illis seruire, omnibus est longè notissimum: ac sæpenumero apud se dicere,

Εἰς δ' ὑπέλαβον χρυσίμοις τῷ Θεῷ,

Τὸ ἀργύριον ἢ ὕδωρ καὶ τὸ χρυσίον.

Quos autem magis fore perfidos putandū est quàm eos qui quum existimari velint illum qui verè Deus est iurare, in sui pectoris latebris non huius numen, sed illorum, auri & argenti, numina adorant, & quuum dant fidem interposito iureiurando, non alia numina iurari à se cogitant? Quis verò magis

alterius macrescit rebus opimis (vt de inuidio loquitur Flaccus) quàm avarus? suas enim vnus res opimas esse cuperet. Quis magis fuerit rapax quàm is cuius rapacitas nō magis vllis rapinis quàm mare vllis aquis expleri potest? A quo maior expectanda sit crudelitas quàm ab eo qui τὰ φίλτατα etiam velit πειλοῦν ἀπὸ πλούτου, si ex ea re lucrum aliquod sit reportaturus? Sed crudelitatis fortasse mentionem facere minimè necesse habui, quum ab inhumanitate, quam Nizolius eandem cum avaritia statuit, proficiscatur: quum, inquam, inhumanitas velut ingressum ad crudelitatem præbeat. C A. De hoc saltem quemlibet facilè tibi assensurū puto, non minus crudelitatis appellatione quàm inhumanitatis, (quanuis vna mitior sit altera) potuisse Nizolium *avaritiam* exponere. F A B. Sed finis tandem est imponendus nostro de *avaritia* Nizoliana sermoni. C A. Ab Avaritia ad Adulteriū transire statueram: sed interim mihi in mentem venit lepida quædam definitio, quæ ne mihi memoria excidat vereor. F A B. Hanc itaque definitionē illi de Adulterio sermoni præuertendam censeo. C A. Nunquàmne audisti quæ sit Ciceroniana nominis Edacitas definitio? F A B. Minimè. C A. Audies igitur quod nunquam audisti. F A B. Et lubentèr

quidem. C A. Sed Nizolius is erit qui te illa docebit. F A B. Ne Nizolii quidem discipulus esse erubescam. sed dic tandem quæ sit illa. C A. *Edacitas, vitium ventris & gutturis.* F A. Quis verò Nizolio assentiatur, Ciceronem ita definiisse edacitatem? M A R. Ciceronis ista sunt verba in oratione pro M. Cælio, *Vitium ventris & gutturis.* F A. Hoc fateor: sed quid tum? an Ciceronis sunt edacitatem ita definientis? C A. Locus est adeundus. M A R. Eum facile inueniam. Audite. *At vero in M. Cælio, nulla luxuries reperietur, nulli sumptus, nullum æs alienum, nulla conuiuiorum ac lustrorum libido, quod quidem vitium ventris & gutturis non modo non minuit ætas hominibus sed etiam augt.* F A. Cur potius edacitatem quàm bibacitatem (liceat enim hoc uti nomine) aut saltè cur bibacitatem minus quàm edacitatem Nizolius hîc significari putet, nihil causæ video. C A. Recordaris fortasse, dùm hoc dicis, voti Philoxeni, qui sibi gravis optabat guttur ut paulo longiorè aut saltè non tam breui frueretur inter bibendum voluptate. F A. Imò votum illud penè obliuiscor in memoriam reuocari. C A. Sed pro te facit & quidam alius Ciceronis locus, ubi *lustris vinum iungit.* is est Philipp. 2, *Quoniam omnes impuritates pudici in domo susceperis, in lustrisque confectus.* Item 13, *In lustris popinas.*

alea, uino, tempus ætatis omne consumpsisses. F A. Rectè, meo iudicio, idè intelligi existimas his in locis appellatione vini, quod conuiuiorum in illo orationis pro Cælio. Quemadmodum verò hæc, quod *quidem uitium uentris et gutturis*, ad conuiuiorum libidinē referuntur (neque enim mihi persuadere quāquam possit, per ventrem significare uoluisse Ciceronem non *πὺρ γαστήρα*, sed *τὴν ὑπὸ πὺρ γαστήρα*, vt Græci interdum minus inhonesta appellatione vocant) ita quæ subiungit, *Almores autem et hæc deliciæ quæ uocantur*, quæ *firmiore animo præditis, deuius molestæ non solent esse*, nunquam hunc occupatum impeditumque tenuerunt, ad lustrorum libidinem pertinere puto. C. At Nizolius, an hæc illò referri animaduertit nescio, sed in illa edacitatis definitione tanquam certissima, optimè sibi cōstare video. Nam & in voce Venter, ubi locum illū profert, *uitium uentris et gutturis*, addit, Id est, gulositas quā uocant. Quinetiam in Appendicula ad Observationes, in qua recenset vocabula quæ partim pro barbaris partim pro non satis Latinis habet, pro illa voce Gulositas Ciceronianos suos iubet dicere Vitium uentris & gutturis. F A. Cur verò non & edacitatis appellationem illis permittit? C A. An hoc miraris? F A. Quis, obsecro, non miretur?

C A. Miretur quicumque non minus quàm ego diligēter eum euoluerit, & alias quamplurimas voces barbaris, aut saltem parum Latinis, ab eo annumerari animaduernerit, quæ Latinissimæ esse comperiuntur. F A B. Exempla mihi aliquot proferas velim. C A. Non antè proferam quàm huic in Observationes eius inquisitioni finis à nobis fuerit impositus. Illud enim opusculū ab Observationum opere est separatum (id est, calci huius operis adiunctum) quanuis & in illo observationes Nizolii habeamus, & quidē tales vt nihil alteris debere dici possint quod ad mouendum lectori siue risum siue stomachū attinet. F A. Ad aliā igitur nominis alicuius definitionē trāscamus. C. Quid si nō recorder? Imò vnus saltem recorder. F. Quænam ea est? C. Qua *Conuiuū* dicitur esse *Λατubatio epularis amicorū*. F. Valde angustis conuiuū terminis circumscribit Nizolius, si cōuiuium esse non putat nisi quod ita definiri possit. M A R. In ea opinione fuisset Nizoliū nō existimo. F. Imò ego nō minus hæc verba (quæ alioqui Ciceronis esse fateor) ab illo esse posita pro definitione nominis *Conuiuium* existimo, quàm illa superiora *vitium uenteris & gutturis* pro definitione nominis *Edacitas*. C. Explicationem fortasse potius quàm definitionem esse fatebitur

ebitur Marcus. MAR. Imò ego iam vobis
 vel explicationem vel definitionem vocis
 Conuiuium appellare permitto verba illa,
accubatio epularis amicorum, & vos nimio Ni-
 zolii reprehendendi studio eò rādem pro-
 uehi dico, vt pro eo Ciceronem reprehen-
 datis. sunt enim ipsissima Ciceronis verba.
 F. A. Quid? annon Ciceronis esse, paulo an-
 tē ipse quoque confitebar? MAR. Non sa-
 tis est dicere, Ciceronis: sed addendum, ex-
 plicantis siue definientis vocem illam Cō-
 uiuium. Audi enim me locum ipsum ex Ca-
 tone maiore recitantem, *Bene enim maiores
 accubationem [uel accubationem] epularem ami-
 corum, quia uitæ coniunctionem haberet, Conui-
 uium nominarunt. melius quàm Græci, qui hoc i-
 dem tum Compotationem, tum Concoenationem vo-
 cant: ut quod in eo genere minimum est, id maxi-
 mē probare uideantur.* Quid iam ad hæc re-
 spondes? F. A. B. Ciceronem de prima & ma-
 ximē propria significatione loqui quam e-
 ius maiores illi voci dederint: sed potuif-
 se postea conuiuium vocari illorum quo-
 que accubationem epularem, qui quum a-
 micitia iuncti non sint, ad easdem tamen e-
 pulas fuerint inuitati: & de hac re Nizoliū
 monere lectorem debuisse. C. A. Imò, ne ni-
 mium reprehendendi studium nobis obui-
 cere pergat Marcus, ita Nizoliū excusamus

ut dicamus illum suis Ciceronianis in mentem id venturum nequaquam arbitratum esse. F. Ita excusandum censeo. M. Atego excusatione non tam illi quàm vobis opus esse dico. F. Quid? an vis palinodiam à nobis cani? M. Volo. F. Ita igitur habeto, non seriò sed ioco definitionem illam reprehendisse. M. Eóne tandem confugitis? hoc certè non est palinodiam canere. F. Expectas forsitan ut ab illis Stesichoreæ palinodiæ verbis initium sumamus, Οὐκ ἔστι τιμὴ λόγος. M. An id à vobis expectandum mihi sit nescio: sed hanc demum fore legitimam palinodiæ formam dico, siue illis ipsis verbis, siue aliis quæ non dissimilia sint vtamini. F. Quin id fiat per me non stabit: sed vereor ut idem à Camillo impetrari queat. Vnde verò tibi Camille risum interim subortum esse putem? C. Risum mihi mouet mea quædā ἀλόκοτος super illo ipso Ciceronis loco cogitatio, quæ nunc primùm animū meū subiit. sed eam vix expromere audeo. F. Quid ita? C. Quoniā ea ille Ciceronis locus oppugnatur. F. Vtrum ea in parte quæ ad definitionem illam pertinet? C. Nequaquā. F. — *quicquid habes, age, Depone tuis auribus.* Te enim eius poetæ verbis qui plurimum à te diligitur, compellendum existimaui. C. Sed nescio quàm tutis Marci auribus id deponi possit. F. A. An vis me Marci

quoque aures præstare? C. Quid hoc verbi est? an vis Marco deridendum te propinare? F A. Si Ciceroni præstare aliquem dicere iussit, an mihi Præstare alicuius aures dicere non licebit? C A. Per me quidem licet. F A. Marci autem risum non timeo, quum illis meis verbis aures non patefecerit. Iam igitur Camille eloquere quicquid illud est: præfatus (si ita videbitur) te non serió loqui. C A. Imò verò eloquar, εἴη' ὡς παίζων, εἴη' ὡς πρὸς δάξαν, vt ille apud Platonem dicit. F A. Quænam igitur pars illius loci à te oppugnatur? C A. Ea pars in qua Latinos accusationem epularem amicorum melius Cōuiuuium appellasse dicit quàm Græcos Cōotationem, siue Conccenationem. F A B. Definitionem illam non reprehendis, vt antea dixisti. F A. Nequàquam: sed ipsam Ciceronis reprehensionē reprehendo. M A. Proh, cum quo mihi res est homine, qui Ciceronem etiam reprehendere audeat. C A. Proh, cum quo nobis negotium est homine, qui omnes quotquot vnquam fuerunt Græcos reprehendere non dubitet, & quidem in iis quæ ad sermonem pertinent: quum inter omnes & constet & semper constiterit nullam linguam aptius, nullam felicius, nullam ornatius animi sensus exprimere. M. Nonne totum locum recitare libet? C A M.

Quidni libeat? repetam autem altius. Neque ipsorum conuiuorum delectationes corpora uoluptatibus magis quam cœtu amicorum et sermonibus metiebar. Bene enim maiores acutissimam epularem amicorum, quia uitæ coniunctionem haberet, Conuiuium nominarunt. melius quàm Græci, qui hoc idem tum Compotationem tum Concœnationem uocant: ut quod in eo genere maximum est, id maximè probare uideantur. Ego uerò propter sermonis delectationem tempestuacuiuius delector, &c. M A R. Quid hîc reprehendis? C A. Ciceronem Græcos ausum esse reprehendere, id verò est (inquam) quod reprehendo. M A R. Quid? an honestiorem Conuiuii quàm Compotationis (id est συμποσιου) vel Concœnationis (id est συνδείπνου) appellationē esse negas? C A. Nego, & pernego. M A R. Atqui de ipsis etiam pecudibus vnâ potantibus dici potuisset συμπίσιον: sicut de vnâ uescentibus iisdem, συμβρώσιον (neque enim dicere ausim συμφάγιον) at verò hoc nomen Conuiuium non itidem commune pecudibus esse posse quisquam dixerit, quum in eo Latini ad id respexerint quod dicit Cicero. C A M. At ego & tibi & Ciceroni ipsi nego ad id Latinos respexisse: quicquam tale illis quos maiores suos uocat Cicero in mentem uenisse nego. Quòd si Græciò respicere uoluissent, melius συμβρώσιον dixisset.

ent quàm Latini Conuiuium dixerunt. M.
 Cur melius? C A. Quia non itidem ambi-
 gua illis fuisset suæ appellationis ratio. M A.
 Putásne igitur Latinis ambiguam esse ap-
 pellationis suæ rationem? C A. Non puto
 solum, sed etiam affirmo. M A R. Quæ illa est
 ambiguitas? vereor enim ne aliquam ipse
 tibi somnies. C A. Nónne ambigua est ver-
 bi Viuere significatio? an qui hoc dicet, is
 aliquid quod somniauerit, afferre à te dice-
 tur? M A R. Quid aliud significat verbum Vi-
 uere quàm quod vulgo notū est, & quod à
 Græcis ζῆν siue *Leuē* dicitur? C. Merito sanè,
 quum de nomine illo Conuiuium loquēs,
 dicerem Latinis ambiguam esse suæ appel-
 lationis rationem, nullam agnoscere in ea
 ambiguitatem voluisti, quum duplicem es-
 se verbi Viuere. vsum ignores. M A R. Hoc &
 innumerabiles alios mecum ignorare scio.
 C A. An tu Fabi ex illorū innumerabilium
 numero? F A. Quomodo esse ex innume-
 rabiliū numero queam? quomodo innu-
 merabiliū possit numerus iniri? C A. Extra
 locum: tibi ne ignota est illa minimè vulga-
 ris verbi Viuere significatio? F A B. Ignota
 esse non poterit, tantisper dum recordabor
 illorum Catulli verborum, *Viuamus mea Le-
 uia*: vt alios aliorum poetarum omittam
 locos. M A R. Quid igitur ibi Viuamus va-
 G.iii.

lere putas? F. A. Genio indulgeamus, vel Genialiter viuamus. M. A. R. Iam ergo coniectura mihi assequi videor quid velit Camillus: nimirum falso à Cicerone dici, aptius esse Conuiuii apud Latinos quàm Symposii apud Græcos nomen: quòd Latini in eo nò ad aliam verbi Viuere significatiònẽ quàm ad eam quam dixisti respexerint. C. A. Rem acu tetigisti. M. A. Sed hoc nõne tanquam à iocante dictum accipiendum est? C. A. Vbi attentius apud te id expendis, & cum tuis Conciceronianis, aut in Ciceronianitate collegis (utrocunque modo vocare illos mauis) communicaueris, tum demum respondebo iocòne id an seriò dixerim. M. Egòne meis (ut tu vocas) Conciceronianis id communicare ausim? illòsne vllam vllius Ciceroniani dicti reprehensionem & quis auribus esse audituros credis? C. A. Tu quoque, ut opinor, parum æquis auribus illam accepisti. M. A. R. Ita se res habet: ut nihil dissimulem. C. A. Apud te saltem id expendes attentius, ut dixi. F. A. Vide ne Adulteri obliuiscaris Camille. id est, eius de quo Ciceronianos Nizolianos monere volebas super illa voce. C. A. M. Non obliuiscar. Eos sicut monueram ne fidem haberent suo Nizolio, dicenti Auaritiam idem esse quod Inhumanitatem: ita etià monere volebam

ne illum autorem sequerentur, vbi inter A-
 dultorium & Stuprum nihil discriminis po-
 nit. Hæc enim sunt eius verba, A D V L T E-
 R I V M, *rii*, *Stuprum*. F A B. Levis, certè præ
 aliis est hic error. Non cogitavit bonus
 vir, sicut omne adulterium est stuprum, ita
 omne stuprum non esse adulterium: vel (vt
 breuius loquar) Stuprum esse velut genus:
 adulterium, velut speciem. C A. Sed quum
 diceret modò Fabi, leuem præ aliis esse il-
 lum errorem Nizolij, intelligebásne esse le-
 ue flagitium? F A. Satin' sanus es? C A. Imò
 verò tu ipse satin' sanus es, qui causa indicta
 me statim damnes insanix? Scito enim me
 non tam meis quàm Nizolii verbis, aut (si
 mauis ita loquar) me in persona Nizolii hæc
 tibi quæstionem proposuisse. F A. Quid? an
 Nizolio error est idem quod flagitium? C A.
 Lege hæc. F A. E R R O R, *Erratio, Erratū, Pec-*
catum, Lapsio, Prolapsio, Fraus, Falsa opinio, Cul-
pa, Flagitium. Heus tu Marce non iam pro
 tuo Nizolio erubescis? C A. Erubuit quidẽ
 certè: salua res est. ac vix pudor eum (vt o-
 pinor) pro suo loqui Nizolio permittet. F A.
 Adeone infans erit eius pudor? C A. Cur fu-
 turum dicis quod iam est? M A R. Quasi ve-
 rò me nunc primùm experti sitis infantem.
 C A. Quid sibi volunt hæc illius verba, Fa-
 bi? F A. Infantis appellatione aliter quàm

Horatius utitur, pro eo nimirum cui Cicerō disertum opponit. Sed de hoc Nizoliano, in erroris explicatione errore fatiſ: à vitiis ad virtutes transferēdum nobis sermonem cenſeo. C A. Apertius loquere. F A B. Periculum nobis cenſeo faciendum ὁσὸς Nizolianæ in explicandis virtutum nominibus: quum eius ὁσὸς (volui ὁσὸς dicere) in explicandis vitiorum appellationibus abundè iam perpexerimus. C A. Nempe ab equis ad afinos viſ transire, quod ad Nizolianas ſive explicationes ſive expoſitiones attinet. F A B. Hoc ſi nobis contingere vidē, ab afiniſ ad equos ſtatim reuertemur. C A. Audi igitur Nizolianam quandam expoſitionem nominis *Humanitas*: & quidem multis aliis ſubiunctam. F A B. Quid eſt, obſecro, *Humanitas* Nizolio, præter id quod omnibus Latinæ linguæ peritiſ in mentē ſtatim venit? C A. Aliquid quod nulli vnquam alii in mentem veniſſe puto. F A B. Quid tandem eſt illi *Humanitas*? C. *Altitudo animi quæ dicitur*. F A. Itane verò Ciceronianorum duci Nizolio *Humanitas eſt altitudo animi*? Non equidem hæc ſcripſit ille dux ἀφ' ἑαυτοῦ καὶ ἐκ τῶν μεταβλητικῶν, (vt tu modò nos ab equis ad afinos eſſe tranſituros dicebas) nec ἀπ' ἐκ πῶν, ſed ἀπὸ τοῦ. M A R. Valde profectò acerba eſt hæc tua reprehenſio, & falſa tamē

fortasse. F A B. Adeundus est ipse Ciceronis locus, ut veram esse Marcus fateatur reprehensionem, quam fortasse falsam compertum iri dicit. C A M. Ad eum iam perueni, In liberis uerò populis *et* in iuris æquabilitate exercenda etiam est facilitas, *et* altitudo animi quæ dicitur: ne, si irascamur aut intempestiue accedentibus aut impudenter rogentibus, in morositatem inutilem *et* odiosam incidamus. F A B. Mihi iam videor animaduvertere quid Nizolio persuaserit vnum & idem esse Altitudinem animi & Facilitatem. C A M. Quid illud est? F A B. Quod Cicero huic illud subiungat. Nam & aliis in locis, propemodum innumeris, ubi aliquod vocabulum ita subiunctum à Cicerone vidit Nizolius, interposita tantum copulatiua seu connexiua particula, ita synonymum id esse iudicauit, ut eo alterum exponi posse censuerit, atque adeo exposuerit. Idemque & de iis intelligendum est locis ubi plura, licet *ἀσυνδέτως* posita, non aliter dicuntur quàm si *συνδέσµοις* connexa essent. Illius autem rei exempla quædam nos antea vidisse puto: sed & inter cæteras expositiones quæ dantur nomini illi Humanitas, reperientur. Quære vocem illam apud Nizolium Camille. C A. Non diu quærenda fuerit. F A B. Humanitas, Facilitas, Lenitas, Mansuetudo, Comitas, Urbanitas, suauissimi mo-

res, Benignitas, Mansuetudo morum ac facilitas, Suauitas sermonum atque morum, Lepos, Altitudo animi quæ dicitur. Videndi nunc sunt qui ab eo afferuntur loci. In uestra mansuetudine atque humanitate totam causam repono. Quinetiam ex Cic. ad Q. fr. affert, Clementia, mansuetudo, humanitas. Ex his nimirum locis dixit Nizolius, Humanitatem esse idem quod Mansuetudinem. Nec longo interuallo sequitur hic, ex Lælio, Amicitia remissior esse debet & liberior & dulcior, & ad omnem comitatem facilitatemque proclivior. Ex hoc nimirum loco idem esse Humanitatem quod Comitatem, tradidit Nizolius. Et quoniam in quadam ad Atticum epistola scripsit idem, *Tua singularis humanitas, suauissimiq; mores*, dixit etiã Humanitatẽ & Suauissimos mores vnum idẽque significare. Denique quoniam ille in quodam loco operis De oratore scripsit, *Nullum est vitæ tempus in quo nõ debeat leporem humanitatẽque uersari*, videmus Humanitatem illa etiam Leporis appellatione exponi. Nec dubiũ est quin eandem omnino & in cæteris expositionibus rationẽ sequutus fuerit, atque id ex aliis Ciceronis perspicui locis possit. C A. Periculosam certẽ & parum prudentem exponendi rationem narras. F A. Sed Nizolianam tamen. C A. Nizolianam esse ne ipse quidem

Marcus negare aufit. F A B. Quinetiam fatebitur iam (sat scio) non aliud illum mouisse ad addendam & illam postremam expositionem, qua Humanitatem scripsit esse Altitudinem animi quæ dicitur, quam quòd videret Ciceronem, quum dixisset Facilitas, addere verba illa, Et altitudo animi quæ dicitur. C A. Atqui non subiunguntur illa nomini Humanitas, sed nomini Facilitas. F A B. Nónne vides primam omnium expositionem esse illam qua Humanitas dicitur esse idem quod Facilitas? quum igitur voci huic Facilitas subiunguntur, perinde est ac si illi vocabulo Humanitas subiungeretur: vt pro Nizolio respondeam. Ac fateor certè, si verè dici queat Altitudinem animi esse idem quod Facilitatem, haud falso dictum etiã iri nihil aliud esse quàm Humanitatem. Sed tuæ fuerint partes illud nobis, in tui Nizolii gratiam, probare: illud, inquam, quum Cicero dixit, Facilitas & Altitudo animi, vocibus idem omnino declarantibus vsum esse. M A R. Hoc ego vtinam probare possem, vt Camillum à Nizolio, id est, à Nizolii manibus, veniam suæ irrisionis petere cogerem. Sed hoc saltem mihi vterque vestrum fatebitur, vt spero, duo illa sic à Cicerone cõiungi vt nõ valde diuersa videri possint. C A. Atqui non sibi consta-

ret Cicero si facilitatem cum altitudine animi coniungeret. MAR. Quare? C A. Quia in illo ipso libro De officiis (qui primus est) dixerat quandam esse animi elationem, à qua quod fieret, non esset virtutis, sed potius immanitatis omnem humanitatem repuentis. F A. Ipsa Ciceronis verba proferri satius fuerit. C A. *Sed ea animi elatio quæ ar nitur in periculis & laboribus, si iustitia vacat, pugnâtque non pro salute communi, sed pro suis commodis, in vitio est. non modò enim id uirtutis non est, sed potius immanitatis, omnem humanitatem repellentis.* MAR. At ego respondeo, nò de omni elatione animi loqui Ciceronem, sed de certa quadam duntaxat: & quidem de ea quæ vitiosa sit. C A. Sed innuit interim Cicero vitium hoc illi animi elationi plerunque innasci: perinde ac si diceret (ea sermonis forma vtens qua paulo pòst) Sed illud odiosum est in ea elatione animi quæ cernitur in periculis & laboribus, quòd plerunque iustitia vācat, pugnâtque non pro salute cōmuni, &c. Ita enim ipse paulo pòst de eadem loquitur, *Sed illud odiosum est quòd in hac elatione & magnitudine animi facillimè pertinacia & nimia cupiditas principatus intrasitur. Vt enim apud Platonem est, omnem morem Lacedæmoniorum inflammatum esse cupiditate vincendi: sicut quisque animi magnitudine maxi-*

me excellit, ita maximè uult princeps omnium esse, uel potius solus esse. Difficile autem est, quum præstare omnibus cõcupieris, seruare æquitatem, quæ est iustitiæ maximè propria. Atq; his subiungit quæ omnino à facilitate (quam cum animi altitudine vis esse coniunctam) abhorrent, Ex quo fit ut neque disceptatione uinci se, neque ullo publico ac legitimo iure patiantur. Quid? quum hæc legis, non tibi videris audire quod de Achille canit Horatius, illum iura sibi nata esse negare, atque armis nihil non arrogare? Sed ipsum Horatii locum afferam,

—honoratum si fortè reponis Achillem,

Impiger, iracundus, inexorabilis, acer,

Iura neget sibi nata, nihil nõ arroget armis.

Vide quàm procul à facilitate illa quoque altitudo animi Achillea abfuerit. Nisi fortè in Achille altitudinem animi non vis agnoscere. MAR. Elationem animi potius quàm altitudinem illi tribuendam esse censerem. CA. At ego animaduerti elatum animum & altum à Cicerone sensu eodem appellari: & quemadmodum hîc de animi elatione loquutus, non multo pòst virorum fortiũ & magnanimorum mentionem facit: ita in illo de quo nunc disceptamus loco, quum hæc duo iunxisset, magnanimum & fortem virum, statim altitudinis animi mentionem

facit, prius tamen facilitatis. M A R. Aliquid aliud sit hæc altitudo animi necesse est, quæ cum facilitate ab eo copulatur. C A M. Imo non ipse Cicero hæc copulat, sed tuus Nizolius, qui hæc idem valere dicit. M A. Nonne hoc est copulare, dicere, Facilitas & altitudo animi? C A. Quid? nonne hæc copula longè diuersa aut etiam contraria coniungere potest? an si Cicero diceret, Humanitas & crudelitas, à Cicerone humanitatem & crudelitatem copulari, tanquam res eiusdē generis, existimares? Legimus apud Nasonem *pius & sceleratus*: an putas illum hæc tanquam vllam affinitatem habētia, simul ponere? & quidem quauis *eodem facto*, addat? Canit enim initio libri Metamorph. tertii,

*Quñ pater ignarus natā perquirere Cadmo
Imperat, & pœnam, si nō inuenerit, addit
Exilium: facto pius & sceleratus eodem.*

Canit idem lib. eiusdem operis nono,
-ultusque parente parentem

Natus, erit facto pius & sceleratus eodem.

Quid? an ideo *pius & sceleratus* idem valere dicemus? F A. Nemo, cui alii quàm Nizoliani sint oculi, ad diuersa referri hæc duo non videat, etiamsi copula illa & coniungatur. At Nizolius si ita cōiuncta hæc à Cicerone inuenisset *pius & sceleratus*, idem for-

tasse quod de aliis multis, licet significatio-
nem valde diuersam & fere contrariam ha-
bētibus, dixisset, rem vnam atque eandem
vtroque declarari. C A. Quid si igitur ista,

-scelus est pietas in coniuge Tereo,

in suo Cicerone legisset? an scelus idem es-
se quod pietatem dixisset? F A. Quidni? M.
Siccine de Nizolio, tanquam de homine in-
sano, loqui vos nihil pudet? in his quidem
certè manifestissimum est discrimen: hæc
ad diuersa referri patet: ideóque nec horum
nec talium vocabulorum vllam esse affini-
tatem dixisset. C A. At ego non minus alti-
tudinem animi & facilitatem ad diuersa re-
ferri dico, etiamsi minus diuersæ sint harū
quàm illarum vocum significationes. M A.
Ostende quomodo ad diuersa referri pos-
sint. F A. Totus locus est legendus atq; at-
tentè considerandus. C A. Eum simul & le-
gamus & expendamus. F A. Ne tu eum no-
bis recitare graueris. C A. Non grauabor e-
quidem. Nec uerò audiendi qui grauiter irascen-
dum ininiciis putabunt: idque magnanimi & for-
tis uiri esse censebunt. nihil enim laudabilius, ni-
hil magno & præclaro uiro dignius placabilitate
atq; clemētia. Paulo altius enim reperendus
fuisse videtur locus, vt facilius mens Cice-
ronis in his quæ sequuntur posset perspicui:
In liberis uerò populis, & in iuris æquabilitate,

exercēda etiā est facilitas & altitudo animi quæ dicitur, ne, si irascamur aut intēpestivè accedentibus, aut impudenter rogantibus, in morositatem inutilem & odiosam incidamūs. MAR. Quomodo negare potestis quin facilitas & altitudo animi eodem referantur? C A. Sine me paulo vltius pergere, antequam tibi respondcam: Et tamen ita probanda est mansuetudo atque clementia ut adhibeatur reip. causa severitas: sine qua administrari ciuitas non potest. Quid iam ais Marce? hæc quæ de severitate dicuntur, nōne tibi ad altitudinem animi pertinere vidētur? nōne Ciceronem, quod facilitatem vocauerit, nunc mansuetudinē atque clementiam appellare? MAR. Asséquor iam quæ tua sit hoc de loco sentētia: sed vide annon Cicero, si eius hæc mens fuisset, ita potius loquutus esset, Exercenda etiam est facilitas & altitudo animi quæ dicitur: ne, si irascamur aut intempestivè accedentibus, aut impudenter rogantibus, in morositatem inutilem & odiosam incidamus: aut, si nullam severitatē adhibeamus, administrare ciuitatem non possimus. C A. Tunc quidem apertius (fateor) esse potuisset, altitudinem animi ad severitatem respectere: sed sicut ab aliis scriptoribus, sic & à Cicerone nonnunquam, orationis, quæ alioqui vniformis manere posset, mutari formam

mam non ignoras. M A R. Quod tamen respondes ad id quod tibi oppono, non mihi satisfacit. Ac miror certè cum animi altitudine facilitatem siue mansuetudinem & clementiam non tibi videri posse coniungi. C A. Imò verò, si hoc negem, ipsi etiam Platoni repugnem. apud eum enim legimus libro De legibus quinto, διὸ δὴ θυμοειδὴ παρέπειν καὶ παρ᾽ οὖν φαρμὰ ἐκάσπε ἐστὶν δεῖν πὺν ἀγαθόν. Sed & paulo antè dixerat, θυμοειδὴ ὡς δὴ καὶ πάντα αἰσθῆσαι ἐστὶν, παρ᾽ οὖν δὲ ὡς ὅτι μάλιστα. Postquam autem illis subiunxit ista, τὰ γὰρ τῶν ἄλλων χαλεπὰ καὶ δυσίατα ἢ καὶ παρ᾽ ἄλλων αἰσθῆσαι αἰσθῆματα οὐκ ἔστιν ἄλλως ἐκφυγεῖν, ἢ μαχόμενοι καὶ ἀμυνόμενοι νικᾶντα, καὶ τὰ μηδὲν αἰεῖναι κολάζονται, addit, hoc non posse fieri nisi ab eo animo cui insit θυμὸς γενναῖος, id est, generosa quædam iracundia. Τὸ πο δὲ (inquit) ἀνδρὶ θυμοῦ γενναίου ψυχὴ πάντα ἀδυνάτως δρᾶν. Vbi simul etiā observare debemus quid vocet hominem θυμοειδὴ. Quemadmodum verò hîc, postquā pœnas severè irrogandas esse scripsit, addit, hoc fieri nullo modo posse nisi adsit θυμὸς γενναῖος: ita etiam, antequam diceret oportere bonum virum esse etiam θυμοειδὴ, dixerat, πᾶσι δὲ ἀκράτως καὶ ἀπαρσυσπῆκτως πλημμελεῖ καὶ κακῶς ἐφίεναι δεῖ τὸν ὀργιῶ. Cur verò clementem simul esse oporteat, ostendit. F A. Non absimile vero est, Ciceronem, quū illa quæ

H.j.

recitasti, scriberet, ad hunc Platonis locum respexisse. C A. Mihi quoque fit verisimile: hæc quidem certè quæ proximè sequuntur, *Omnis autem et animaduersio et castigatio contumelia uacare debet, neque ad eius qui punit aliquem, aut uerbis castigat, sed ad reipubl. utilitatem referri*: hæc, inquam, ex illo philosopho sumpta esse, affirmare propemodum ausim: ac præsertim eam huius loci partem qua dicitur, omnem animaduersionem & castigationem debere contumelia uacare. Verùm ut nostræ tecum disceptationi finem tandè imponam, Marce, tantum abest ut cum altitudine animi coniungi posse facilitatem, siue mansuetudinem & clementiam, negè, ut Platonem quoque eiusdem coniunctionis tanquam necessariæ mentionem fecisse ostèdam. Sed longè aliud est, dicere cū Platone & Cicerone, dandam esse operam ut animi altitudo facilitate temperetur (quod temperamentum paucis à natura datur) aliud, cum Nizolio dicere, idem esse facilitatem quod animi altitudinem. Postquam enim (vti iam docui) dixit humanitatem esse idem quod facilitatè, addit etiam (nonnullis interiectis) altitudinem animi.

M A R. Si nobis Ciceronianis barbaros etiā scriptores citare testes fas esset, cuiusdā locum afferrem quo tibi statim silentium im-

ponerem. F A. Quos obsecro barbaros scriptores Ciceroniani Nizoliani vocatis? C A. Nescis, vt olim barbaros Græci omnes populos præter se appellabant, ita etiam Ciceronianos Nizolianos, scriptores omnes præter suum Ciceronem, barbaros vocitare? F A. Hoc nunquam audieram. C A. Sed nos tibi iurisiurandi tui gratiam faciemus: vel potius defendendi tui Nizolii ardens studiū gratiā eius tibi facit. simul etiā nos iureiurādo adigere potes, hoc nō esse prodituros, te aliquē ex barbaris scriptoribus testē produxisse. M. Profer igitur Liuiū. apud eum enim locus est quidam vbi altitudo animi cum modestia & æquitate coniungitur. C A M. En tibi Liuium. F A. Putāsne te facile locū esse inuēturum? M A R. Imò iam est inuentus. audite. F A B. Repete paulo altius. M A R. *Fuentus eorum comitiorum docuit, alios animos in contentione libertatis dignitatisque, alios secundum deposita certamina incorrupto iudicio esse. tribunos enim omnes patricios creauit populus, contentus eo quòd ratio habita plebeiorum esset. Hanc modestiam æquitatēque & altitudinem animi ubi nunc in uno inueneris, quæ tum populi uniuersi fuit?* C A. Video cum modestia æquitatēque altitudinem animi Liuium coniungere: sed quid hinc probaturū te speras? M A. Facilitatem quoque cum al-

H. ij.

titudine animi rectè coniungi. C A M. Quis hoc tibi negat? harum rerum coniunctionē si reprehenderem, non ipsum tantum Ciceronem sed Platonem etiam (vt apparet ex eius verbis quæ protuli) reprehenderem: sed tanquam eadē cōiungi, illud verò est quod nego & pernego. ac miror certè eadem tibi toties esse inculcanda. M A. Nōne verò sicut hīc altitudo animi & modestia atque æquitas, tanquam eadem, coniunguntur, ita etiam altitudinem animi & facilitatem, tanquam eadem, aut saltem penè eadem, coniungi, dicere liceat? præsertim quū modestia & æquitas aliquam cum facilitate cognitionem habeant? C A M. At ego nihilo magis de illa apud Liuium quàm de ista apud Ciceronē coniunctione tibi assentior. nam vt Ciceronem in facilitatis appellatione aliò respicere dixi quàm quum adderet altitudinē animi, ita etiam à Liuiio eodē respici nego, quum modestiam æquitatēque & quum altitudinem animi dicit. altitudinē enim animi in illa adeo acri contē-tione libertatis dignitatēque, modestiam verò & æquitatem in eo spectandam proponi aio, quòd tandē, depositis certaminibus, tribunos omnes patricos crearet populus, contentus eo quòd ratio habita ple-

beiorum esset. F A B. In hoc tam longo de humanitate & facilitate sermone (ab humanitate enim ad facilitatem transimus) tua humanitate facilitatèq; abusus est Marcus, qui te toties eadem sibi de locò illo inculcare coegerit: ne verò eandem tibi in hoc Liuiano molestiam exhibeat, ab hac Nizoliana humanitate (quæ idem sonat quod altitudo animi) ad aliam quampiam eius virtutem nos proripiamus. C A M I L. Visne; tanquam à specie ad genus transeuntes, Iustitiam illius examinemus? F A B. Volo. Verùm licebitne tibi per Ciceronianos Humanitatem ad Iustitiam, tanquam speciem ad genus, reuocare? C A M. Quidni? videmus enim à Cicerone Lenitatem ad illam reuocari. F A. Sed Lenitatem eam quæ in moderatione animaduertendi versatur. C A. Hoc scio. quid tamen prohibet quin & eam quæ aliis in rebus positâ sit, eodem, etiamsi minus propriè, referamus? F A B. Nihil, ut opinor. Quinetiam Comitatem adiungit Iustitiæ idem scriptor, De fin. lib. quinto, ibi enim de Iustitia loquutus, addit, *Cui adiunctæ sunt, Pietas, Bonitas, Liberalitas, Benignitas, Comitas, quæque sunt generis eiusdem.* C A. Audi igitur quid Nizolio sit I V S T I T I A. Primum quidem est *AEQUITAS*, deinde *IUS*, *FAS*, *Iustum*. Quid tu de his dicis? F A. Quid aliud

quàm esse verè Nizoliana? Nam vt ab hac voce AEquitas initium sumam, ipse Cicero non idem esse dicit quod Iustitiam, sed esse Iustitiæ maximè propriam: quum De offic. lib. I, scribit, *Difficile autem est, quum prestare omnibus concupieris, servare aequitatem: quæ est iustitiæ maximè propria.* Quomodo verò Ius & AEquitas idem valere dici possunt, quum hæc passim distingui videamus? M. Sed videndum est an à Ciceronianis quoque distinguantur. F A. Ciceronianos nihil moror: ab ipso autem Cicero distingui sat scio. M A R. Ipsa Ciceronis verba mihi proferri velim. F A B. A te verò mihi spatium ad cogitandum velim dari. C A. Recordor ipse cuiusdam loci qui est in oratione pro Cæcinnæ, *Ex æquo & bono, non ex calido versutoque iure rem iudicari oportet.* M A R. At ego locum hunc esse testem ἀξιόχρεως nego: nō quòd AEquum & bonum idem quod AEquitatem valere non putem: sed quoniā Ciceronem non Ius ἀπλῶς, sed Ius callidum versutumque ei opponere video. F A. Εὐρίχρησται, quòd mea mihi repentè memoria locum alium suppeditauerit. Iam enim recordor à Cicero dici alicubi *Pro æquitate contra ius dicere.* C A. Irridebit Marcus vel potius subsannabit tuum illud Alicubi. F A B. Quid? tuum verò istud Subsannabit an san-

na non excipiet? C. A. Nihilò certè in tuam Sannam erit æquior. nihilò enim magis est Ciceronianum Sanna quàm Subsannare. F. Præueniamus quæso illius irrisiōē, quod ad meum illud Alicubi attinet. Iam enim recordor locum illum in vno ex libris De oratore extare. tu paginas quæ à læua sunt percurrere, dū ego quæ sunt à dextra percurrā. C. A. Non recuso. F. A. Εὐτόχως iterum. statim enim in locum illum incidi. Audiat igitur noster αἰνέσιμος, Galba autem alludēs *uariè & copiose, multas similitudines asserre, multaque pro æquitate contra ius dicere.* Quod si fortè cōtentus his nō fuerit, tres paginas præcedentes, tres quoque sequētes legere & religare ei per me licebit. C. A. Obmutescit nunc quoque Marcus. F. A. Quid si verò locum etiam proferam qui Nizolium in kūc errorem impulit? C. A. Te non tātum semel atque iterum, sed tertium etiam ἀντιπαράδειξω dicam. F. A. Statim igitur dicendum tibi erit. nam hic ipse est (qui quidem in eodem libro extat) *Nam uolūtare in foro, habere in iure ac prætorum tribunalibus, iudicia priuata magnarum rerum obire, in quibus sæpe non de facto sed de æquitate ac iure certetur, iactare se in causis centumuiralibus, &c.* Aliquam certè huius ipsius loci partem ipsemet Nizolius affert, (pro certetur scribens *queritur*, sed per

imprudentiam fortasse) ita ut lectum ab eo esse negari non possit. Quum autem in eo videret ablatiuo *iure* subiungi ablatiuum *equitate*, interiecta coniunctiua vocula *ac*, suam illam cuius antea memini regulam tenens, pro synonymis illos habendos censuit. Fieri verò potest ut in aliū quoq; aut etiam in alios eiusdem scriptoris locos inciderit, ubi horum nominum vnum alteri eodem subiunctum modo inuenerit. C A. Possum certe, & quidem ἀκολακίπως, dicere te Ἀπρχία. Sed in reliquas nominis Iustitia expositiones Nizolianas non inquiremus? F A. Inquisitione nō est opus. nam & ipse Marcus sibi manifestum esse dicet (ut opinor) aliud esse Iustitiam, aliud, Fas. Quinetiam aliter Iustitiam, aliter Iustum dici, idem fatebitur. C A. Quid si verò Iustum Nizolius intellexit dictum more Græcorum, qui τὴν δικαιοσύνην vocant interdum τὸ δίκαιον? sicut τὴν ἀδικίαν appellant τὸ ἄδικον? itidemque τὸ σὺφρον dicunt, τὸ σὺφροσύνην volentes significare? quinetiam aliis quibuslibet adiectiuis eodem uti modo sibi permittunt? F A B. Gaudeo non audiuisse ista Marcum. tibi enim irasceretur, tanquam apertè Nizolium nunc quoque irridenti. C A. Vísne ad aliam virtutem accedamus? F A. Quidni velim & peruelim? sed nos in examinandis vllius vocis expositionibus nolim posthac

tamdiu immorari. C A. Animo tuo obsequar. nunc aurem Nizolio cōmoda. T E M P E R A N T I A, *Modestia, Moderatio, Frugalitas, Conformatio & moderatio continentiae & temperantiae.* F A B. Quid hoc sibi vult? dicere Temperantiam esse Conformationem & moderationem temperantiae? Nōne perinde est acsi dicerem, Iustitiam esse Conformationem iustitiae? C A. Interrogandus fuerit potius noster Marcus. M A R. Omittis genitium Continentiae. dicit enim Conformationem & moderationem continentiae & temperantiae. F A B. Mauis igitur dicam perinde esse acsi Iustitiam definirem Conformationem æquitatis & iustitiae. M A R. Atqui Cicero Conformationem continentiae & temperantiae dixit, non item Conformationem æquitatis & iustitiae. F A. Scio apud Ciceronem illa non item hæc verba extare: sed Ciceronem illis verbis definire aut exponere voluisse nego Temperantiā, ac nihilo magis illis Temperantiam quàm his Iustitiam definiri exponi posse dico. C A. Quod verò est tuum de tribus primis expositionibus iudicium? F A. Non possum eas non probare: quum sumptæ sint ex Cicerone. C A. Is tamen alibi Modestiam aliud quiddam esse vult. F A B. Ideo monere debuit Nizolius lectorē, illi nomini inter-

dum eandem significationem tribui, quum alioqui plerunque aliam, aut aliquantū saltem diuersam, habeat. Ne ipsum quidē certē Cicronem ita frequenter Modestiae appellatione vsum esse puto, atque vbiq; vsus sit, aliquid adiunxisse puto quo auditor siue lector moneretur talē esse ibi eius significationē. Sed locus nobis est adeundus, Tuscul. quæst. lib. tertio, & tertia (si bene memini) pagina à principio, illius quidē quam modo in manibus habui editionis. C A. Iam ad illum perueni. F A. Recita igitur. C A. *Ver simile etiam illud est, qui sit temperans: quem Græci σωφρονα appellant. eāq; uirtutem σωφροσύνη uocant. quam soleo equidem tū Téperantiam, tum Moderationē appellare: nōnunquam etiam Modestiam. Sed haud scio an rectē ea uirtus Frugalitas appellari possit.* F A. D. Hæc verba, *nōnunquam etiam*, confirmant id quod dixi. Ad frugalitatem verō quod attinet, de eo non dubitauit Nizolius de quo dubitare se ostendit Cicero, quum dixit, *Haud scio an rectē ea uirtus Frugalitas appellari possit.* Quauis enim non ignorem talem vsum esse horū verborum *Haud scio* idēque verbi *Nescio*, apud Ciceronē, nō potius sint arbitrantis rem ita se habere, quàm non arbitrantis: tamen ita loqui, nemo dixerit esse aliquid planē affirmare. Ex-

enim ne is quidem qui ita loqueretur, Eam virtutem rectè frugalitatem appellari posse arbitror, ita posse appellari affirmaret. Nihilò certè magis quàm si Græcè loquens diceret, μήποτε δὲ δωατόν ηἴ. C A. Cur Nizolium miraris de eo non dubitasse de quo dubitauerit Cicero? nōne multo audaciorē Cicerone fuisse in iis quæ ad linguæ Latinæ consuetudinem pertinent, (si tamen Ciceronem appellare audacem fas est) plurimæ iam obseruationes vel potius expositiones illius te docuerunt? M A R. Nunc saltem, dum nobis est de virtutibus sermo, maledicam istam linguam comprimere oportuit. C A. Itane verba illa mea maledicetiam interpretaris? M A R. Ita interpretor. F A. Morosior est nunc Marcus, & quidem ideo fortasse quòd inter virtutes versari quodāmodo sibi videtur. C A. Missas igitur virtutes faciam: simulque huic inquisitioni in expositiones eorum nominum quæ grammatici substantiuā vocant, valedicā: & ad eas quæ ab eodem obseruatore dantur nonnullis adiectiuis (vt iidem vocant) me conferam: si vnicum ex altero illo ordine addidero. F. Quódnam illud est? C A. *Spes*. Audi enim, obsecro, audi, inquā: si ridere libeat. S P E S, *Fiducia, Expectatio, Cogitatio, Firmamentū, Persugium, Aurā, Alacritas, Lux, Cupiditas*. F A B.

Ne ipse quidem Marcus Nizolio hîc assentitur, quantum ex eius vultu colligo. ideo minimè hîc est vllâ refutatione opus. C A. Liceat mihi, antequam de nominibus huius classis dicendi finem faciam, aliud etiâ quoddam addere: vt ad philosophiâ quoque pertinentes quasdam expositiones, tâquam colophonem illi adiiciam. F A. Per me licet. C A M. A E R, Cælū, Anima, Spiritus, Aether, Iupiter. M A R. Scio vobis hoc, inter alia mirū visum iri, quod idē vult esse Aetherē quod Aerem. F. Cui verò mirum non videretur? M A R. Quid si autoritate Ciceronis illum defendam? F A B. Dicam te defensionem plusquam παραδόξον attulisse. Aether (inquit Cic. sec. De nat. deorum lib.) qui constat ex altissimis ignibus. Mutuemur hoc quoque uerbum: dicaturque tam Aether Latine, quam dicitur Aer. F A B. Quid iam de Marco dicemus, Camille? nōne ipsummet velle iam suum Nizolium, qui ab hoc loco deceptus fuerit, irrideri? M A R. Imò nihil tale cogitans hunc locum protuli, sed ab eo ipsemet deceptus fui. C. Veniam igitur tibi dabo, & ad illa alterius classis nomina veniam. Initium autem à nomine Certus sumam. C E R T V S, Non dubius, Non incertus, Compertus, Exploratus, Minimè dubius, Definitus: & paucis interiectis, Quod manu tenetur, vel in manibus

habetur. F A. Erravit profectò multis in locis Cicero, errarunt cum Cicerone omnes Latini scriptores si id demum Certum dici debet quod manu tenetur, vel in manibus habetur. C A. Video Marcum hîc sui Nizolii pudere: aliò transeamus, ne maiorem illi pudorem incutiamus. C O N S T A N S, *Firmus, Stabilis, Grauis, Præsens, Perpetuus, Cōueniens, AEquabilis, Moderatus, Singulari constantia præditus.* F A B. Hîc quoque, vt opinor, Marcum Nizolii pudet. C A. Aliud igitur proponam. C L E M E N S, *Lenis, Mitis, Mansuetus, Misericors, Humanus, Liberalis.* F A. Quid hîc agit Liberalis, Marce? Nimia certè fuit Nizolii in exponendo hoc nomine liberalitas: alioqui illud Liberalis non addidisset. M A R. Miror certè cur addiderit. C A M. Nō minus miraberis, eum vocem Liberalis vicissim exposuisse illa Clemens. Vîsne locū proferam? M A R. Tibi fidem habeo, & me nō minus mirari dico. C A. M O D E S T V S, *Commodus, Sui cognoscens.* F A B. Hîc quoque Nizolianum ingenium agnosco. & Marcū hîc quoque pudet: subpudet quidem certè. C A. Faxo vt illum non subpudeat, sed dispudeat. P A R V V S, *Puillus, Exiguus, Modicus, Brevis, Angustus, Tenuis, Minutus, Mediocris, Modica magnitudine.* Quid hoc est, obsecro, Mediocris cum Paruus confundere,

nisi mediocritatem ignorare, aut è rerum natura tollere? F A. Noli pluribus hanc expositionē exagitare: ne Marcum hinc exigas. non vides quantus rubor eius pudicitia sit consequutus? C A. Quid ais? F A B. Rogo ánnon videas quātus rubor pudicitiam eius sit consequutus. C A. Quid tu pudicitiam vocas? F A B. Pudorem. C A. An verò Latinè tibi loqui videris? F A B. Nizolianè saltem loquor. C A. An hæc duo nomina vnum idémque ait significare? F A. Ait. Sed non videris mihi fidem habere. lege ipse. c. *Pudicitia, Pudor.* F A B. Quòd si pudicitia nihil aliud est quàm Pudor, rectè profectò sum loquutus. C A M. Si quidem Nizolianè loqui, sit rectè loqui. F A. Visne hoc tibi demonstrè syllogismo quo nullus *ἀναλεκτικός* inueniri possit? C A M. Volo. F A. Qui Nizolianè loquitur, Ciceronianè loquitur: Qui autem Ciceronianè, is rectè: Qui ergo Nizolianè loquitur, is rectè loquitur. C A. Sed nego tibi propositionē tui syllogismi, eum qui Nizolianè loquatur, Ciceronianè loqui. F A. Contra negantem principia nō est disputandum. Fierine potest vt Ciceronianorum deus (quod ad Ciceronianismū attinet) non sit Ciceronianus? M A R. Non lubenter hos *χλευασμοὺς* audio. C A. Refero me igitur ad illorū nominū adiectiuorum

expositiones. P O P U L A R I S, vulgaris, De populo, Ciniis, Municeps, Plebicola, Incundus & gratus populo, Seditiosus. F A B. Hoc in pleiisque Observationum Nizolii locis obseruavi, eū expositionibus inauditis (& quæ verè *δαυδάστα ἀνεύσηματα* possint appellari) locum ultimū tribuere. quod & hīc fieri videmus in voce Seditiosus. de qua nōne tu idem sentias Marce, scire percipio. M A R. Inauditam esse mihi hanc expositionem fateor. sed quæcunque mihi sunt inaudita, nō protinus improbare soleo. F A B. At ego non dubito quin populares tui statim improba tui sint hanc expositionem, qua popularis dicitur inter cætera significare seditiosum. M A R. Quos tu meos populares vocas? F. Ciceronianos Nizolianos. M A. Video hīc inter locos Ciceronis qui afferuntur in aduerbio Populariter, quendam vbi Seditiosè & Populariter ab illo coniunguntur. F A B. Idipsum vides igitur quod Nizolium in errorem impulit: si meministi eorū quæ paulo antè diximus. ex illis enim patet cum solere ad hunc lapidem offendere. C A. Quid verò Ciceroniani Nizoliani dicent de suo Nizolio nomen *sanus* nomine *salubris* siue *saluber* exponente? F A. Quid aliud, quàm non satis esse sanum qui vocem Sanus ita exponat? C. Atqui sacrilegam suam linguā

existimarent, si ita aduersus deum suum loqueremur. M. Apage istam dei appellationem. potius certè Ciceroniani Ciceronē ipsum pro deo suo haberēt, quod ad sermonē Latinum attinet. C. At nos de Ciceronianis Nizolianis loquimur. M. Sed ipsum Nizolii locum videamus. C. S A N V S, *Firmus, valens, validus, salubris, saluus, &c.* Neque verò contentus fuit tam pulchram expositionem vno in loco ponere: sed vt GIZCO obtemperaret prouerbio, *δὲς ἔπ' ἑὸς πικρὸν*, alium etiam locum ei inuenit. namin adiectiuo I N C O R R V P T V S, postquā posuit *Integer, Purus, Inuiolatus*, duo illa tanquam synonyma affert, *sanus, saluber*. Sed hīc recordatus sum & cōtrarii *Insanus*, quo Nizolius nomen *Magnus* exponit. Eamus in rem præsentem. M A G N V S, *Amplus, Grādis, Non mediocris, Non parvus, Vberior, Bonus, Latè patens, Immanis, Infinitus, Vastus, Insanus, Longè latèque patens*. Quem tu hīc locū habere vocem illam *Insanus* dicis Nizoliane? F. Quidnam obsecro vel ab eo, vel ab eius popularibus (vt antea illos vocasti) responderi posset? C. At ego respōdebo saltē quid Nizoliū deceperit. Recordabatur ille Ciceronem dixisse *Infanas* substructionū moles pro magnis: (magis propriè tamen exponitur *Ingentes*) ideo quicunque

Magnus

Magnus esset, visus illi est posse dici Infanus. F A. At de illo adiectiuo Bonus quid boni habes quod dicas? C A. Nihilo certè magis quicquam boni de hac expositione quàm de illa possum dicere: sed idem saltē hic quod illic faciam, vt quid Nizolium mouerit ostendam. Legerat ille apud Ciceronem Bonam partem, volentem significare Magnam: itidem igitur quicumque Magnus esset, visus illi est posse appellari Bonus. F A B. Antea vicem eorum dolebam qui magni essent, quòd insanos à Nizolio vocari viderem: nunc illis inuideo quum ab eodem bonos dici video. Mirum autem est illum existimasse ita vocabula *αἰνσπέφειν*, quod ad significationes attinet, vt si Infanus pro magno dicatur, vicissim etiam Magnus pro infano: si Bonus pro magno, vicissim Magnus pro bono liceat dicere. Iam autem perinde loquor ac si verum illud esset, nomina ista Infanus & Bonus pro magno posse vbiq; poni. C. Nónne optimā rationē locupletandæ Latinæ linguæ inuenisse tibi videtur Nizolius? F A. Imò facillimā quidem, sed pessimā & periculosissimam. C A. Mirum est illum Magnus nō exposuisse etiam Maximus. ita enim sæpe positiua (vt grammatici vocant) superlatiuis exponit. M A R. Sed id non facit eadem voce v-

tens. C A. Nō recordor loci cuiusquam vbi voce eadem vtatur (volo enim verum fateri) sed quorundam vbi positiua vox superlatiuo nomine exponitur: quum tamen hoc ipsum absque superlatione multo plus significet quàm illa in gradu superlatiuo queat significare. M A R. Nō assequar quod dicis, nisi exēplū proferas. C. In promptu est. INCONSIDERATVS, *Inconsiderans, Inconsultus, Amentissimus*. Nunquid non solum Amentissimus, sed etiam Amens, plus est multo quàm Inconsideratus? M A. Iam intelligo quid velis. C A M. Quinetiam eius quod nullo à me exemplo posse nunc confirmari dixi, nunc mihi exempla duo suppetunt. Quum enim *Familiarem* dici ait Qui in intima familiaritate alicuius versatur, nonne perinde est ac si diceret *Familiarem & Familiarissimum* vnum eundemque esse? Itidemque quum Cōstantem esse dicit Qui singulari constantia est præditus, nonne videmur nobis audire Cōstantem dici etiam Constantissimum? M A R. Imò certè multo hæc durius dicerentur, quàm illa sint dicta. Fateor alioqui non debuissè Nizolium talia quæ aliud potius sunt quàm expositiones, expositionibus admiscere. F A. Quid aliud noui ex Africa? C A. Méne, an Marcum, hoc sciscitaris? F A. Hui, quasi me de Africa

Nizoliana loqui non intelligas, ex qua tot iam monstra protulisti. Quidni enim monstra vocemus quæ ibi sunt naturæ Latini sermonis omnino repugnantia? C A. At ego de Thracia cogitabam. F A. Quid verò tibi nunc cum Thracia? C A. Eò tandem cogitationem meam expositio quædam Nizoliana adduxit, vel pertraxit potius. F A B. Dic fodes quænam illa sit. C A. Si modò cū bona Marci venia eam proferre liceat. F A. Pro Marco spondeo. C. Audi igitur. S A N G V I N A R I V S, *Thrax*. Quam, obsecro, nobis expositionis huius rationem redditurus est Marcus? F A. Non tenetur Marcus quilibet Nizolii imaginationem præstare. C A. Interim verò tibi excidit vocabulū cui Marcus nigrum theta præfiget, utpote longè à Ciceroniana Latinitate remoto. F A. Imò verò prudens sciensque illo sum vocabulo usus, quum minimè Ciceronianū esse haud ignorarem, & pro eo Ciceronianos Cogitationem dicere nescius non essem. C. Cur non potius hoc quàm illo usus es? F. Quoniam quod animo conceperam, ita exprimere volebam ut statim intelligerem: quod mihi nequaquam assequuturus videbar si cogitationis appellatione vterer. ac penè ausim dicere, Ciceronem ipsum, si meo loco fuisset, aliam ad id exprimendum quæsi-

turum, aut Græcè *φάρτασίαν* dicturum fuisse.
 C A. Vt facilius excusatum te habeat Mar-
 cus, vel potius vt tibi tantum *παισμα* con-
 donet (neque enim quæ allegas, *ἀπαισι* te
 apud illum efficient) partes eius in reddenda
 illius expositionis ratione suscipito. F A.
 Suscipiam quidem illas: sed vereor vt susti-
 nere possim. Sed *μαρτίαν* meam saltem pro-
 feram. C A. Quidnam igitur tibi de illa a-
 nimus *μαρτυέται*? F A. Nizolium, quum San-
 guinarium diceret eum esse qui alibi *Thrax*
 appelletur, vel potius Sanguinariū & Thra-
 cem, vnum atque idem significare, ad locū
 quendam Ciceronis respexisse qui legitur
 in oratione De prouinciis consularibus, vt
rex Ariobarxanes consulem uestrum ad cædem
faciendam, tanquam aliquem Thracem, conduceret.
 C A. Fortasse verò & ad alium respexisse
 locū dici potest, in quo myrmillonis Thra-
 cis à Cicerone fit mentio. F A. Quis ille est
 locus? C A. Ex quadam Philippica, vt qui-
 dem testatur Nizolius. apud eum enim le-
 gimus, *Cic. I. A. Myrmillo Thrax.* F A. Illius
 etiam loci recordor: ideòque falli Nizoliū
 scio, qui de Thrace dicat quod à Cicerone
 de Antonio dicitur. Cedo mihi volumen
 Orationum Ciceronis. C A. Illi tuus cubi-
 tus innititur. F A B. In sexta Philippica esse
 puto, non procul à fine. Vísne repetā paulo

altius? C A. Quidni? In foro L. Antonij statuum
 uidemus, sicut illā Q. Tremellij, qui Hernicos de-
 uicit, ante Castoris. O impudentiam incredibilē.
 tantūmne sibi sumpsit, quia Mylasis myrmillo
 Thracem iugulauit, familiarem suum? Intelligit
 enim, Antonium in gladiatoria pugna (nā
 cum, sicut myrmillonem, alibi etiam, ita &
 gladiatorem appellat) Thracem familiarē
 suum iugulasse. At Nizolius, non animad-
 uertens dici *myrmillo* pro *Quum* esset myr-
 millo, (perinde ac si Græcè diceretur *μονομά-
 χος*, subaudito participio *ῶν*, vel vnica uten-
 do voce, diceretur *μονομαχῶν*) scripsit *myrmil-
 lo* *Thrax*, ut quem Cicero dicit iugulatum
 esse, sit is qui iugulauerit. C A. Vide Marce
 quantum fidei tuo Nizolio vel in proferē-
 dis Ciceronis locis sit adhibendum. M A R.
 Hoc à te expectabam Camille. sciebā enim
 te quoduis potius vadimonium deserturū
 quàm hanc quoque exagitandi Nizolii oc-
 casionem prætermisurum. F. Nunquāme
 altercari desinetis? tu potius Camille quo
 cœpisti pede pergito. M. Ego verò nolim
 eum quo cœpit pede pergere: quoniam in
 multis non mihi visus est ὀρθοπεδεῖν. F. Quid
 ita? M A. Quoniam qui accusationi suæ vel
 accusationibus suis calumnias admiscet, nō
 videtur mihi ὀρθοπεδεῖν, sed poti⁹ σκολιοπεδεῖν,
 ut ita dicam. C. Itāne calumniator à te au-

dio? M. Audire potes, si aures tuæ suo funguntur officio. C. Vbi me calumnianteprehēdisti? M A R. Vel in eo quod modò de mala Nizolii fide dixisti. scis enim illum minimè lectionem eam quam in loco illo inuenerit mutasse, sed aliquod exēplar quod ibi deprauatum esset sequutum esse. C. Ego ne id vel scio, vel scire possum? nisi fortè mihi aliquid cum νεκρομαρτεία esse, commercii existimas. F. Ne ego quidem hoc scio. C A. Vult Marcus nos scire quod ne ipse quidē scit. Alioqui dicat ille qua in editione lectio illa quam Nizolius affert, reperiatur. M. Editionem qua vsus est non posse à me representari nosti: hoc te audaciorem reddit. F. Ne in illa quidem extare lectionem illam crediderim. sed tamē hoc demus propensæ Marci in Nizolium voluntati vt nos credere dicamus: & verbis illis vtamur quibus apud Platonem vtitur quidam, nos credituros esse, εἰ αὐτὸς κελύει. Tu iam perge Catulle, siue ὀρθοποδῶν, siue σκολιοποδῶν, vt Marcus nouè loquutus est. C. Ad aliam orationis partem transire statueram: verum id prius non faciam quàm nomē vnum adiectiuum superioribus adiecero, & nouum quoddam ac valde mirum expositionis genus in eo ostendero. F A. Lubenter nouum illud atque mirum expositionis genus au-

diam. C. M A L E D I C V S, *Obtrectator, Mor-*
dax, Petulans, Procaz, Habens aculeos, Perfrin-
go, Momus. F A. Video ubi sit illa nouitas. est
 sanè in eo quòd nomē *Maledicus* verbo etiā
Perfringo exponitur. Nisi autē à te præmoni-
 tus, nouam aliquam & inauditam exponē-
 di rationem expectassem, fideliter à te ver-
 ba Nizolii recitari vix mihi persuasissem.
 Sed quid (obsecro) agit hîc verbum *Perfrin-*
go? C. Interrogandus tandem erit Marcus:
 simûlq; quid agat verbum *Sequor* inter ex-
 positiones nominis *Causa* (neq; enim adie-
 ctiuis tātum nominib⁹ illa nouitas adhibe-
 tur) quū scribit, C A V S A, *Caput, Origo, Fons,*
Radix, Principium, Seminarium, Semen, Stirps,
Effector, Pignus, Ratio, Sequor, Nomen, Ergo,
Gratia, &c. Non enim minor & tibi (vt opi-
 nor) fuerit hîc de verbo *Sequor* dubitatio. F.
 Hoc saltem fatebitur nobis Marcus, talem
 expositionem expositione opus habuisse:
 huic, inquā, breui expositioni aliam adiun-
 gendam fuisse, & quidem non itidem bre-
 uem. C A. Quid si verò mysterium aliquod
 sub hac expositionis forma latet, quod pre-
 fanis, id est, illis qui Ciceroniani non sunt,
 minimè fas sit vulgari? F. Non equidem ab-
 simile vero est, *μυστηριώδη* esse hoc *sequor* &
 illud *Perfringo*. Quod si ita est, frustra Mar-
 cum interrogabimus. statim enim nobis in-

clamabit, — *procul ô procul este profani*. vel Græcè, — ἐκὰς ἐκὰς ἔστε βέβηλοι. C A. Reperio vicissim verbum *sequor* expositum duobus nominibus, *Consilium*, et *Ratio*: sed hîc mihi videor quodammodo Nizolianam καίπασιν assequi. F A. Imò eam non assequêris donec te Ciceronianitatis sacramento obligaveris. C A. Proh, quàm audax interim in fingendo nomine illo fuisti! an te hanc audaciam impunè laturum existimas, quum auditore habeas Marcum, virum Ciceronianissimū? F A B. Quid? an tibi magis impunè Ciceronianissimum quàm mihi Ciceronianitatē dicere licebit? præsertim quum ne Ciceronianus quidem vox sit Ciceroniana? C A. Apud Ciceronem extet Ciceronianus necne, nescio: sed etiamsi nō comperiretur hoc adiectiuo vsus, potuisse vti scio: quum Catonianus, quod huic omnino simile est, apud eum legatur. nam Catonianam familiam dixit in quadam epistola. F. Ego verò meam Ciceronianitatem autoritate duarum quæ apud illum sunt vocum tuebor, Appietatis & Lentulitatis. C A. Atqui hæc primū quidem non sunt à nominibus quæ eodem declinêtur modo (adeo vt hoc perinde sit ac si tibi Antonianus aut Cæsarianus, non Catonianus, protulisses) deinde verò Ciceronem nō αποδίδονται sed παίρνειν

iis esse ysum constat. F. Primùm quidem te
 nimium ad viuum has formationes (vt grā-
 matici vocant) refecare, deinde mihi quo-
 que iocari licuisse respondeo. c. Sed quid
 obsecro in mentem venisse Ciceroni dice-
 mus, vt illis Appietatis & Lentulitatis ap-
 pellationibus vteretur? F. Nunquam hæc
 animum meum subiit cogitatio: quanuis
 semper Ciceronē in illis vocabulis Cicero-
 nianitatis terminos prætergredi iudicaue-
 rim, c. Libetne verò audire quid ipse de il-
 lis cogitauerim? F. Quidni? c. Quum eo i-
 pso in loco vbi illis vtitur, mentionē Stoi-
 corum faciat, existimo ei subitò in mentem
 venisse quanta esset Stoicorum in fingendis
 huius generis vocabulis libertas, eamque si-
 bi in Latino sermone concedere semel vo-
 luisse. m. Suspiciatur quidem & Turnebus
 Ciceronem consuetudine Stoicorū illa no-
 mina fabricatum esse: sed non addit quod
 nunc à te adiicitur, quidnam ibi occasione
 imitandi Stoicos Ciceroni præbuerit. F. A.
 Gratulor tibi Camille, hanc cum tanto vi-
 ro tam bellæ coniecturæ societatem: præ-
 fertim quum tibi aliquid etiam amplius in
 mentem venerit quàm illi, ad eam reddendā
 omnibus verisimilem. c. Sed ego vos
 non celabo, esse quod vtriq; nostrū pos-
 sit obiici: nimirum multo esse audaciorem

illam Ciceronis quàm Stoicorum fabricâ:
 quum Stoici appellatiua ex appellatiuis tâ-
 tum formarent (cuiusmodi sunt, *μεγαλότης*,
καλότης, *εὐδολότης*, *χρηειότης*) at Cicero ex pro-
 priis etiam illa duo fingere sibi permiserit.
 Ignoscet autem mihi Marcus, vt spero, si ad
 grammaticam artem pertinētia grammati-
 corum verbis nomino. F A. Atenim videor
 mihi quædam ex eadem Stoicorum officina
 prodeūtia nomina legisse, quorum mul-
 to quàm eorum quæ protulisti audacior es-
 set fabrica: quanuis ex appellatiuis (vt gram-
 maticorum vocabulo tecum vtar) conflata
 essent. Fortasse autem alicuius recordabor:
 tu interim ad Nizolium redi, à declinabili-
 bus orationis partibus ad indeclinabiles
 transiens. C. Atqui nulla Participiorum al-
 lata fuerunt exempla: id est, expositionum
 quæ illis tribuuntur. F A B. Ex iis quæ verbis
 dantur, iudicium fieri poterit & de iis quæ
 tribuūtur Participiis. C A. Pronomina quo-
 que sunt ex numero declinabilium oratio-
 nis partium, quorum tamen expositiones
 nullas examinauimus. F A B. Quî verò id fa-
 cere potuissemus, quum nullæ illis adiectæ
 reperiantur? C A. Imò possessiuis quibuscū-
 puto esse additas. Quæramus possessiuum
 Meus. F A B. Nulla est adiecta. C A. Neque
 verò opus fuisse videtur. F. Dum hoc dicis

non cogitas quis sit vsus vel potius qui sint
 vsus huius pronominis, præter illum vulga-
 rem, omnibus notum & passim obuium.
 Ac ne longè abeamus, vel in isto loco qui
 ab illo offertur, *Quod quidem ego facerem nisi
 planè esse uellem meus*, expositione dignum
 erat pronomen Meus. C A. Iam tibi assen-
 tior. Sed ne in nominibus quidem & verbis
 solet tantum diligentia adhibere Nizolius
 ut reconditas etiam & abstrusas eorum si-
 gnificationes expromat. F A B. Nemo te-
 netur alium docere quæ ignorat. C A. Quid
 si Marcus hæc te dicentem audierit? M A R.
 Et quod ab illo & quod à te dictum est au-
 diui: sed ego longa patientia occallui. ideo-
 que iam vobis per me licet illum in omnes
 partes versare. F A. Non illum sed observa-
 tiones illius versamus. C A. Ringitur Mar-
 cus: sed tamen huic sermoni finis est impo-
 nendus. F A B. Breui imponetur, si volueris.
 C A. Atqui spem feceras Marco audiendi a-
 liquas expositionum Nizolianarum repre-
 hensiones in singulis orationis partibus. F.
 Metum potius quàm spem illi fecerā. ideo-
 que etiam si meam fidem hac de re obstrin-
 xissem, facilè ab eo impetrarem ut me fidè
 liberassè diceret, & non audita pro auditis
 haberet. Quum verò iam viderimus, nos,
 ne si velimus quidem de aliis orationis par-

tibus quæ declinabiles sunt, verba facere, ullam materiam inuenturos; ad indeclinabiles veniendum cenſeo. C A. Quid? an de harum partium vnaqua; dicendum erit? F. De vnoquoque earum genere dicendum eſſet, ſi vnicuiq; pariter expoſitiones tribuerentur: ſed quum aduerbiis potius quàm aliis dentur, de his potius dicendum erit. C. Horum mihi exempla ſunt in promptu: tantum peto vt me attentè audiat. F. Me quidem certè fore attentum polliceor. C. Sed pollicerisne te attentè auditurum me Nizoliano modo? F. Quis ille eſt attentè audiendi modus? C. Vt auditor ſe nõ diligentem ſolùm ſed benignum etiam & clementem præbeat. F A B. Itane? C A M. Audi, vt mihi fidem habeas. ATTENTE, *Silenzio, Attento animo, Benignè, Diligenter, Clementer*. F A. Sui ſimilis eſt in aduerbiorum quoque expoſitionibus noſter Nizolius. ſi tamen eum appellare noſtrum Marcus permittet. C A. Vtrum verò magis mirari oportet? an Attentè ab eo expoſitum Clementer, an Clementer oppoſitum aduerbio Diſſoluté. F A. Vix poſſum ſtatuerè. Sed vbi id legitur? C. Hic. CLEMENTER, *Manſueté*.)(*Diſſoluté*. Nota enim illa ſeparat quæ opponi credit. F. Periculofæ ſunt (quantum video) Nizolii obſervationes non ſolùm in expoſitionibus

sed etiam in oppositionibus, vt ita loquar. Quid verò illum mouit vt diceret Clementer & Dissolutè opponi? C A. Hic Ciceronis locus, *Quod est factum clementer, dissolutè factum criminari.* F A. Quasi verò necesse fuerit Ciceronem oppositis aduerbiis hoc loco vti. Si igitur ita loquutus fuisset Cicero, *Quod est factum iracundè, auarè factum criminari,* opponi hæc dixisset, *Iracundè & Auarè.* C A. Nimirū. F. Aut, si vna in parte Amicè vel Beneuolè, in altera Dissolutè vel Remissè posuisset Cicero, hæc illis opponi idem Nizolius eodem modo iudicasset. C A. Sanè. nec tamen magis hîc quàm in quamplurimis aliis locis mirandum eius iudicium fuisset. F A. Sed quid existimas ibi aduerbio Dissolutè significari? C. Dissolutè fieri dicitur à Cicerone eo in loco (vt opinor) quod non tantùm clementer fit, sed nimum clementer. F. Locus est adeundus, & quæ præcedunt quæque sequuntur, consideranda. C. Hic est, oratione in Verrem septima, *Non agam tam acerbè: non utar ista accusatoria consuetudine, si quid est factum clementer ut dissolutè factum criminer: si quid vindicatum seuerè est, ut ex eo crudelitatis inuidiam colligam.* F. Quo magis hunc locum expendo, eo magis in Nizolio iudicium desidero, qui Dissolutè & Clementer contraria esse censue-

rit : ac non animaduernerit eum esse aduer-
 bii Dissolutè vsu quem dixisti: vt Dissolu-
 tè factum intelligatur quod nimium cle-
 menter sit factum. Sed iam alias aliorū ad-
 uerbiorum expositiones affer. C A M. Visne
 aduerbium Diligēter, quo, inter alia, expo-
 nitur illud Attentè, visamus? F. Quidni? C.
 DILIGENTER, *Acuratè, Exquisitè, Studio-
 se, Summa cum ærimonia, Magna cum cura et di-
 ligentia.* F. Heus tu Marce, qui primus es in
 Ciceronianorum albo, quum voles te ma-
 ximè Ciceronianum ostendere, aliis iubē-
 tibus aliquid diligēter fieri, tu summa cum
 cerimonia fieri iubeto : & quidē tū vel ma-
 ximè quū de iis quæ ad coquorū artē per-
 tinent loqueris. C. Si Marcus essem, nō de-
 esset quo tuum iocū cluderem. F. Ne (quæ-
 so) mihi inuideas quicquid illud est. C. Re-
 sponde igitur. Nōne cerimonia inest sacri-
 ficiis? Hoc mihi negare noli, quum lega-
 mus apud Ciceronē, *sacrificium quod sit in-
 credibili ærimonia.* F. Negaturus nō eram, e-
 tiam si locum hunc non protulisses. C. Nōne
 de coquorum culinis, sicut de sacrificiis,
 -*penetravit in æthera nidor,* dici potest? F. A.
 Sanè. C. Quum igitur talis sit sacrificiis cum
 culinis coquorum *συντάξις*, & ceremoniz
 ad sacrificia pertineant, non erit irridendus
 Marcus, quum coquū suum cœnam summa

cum cerimonia coquere iubebit. F. *-mendose colligis, inquit Stoicus.* M. Mēdose colligit Camillus, sed iocose saltem. F. Sed tibi (si verū vis fateri) hi nostri aduersus Nizolium ioci parum adlubescunt. Verū nobis tuam de illa Nizolii expositione sententiam ingenuè declarato. M. Non recuso. F. Quānam igitur ea est? M. Si diuinare potuisset Nizolius suas Obseruationes in manus Fabii & Camillie esse venturas, expositionem illā fuisse prætermisurum. F. Expōitore hæc ipsa sententia opus habet. Tu Camille perge, minimèq; Nizolio in gratiam huius dissimulantis parce. C A M. Miratus es antea Nizolium velle Clementer & Dissolutè sibi opponi: quid si verò dicā Ciceronē Crudeliter quoque & Dissolutè inter se, eiusdē Nizolii quidem certè iudicio, opponere? F. Quid aliud dicam quàm te maius illo miraculum loqui? Quomodo enim rationi consentaneum est vt quum aduerbia Clementer & Crudeliter sint omnino contraria, quod vni eorum opponitur, alteri quoque opponatur? Talia scribere, est profectò sibi apertè contradicere. C. Scribit tamen. Audi enim hæc, aut etiam vide, si libet. C R U D E L I T E R, Dure, Aerbé.) (Dissolutè. Nonne, Marce, quum quispiā hunc locum Obseruationum Nizolianarum legerit, vbi di-

citur aduerbium Dissolutè opponi aduerbio Crudeliter, deinde in alterum illum incidet vbi scribitur idem aduerbium Dissolutè opponi aduerbio Clementer, attonitus hærebit? Sed obmutescit noster Marcus. F. Meritò certè. quis enim hîc Nizolio patrocinari posset? C. Nimirum à Nizolio ad Nizolium prouocare lectorem oportebit. F. A. Sed putàsne Dissolutè & Crudeliter contraria posse dici? C. Quîdni? Si enim in eo quod dissolutè fit est quidam excessus clementiæ, vt vicissim in eo quod fit crudeliter, est quidā excessus seueritatis, nihil obstat (meo quidem iudicio) quin duo illa, Dissolutè & Crudeliter, opponi censeamus. Verùm tu fortasse nō cōsiderasti vtriusque excessus significationem duobus hisce aduerbiis subesse in illo Ciceronis loco. F. A. Non equidem. C. A. Repetendus est igitur. *Non agram tam acerbè: non utar ista accusatoria cōsuetudine, siquid est factum clementer, ut dissolute factum criminer: siquid vindicatum seuerè est, ut ex eo crudelitatis inuidiam colligam.* Perinde est enim, vt opinor, ac si diceret Cicero, Vt siquid est factum clementer, non tantum clementer sed etiam dissolutè factum: siquid vicissim seuerè est vindicatum, non tantum seuerè sed etiam crudeliter vindicatum esse dicam. F. A. B. Vel potius ita, Vt siquid est factum

factū clementer, non tam clementer quā
dissolutè factum : siquid vicissim. seuerè est
vindicatum, non tam seuerè quā crudeli-
ter vindicatum esse dicam. C. A. M. Tibi as-
sentior. Cæterum dici fieri dissolutè quod
non fit satis seuerè, hic quoque locus ostendit
initio Philipp. sextæ, *Audita uobis esse ar-
bitror, Quirites, quæ sint acta in senatu, quæ fue-
rit cuiusque sententia. Res enim ex Cal. Ian. agi-
tata, paulo antè confecta est: munus quidem illa se-
uerè quā decuit, non tamen omnino dissolutè. A-
liquanto post autem scribit, Quæ quam ita
sint, non omnino dissolutum est quod decreuit se-
natus.* F. A. B. Quis autem est Ciceronis locus
in quo Dissolutè & Crudeliter sibi opponi
Nizolius iudicauit? Si enim inuenire pō-
tuit in quo Dissolutè & Clementer sibi op-
poni iudicaret, credibile est nācisci potuisse
aliquem in quo idem de Dissolutè & Cru-
deliter iudicium faceret. C. A. Hic est, non
tamen Ciceronis, sed Bruti, *Illud quidem non
muto. quod ei quē me occidere res nō coegit, neque
crudeliter quicquam eripui, neque dissolutè quic-
quam remisi: habuīque in mea potestate quoad
bellum fuit.* Ipse autem Cicero iisdem voci-
bus in quadam ad eum epistola utitur, sed
nominibus ex quibus facta sunt illa aduer-
bia, *Tu, si hanc rationem non probas, tuam sen-
tentiam defendam, non relinquam meam.* Neque

dissolutum à te quicquam homines expectant, neque crudele. Huius rei moderatio facilis est, ut in duas uehemens sis, in milites liberalis. Illis ipsis, inquam, verbis utitur apud Brutum Cicerone, quibus Brutus in sua ad eum epistola usus fuerat. Ab ipso autem Cicerone in eadē illa oratione in Verrem, unde paulo antè locum attulimus, Dissolutus & Vehmēns opponuntur: Poterōne in eos esse uehēmēns, qui naues non modo inanes habuerunt, sed etiam apertas? in eum dissolutus, qui solus habuerit constratam nauem, & minus exinanitam? F A B. Ad alia exempla veniendū est. C A. An igitur assentieris Nizolio, dicenti Aliquantum idē esse quod Paulisper? F A B. Scis me assentiri nō posse, quin dissentiam non solū à grāmaticis sed ab ipsa Latinæ linguæ consuetudine, quæ Paulisper significationi temporis vult esse peculiare. Quòd si Aliquāisper exposuisset Paulisper, in eo quidē certē non errasset. C A. Et tamen sicut Aliquātum dicit esse Paulisper, ita vicissim ubi venit ad Paulisper, eo significari dicit idem quod Aliquantum. r. Duobus igitur modis inter se contrariis errat. nam quum Aliquantum dicit esse Paulisper, significationem illius aduerbii ad temporis significationem contrahit, quum de aliis etiam rebus dicatur (& quidem de aliis rebus potius quàm de tem-

pore. vix enim puto Aliquantum id significare, nisi adiecto genitiuo Temporis) vicissim autem quum Paulisper dicit idem valere quod Aliquantum, latius significationem illius vult patere quàm Latinæ linguæ vsus patiatur. Pudet verò in his examinandis immorari, quæ vel pueris esse debent notissima. idcòque alia quædam à te proponi velim *ἀξιολόγας* Nizolianæ exempla, in exponendis aduerbiis. C A. Audi igitur aliud *ἀξιολόγας* genus, A M A N T E R esse idem quod *Per amanter*. F A B. Eodem nimirum iure illi hoc dicere licet quo dicit *Inconsideratus* idem esse quod *Amentissimus*; & *Familiaris* esse *Qui in intima familiaritate alicuius versatur*. C. Sed quòd nā ius hoc est? F A. Ab illis ipsis principibus fortasse cōcessum, quorum decretis & diplomatis armata hæc ipsa Nizolianarum Observationum editio prodiit. C. Si ita exponendi voces Latinas ius erat Nizolio, videndum est ne in illum iniurii simus dum in tales expositiones inquirimus. idcòq; nostro examini finem hîc imponendum censeo. F A. In eadem & ipse sum sententia. C A. Hilarem hæc nostra verba Marcum reddiderunt. F A. Haud equidē est mirum, quum nostrū illud examen graui cum mœrore afficeret. C A. Hoc saltē, Marce, apud te hanc nostrā inquisitionem esse.

Eturam esse spero, vt in multis Nizolii expo-
 sitionibus Epicharmeum illud in mentem
 tibi veniat, Μέμνασο ἀπιστεῖν. F A. Imò eum
 ñolim ἀπιστεῖν, sed hoc duntaxat ab eo peto
 vt non sit adeo ταχύπιστος. Quale enim hoc ef-
 set, omnibus Nizolii expositionibus fidem
 derògare, quum multæ sint non contemnē-
 dæ? M A R. Tuo potius quàm Camilli obse-
 quar consilio. C A. Meo certè simul es ob-
 sequuturus. non enim verbo ἀπιστεῖν signifi-
 care volebam Non credere, sed Non teme-
 rè credere, vt à Quinto Ciceronis fratre ex-
 poni videmus: vbi scribit, *Quamobrem Epi-
 charmeum illud teneto, Nervos atque artus esse
 sapientiæ, non temerè credere.* Scis enim Epi-
 charmea esse ista, Νᾶφε καὶ μέμνασο ἀπιστεῖν. ὅ-
 στα ταῦτα τῶν φρενῶν. quæ cum ab aliis afferuntur,
 tum à Dione Chrysostomo, in libello ἀ-
 ἀπιστίας. Et verò hūc ipsum titulum malè di-
 co verti De non credendo, vel De incre-
 dulitate, (vt reddidit Thomas Naogeor-
 gus) ac reddi debere De non temerè credē-
 do: vel De diffidentia. Itidēmq; in hoc Plu-
 tarchi loco ἀπιστίαν esse aio Non temerè cre-
 dere, siue Diffidentiam, in Polit. præceptū
 ἢ καὶ Δημοσθένους ὁρθῶς μέγιστον ἀποφαίνεται ὅ-
 τίς τρεῖς νοῦς φυλακτέον ἀπιστίαν τῆς πόλεως.
 καὶ μάλιστα τῆς ψυχῆς τὸ μέρος ὃ πιστεύομεν ἀλάττω.
 F A B. An putas me ignorare ἀπιστίαν in his

aliisque huiusmodi locis idem sonare quod
δυσμῖαν ? sed volui, tuum illud dictum ca-
 lumniando, Marco gratificari. C A. At ego
 illi minimè gratificabor in quadam re quæ
 mihi nunc venit in mentem. F A. Quænam
 ea est? C A. Vt Nizolianas quarundam etiã
 Græcarum vocum expositiones non relin-
 quamus *ἀλασπίστως*. F A B. Nesciebam Nizo-
 lium tãtum sibi sumere ausum fuisse, vt Græ-
 ca quoque exponeret. C. At nunc id scies;
 simulque, quàm Nizolius in iis quoque ex-
 plicãdis fuerit noster Nizolius. Attende, F.
 Attentum me habes. C A. ἈΚΑΚΙΑ, id
 est, *Animus terrore liber*. F A. Quid audio? C.
 Expositionem quandam Nizolianam. F A.
 Imò plusquam Nizolianam. C A. Παράδοξον
 quidem illam. F A. Imò ὑπερπαράδοξον. M A R.
 Atqui hanc reprehendentes expositionem,
 Ciceronem ipsum reprehenditis, ex ipsius
 enim quinto libro De finibus bonorum &
 malorum deprompta est. F A. Ciceronis eã
 esse dicendũ est, si omnia quæ vel in mēdo-
 sissimis operum eius exemplaribus extant,
 cum scripsisse dicere necesse sit. Duo enim
 ibi habent Græca vocabula libri minus mē-
 dosi, priore loco *ἀδυσμῖαν*, posteriore *ἀθαμ-
 ῖαν*, siue *ἀπαρξίαν*. at deprauatissimi (quos
 sequutæ sunt vetustissimæ editiones typo-
 graphicæ) habebāt *ἀκακίαν* posteriore loco.

Sed nemo ex iis qui Græcam linguam vel à limine salutarunt, dubitavit vnquam quin ἀνακίαν inendosè librarii scripssissent. C A. Aliud exemplum afferendum est, cui Marcus ne talem quidem (id est tam frigidam) excusationem vilam inuenire possit. Respōdeat igitur Marcus quæ sit illa Græca lingua qua σχόλιον idem valet quod apologia. M A R. Vbi hoc scripsit Nizolius? C. In illa ad suas Observationes appendicula, in qua barbaras quasdam voces enumerat, simulque quibus earum loco vtendum sit indicat. Vide: *Apologia*, Σχόλιον. Sed quid ego ad illam Appendiculam me confero, quum in ipsis Observationibus hanc bellam expositionem ostendere tibi possim? M A R. Ostende. C A. SCHOLION, *Responsio, uel Purgatio, uel Defensio*. F A. In qua schola hanc scholii significationem putas, Marce, Nizolium didicisse? M A. In errorem illum induxit quod ibidem à Cicerone dicitur, ἀπολογισμὸν συνεξομαί. C A. Euax, tandem à te aliquam veri confessionem extorxi. F A B. Atqui non dixit, Errauit Nizolius: sed, Hoc Nizolium in errorem induxit. C A. Si bene Marcum noui, ad tam futile scholion (id est, tam futilem apologismum, loquendo more Nizoliano) minime cōfugiet. M A R. Si bene Camillum noui, nullum vnquam exagitandi Nizolii

finem faciet. C A. Imò iam desino Marce de Nizolio verba facere, sed Ciceronianorum Nizolianorum vicem dolere, vel potius miserari, neque desino, neque vnquam desinam.

F A. SI FINEM tuæ in Nizolium inquisitioni imponere parabas, cautius tibi agendum erat. Tuo enim, vt forex, indicio periisti, quum illius Nizolianæ ad Observationes Appendiculæ mentionem fecisti. C A. Quid ita? F A B. Quia mihi in memoriam promissum tuum reuocasti. C A. Quòd nã? F A. De examinanda illa quoque Appendicula. C A. Ah, nimium vales memoria. F A. Imò verò parum mihi fidelis hac in re erat: sed tu illam officii sui admonuisti. C A. Meritò igitur me indicio meo, tanquam foricæ, periisse dixisti. F A. Vt illo ipso yterer verbo quod est in illa prouerbiali formula; dixi te periisse: non lubẽter alioqui tale quid loquens. C A. Nescio quàm lubenter ita sis loquutus, sed te verè loquutum esse certo scio. F A. Quid ais? C A. Quod res est. mihi enim iam fessio laborem imponis qui vel recentem terrere potuisset. F A. Sed quotamcunque eius partem sustinere volueris, mihi à te satisfactum fuerit. C A. Hac conditione morem tuo desiderio geram. Sed hoc primum fatebor, illam Appendiculæ appella-

tionem opusculo illi, siue libello, à me non ab ipso Nizolio esse impositam. F A. Quod igitur nomine ab ipso appellatur? C A. Multis constat verbis titulus quem in prima editione habet. Hæc enim in ea leguntur, VOCABULA QVAEDAM barbaræ, uel Latina quidem, sed non Ciceroniana, quo pacto Ciceronis more, id est, Latinissimè & elegantissimè dici possint. His autem subiungit quædam quibus se velut excusat. F A. Quæ sunt illæ? C A. In quibus tamen nonnulla sunt quæ mihi, quum hæc scriberem, Ciceroniana uidebantur: sed librum aut locum in quo essent, non memoria tenebam. F A B. Habétne plura illa inscriptio? C A M. Multo plura. Addit enim, Suis etiam uocabulis alicubi subiecinus sententias quasdam ac formas loquendi animaduersione dignissimas; & memoriæ maxime mandandas: quæ in oratione faciunda atque in scribendo, ad materiam illam quæ uocabulo significatur, facile accommodari possunt. F A B. Quam uerbofus est hic titulus. C A. Imò etiam uerbosior quàm putes. nam hæc quoque adiiciuntur: quæ tamen separari poterant, & verò debebant quum non ad inscriptionem illius opusculi sed tantum ad commendationem pertineant. F A. Audienda sunt & illa. C. Audiatur. Hæc autem nos idcirco inter observationes machinati sumus, atq; ita ex ordine collocamus.

ut essent nobis tanquam loci memoriæ artificiosæ: quibus, si quando aliquid difficilius aut obscurius in memoriam reuocare uellemus, quasi monitori-
bus uteremur. Quod idem si quis facere uolet, non minimam hinc (opinor) ad dicendum scribendum-
que afferri sibi sentiet utilitatem. Hæc illa sunt quæ Nizolius illi paruo tractatui (si ita ap-
pellare oportet) præfixit. F A. Quid tanto dignū feret hic promissor hiatus? Vel potius, quid tantis dignū machinamētis est nobis allaturus? C A. Video te quoddam eius verbum machināti sumus, hîc obseruasse. F A B. Obseruauī & alia, sed illud præcipuè obseruatione & admiratione, tandem etiam irrisione, dignum mihi visum est. M A R. Atqui Ciceronianum est machinari. C A. Bene habet, Fabi, quòd Marcum tandem silētium rumpere coegeris. F A B. Sed silentium vicissimū illi statim impositurus. M A R. Tūn' mihi negabis Machinari esse Ciceronianum? F A. Non equidem: sed Cicéronem ea in re fuisse illo verbo usurum negabo. C A. Miror te Marce non animaduertere, verbum hoc suo loco non esse adhibitum. F A. In id certè meritò iactabimus prouerbiū, τὸ ἐν φακῇ μύρον, siue τὸ ἐπὶ τῇ φακῇ μύρον. M A R. Istas voces τὸ ἐν φακῇ μύρον noui significare In lēte vnguentum: sed quis sit istius prouerbii v-
sus nō recordor. F A. Ex nullo melius quàm

ex Frontone, apud Aulum Gellium, intelligere potes. Quum enim hic locus ex Quadrigarii Annalium libro XIII, recitatus esset, *Concione dimissa Metellus in Capitolium venit cū multis mortalib⁹*, & cuidā haud indocto viro videretur *multis mortalibus* pro hominibus multis, ineptè frigidèque in historia nimisq̃ poeticè dixisse: Fronto autem cōtrā longè latèque amplius, prolixius, fusius in significanda totius propè ciuitatis multitudine, multo denique *ἐμπακτώτερον* illud quàm hoc esse dixisset, illo quidem certè in loco: hanc admonitionem addidit, *videz tamen ne existimetis semper atq; in omni loco mortales multos pro multis hominibus dicendum: ne planè fiat Græcum illud de Varronis satyra pro-uerbiū, πὸ ὅτι τῇ φακῇ μύρον*. Tali profectò admonitione opus erat: Nizolio de verbo Machinari. cogitasset enim ei minimè locū hīc esse. M A R. At mihi ab hoc loco minimè alienum esse videtur. C A. Vide Fabi, quid sit Ciceronianum esse. Marco enim, quòd Ciceronianus sit, licet à te dissentire de verbo Ciceronis, de quo alioqui te rectè sentire perspicit. F A. Suam Marco prærogatiuam relinquamus, atque his quæ *παρέργα* sunt, omisis, ad ipsum *ἔργον* veniamus. Priùs tamè hoc ex te scire velim, Camille, an eadem verba illi opusculo in posterioribus editio-

nibus præfixa fuerint. C A. Basiliensi saltem editioni, quam paulo antè protuli, longè alium titulum præfixum esse scio : & ita quidem ut magnam ea in re factam esse Nizolio iniuriam interpreter. Vide enim quantum ab illa inscriptione ista sit mutata, I N D E X utilissimus, in quo uerba innumera ferè barbara, uel Latina quidem, sed non Ciceroniana, indicantur : quibus Ciceroniana, id est elegantissima, subiiciuntur. ut si quando aliquid elegantius in memoriam reuocare uelimus, hoc quasi monitore utamur. Quod si quis facere uolet, non minimā hinc, opinor, ad dicendum scribendumque sentiet utilitatem. F A B. Quæ à Nizolio barbara vocantur, ab hoc immutatore ferè barbara appellantur. C A. At ego uoculam ferè cū proximè præcedēte nomine innumera iungi arbitror. Nam illa quoque editio uocabula multa exhibet, quæ non barbara tātū sed barbarissima etiam dici possunt. F A. Tuum hoc barbarissima, tanquam barbarum irridet Marcus. C A. Barbarum dici possit fortasse, si quæcunque apud Ciceronem non extāt, barbara vocanda sint. Alioqui certè nō uideo cur superlatius gradus Barbarissima minus admitti possit, quàm comparatiuis Barbariora, qui apud Nasonem legitur. F. Licebat tibi, ne Marci aures, non tantū delicatas, sed Ciceronianè delicatas, offen-

deres, Græcè vel βαρβαρώτα vel νεῖβαρβα
dicere. C A. Quid? nõne & in Græcis deli-
catas esse illas putas? F A. Etiamfi delicatas,
at minus quàm in Latinis religiosas. Sed
quid hoc sibi vult Camille, quòd quum Ni-
zoliùs dixisset duntaxat, Vocabula quædã
barbarã, ille immutator pro Quædam, dice-
re Innumera ferè, non dubitauerit? adeone
barbarorum exercitus in editione illa cre-
uit? C A. Non maior certè hac in re eius qui
editionem illã Basiliensem interpolavit,
diligentia quàm Nizolii, sed multo maior
fuit audacia. M A R. Euge quòd aliqua Nizo-
lii laudatio ex eo ipso ore quod Nizolio ob-
trectare & solet & gaudet, exciderit. eius e-
nim saltem diligentia nunc agnoscitur. F.
Quid agnoscãt in Nizolio Camillus ne-
scio: ego certè non tam diligentiam Nizo-
lii agnosco, quàm eius negligentiã ignosco.
C. Ego verò an dici debeo diligentia in Ni-
zolio agnoscere, quòd nihilo maiorem ab
altero quàm ab ipso diligentiam esse adhi-
bitam fatear? Quid? si de duobus loquar,
quorum vtrunque tardum esse querar, nõ-
ne ab vno nihilo maiorem quàm ab altero
celeritatem adhiberi dicam? M A R. Iam in-
cipis σφίζεσθαι, dum Fabio quàm mihi gra-
tificari mauis. sed hoc saltem mihi fatebe-
ris, satis magna, pro ea qua instructus erat

Ciceroniani sermonis cognitione, vsum diligentia fuisse. si tamen hoc tibi dandū est, cum plenā eius cognitionē assequutum nō fuisse. C A. Aliud tibi nō fatebor quān hoc, tantam fuisse diligentiam Nizolianam quāta in Nizolium cadebat. F A. Ne quāso vllum hac de re verbum addito mi Camille, sed potius incipe iam nunc *καὶ ἐπεὶ*, ac vicissim *καὶ ἐπεὶ*. C A. Barbara igitur sunt, *Barbitonfor*, *Becchata*, *Homagium* : in quorum locum substituiuntur ista Ciceroniana, *Tonfor* (siue *Tonstrix*) *Morsus*, *Clientela*. F A B. Vel ex his perspicere possum barbariei appellationem latissimē apud eum patere : quum antea crederem illum non alias voces barbaras afferre quān quæ apud eos extarent qui si non aliis, sibi saltē visi fuissent Latine loqui. Quē verò tribus illis vocabulis aut vlllo eorum vsum fuisse credibile fuerit, si *Pogium*, *Raudensem*, aliósque eiusdem farinae homines, aut certē duorum illorum discipulos, excipiamus? Et tamen ex tribus illis vocabulis vnicum apud eos est, (quod sciam) *Barbitonfor*. Imò ne hoc quidē affirmare queo, an apud vtrumque extet, quum apud *Raudensem* duntaxat me id legere meminim. Sed fateor apud ambos alia esse quæ ex sermone vernaculo sumpta, terminatione duntaxat Latina vestierint, (si mihi

ita loqui conceditur) vt in illis, *Becchata* & *Homagium*; factum esse videmus. Dixerunt enim *Disturbium*, *Bancalia*, *Complices*, *Auisare*, *Cōtentari*, & alia eiusmodi, quæ vulgò Latinum culinarium appellare solemus. C. A. Omittis *Modernus*, *Treuga*, *Pensionarius*: omittis item *viſturalia*, quo & Marsilius Ficinus in Platonis interpretatione vtitur, nō tantum in Protagora, sed in alio etiam quodā (si bene memini) dialogo. F. A. Non hæc tantum, sed alia quamplurima scio à me prætermitti: sed ea nolo afferre quæ illis sunt cū aliis multis communia, ac præsertim cum iis qui leges Salicas, Ripuarias, Alemannorum, Boioariorum, Saxonum, & quorundā aliorum, posteritati tradiderunt. Quem librum si habuisset Nizolius, longè profectò maiorem barbarorum exercitum collegisset. C. Imò verò illi aliunde etiā multo maiorem quàm attulerit numerū non defuisse puto: sed magnam cautionē in delectu adhibuit. F. A. B. Quam? C. A. M. Vt barbaris iis contentus esset, in quorum à se exautoratorum locū, parem postea Ciceronianorum numerū substituere posset. F. Quid? quum igitur pro illo nomine *Becchata* substituit *Morsus*, an tibi in locum barbari Ciceronianum eiusdem significationis substituere videtur? C. Interrogādus est potius Marcus.

F A B. Tacet Marcus: tu igitur alia exempla profer. C A. Pro *Contradictorius* substituitur ab eo *Contrarius*. Quid tu hîc respondebis Marce? nōne hoc tam falsò in locum illius substitui, quàm falsum est *ἀσπίς* & *ἀντοσπίς* idem valere? Pudet te fateri quod verissimum esse intelligis. C A. Pro *Tangibilis* vult dici *Tractabilis*, item *Res quæ sub tactum cadit*. F A. Quis nō videt illud *Tractabilis* malè cum sequentibus confundi? & perinde esse ac si quis *ψηλαφηπὴν* & *ἀπὸν* cōfunderet? At qui priùs sit *ἀπὸν* necesse est, quicquid est *ψηλαφηπὴν*: sed *ψηλαφηπὴν* esse minimè est necesse quicquid est *ἀπὸν*. M A R. Quid? an ipsi etiam Ciceroni audes repugnare, qui *ἀπὸν* apud Platonem *Tractabile* est interpretatus? F A. Hanc Ciceronis interpretationē non ideo reprehendo: sed eum dico propriam nominis illius significationem minimè retinuisse, verùm ita dixisse *Tractabile* ac si verbum *Tractare* posset etiam simpliciter poni pro *Tangere*. Nec verò dubium est quin potius verbo *Tangere*, aut eius verballi vsurus fuerit, (vt alibi *ἀπὸς* vertit *Sub tactum cadens*: item *ἀπὸς* ὅτι, *Tangitur*: item, οὐδὲν αὖ ἀπὸν γήρσιτο, *Nihil tangi potest*) sed quum Plató tria vno eodémque in loco posuisset, *σωματείδης*, & *ὁρατὸν*, & *ἀπὸν*, ac duo priora duobus Latinis, *Corporeū* & *Aspe-*

Etabile Cicero iam reddidisset, nō itidē tamē Tangibile vt Aspectabile dicere posset: Tactile autē (quo tamen Lucretius vsus est) dicere non auderet: Tractabile dicere sibi permisit. C. Ne nos hīc mala fide agere existimemur, & Nizolium calumniari, dicamus potius eum hīc Ciceronis autoritate posse defendi. F. Vt cunque defendi. C. Locum nominis *Compassio* occupant apud eū duo, quorum prius Græcum est, *συμπάθεια*: Latinum est alterum, *miseriordia*. F. At ego ex *miseriordia* nasci dico *συμπάθειαν*, (quum illa faciat vt alicuius malis & infortunius tangamur) & ita vnum ab altero distingui dico. Addo etiam, *συμπάθειαν* reddi potius debere *Condolentiam*. Sed iam ad aliud exemplum transi. C. Verborum exempla nominum exemplis subiuncturus, à verbo *Contrarior* initium sumam, pro quibus substituit *Pugno*, item *Contrarius sum*, & *Confligo*. F. Ego verò in locum verbi *Contrariari* reposuissē duntaxat *Contrarium esse*. C. A. In locum barbari *Combinare* succedit apud eundem Nizolium *Connectere*. F. Potius *Copulare*, meo quidem iudicio, succedere debuerat. C. Locum barbari *Difficultare* occupāt apud eum duo verba *Difficultatem afferre*. F. A. At ego pro his *Difficultare* aliquid malim dicere *Diffiale reddere aliquid*. C. Sed

iam veniendum est ad alia vocabula, quibus maxima fit iniuria, quod quum minimè barbara sint, barbaris tamen, sine vlllo discrimine, intermisceantur. Primùm autem nonnulla proferam quæ apud primarios quidē scriptores non extant, sed apud eos saltem qui minimè βαρβαρίζει existimantur. Ex iis igitur est *Corporatura*, quo vtuntur Columella & Vitruuius. Pro hoc autē *Corporatura* substituuntur ab illo *statura* & *Habitus*. M A R. An hīc aliquid reprehensione dignū à vobis inuenietur? F A. A me quidem certè aliquid iam inuentum est, vel potius aliqua iam inuenta sunt. M. Quænam? F A. Primùm, quod nomini *Habitus* non addit genitium *corporis*: deinde (qua in re grauior est error) quod ab eo *habitus* cum *statura* confunditur. Nam *corporaturam* siue *corporationem* non esse *staturam* ostēdit hic Columellæ locus, Item custodiendum est ne in *corporatione*, vel *statura*, vel viribus impar cū valentiore iungatur. C A. Ad aliud venio. Pro vocabulo *Augmentum*, vult dici vel *Amplificatio*, vel *Incrementum*. F A. At ego dixerim nomen *Amplificatio* respondere verbali *Augmentatio*, potius quàm verbali *Augmentum*. C A. Et rectè, meo quidem iudicio, dixeris. F. Verùm quæ sunt adeo leuia, præmittenda censco. C A. Iam igitur proferam

L. j.

in quibus grauius & periculofius errat. Ex illis est *Circumferentia*. nam pro hac voce vult à nobis dici *Extrenitatem*, vel *Libramentum*. Non te rogabo autem in vtro horum nominum quæ substituuntur, erretur, sed in vtro grauius errari dicendum fit. F. A. Vltorius pergere te, potius quàm in his quæstionibus immorari, velim. Cur enim tempus ponamus in æstimandis iis peccatis quibus non nostrum est pœnas irrogare? C. Audi igitur eodem pertinētia, eandēque, id est eiusdem generis, ignorātiā testantia. *Antarcticius* dici non vult, sed *Antaxon*, illius loco. Pro *Iris* vult dici *Araus species*. Et in voce *Clima* scribit, *Clima*, quasi *angulus*. Quid verò quòd pro *Brauium* vult dici *stadium* ab eo qui Ciceronianè loqui velit? F. Proh quantam iniuriam facit Ciceroni, quū eum Stadium pro Brauiō dixisse tradit! ab ebrio certè Cicerone, non sobrio, dictum hoc fuisse existimandum esset. Perinde enim est ac si pro *διδασκαλείον* nos *διδασκῶν* dicere, Cicero-ne autore, iuberet. M. A. R. Magnum esse scio inter hæc duo nomina discrimen. F. A. Non minus est profectò inter illa duo. nam vt *διδασκαλείον* locus est in quo præceptor docet, *διδασκῶν* autem, præmium doctrinæ (scilicet pretium doctrinæ, vt loquitur Naso) sic *ἀγῶν* locus est in quo curritur, at *βραχέων* præ-

mium cursus significat. C A. Quidni etiam
 perinde esse dicamus ac si officinam fabri,
 & manupretium quod ei datur, vno eodem-
 que nomine appellare, vel potius illius ap-
 pellationem huic tribuere nos iuberet? F A.
 Id quoque iure optimo dixerimus. C. Vti-
 nam verò aliquis adesset medicus, qui eun-
 dem Nizolium audiret nos monentem nō
Catarrhus Ciceronianè sed *Epiphora* dicen-
 dum esse. F A. Quasi verò bella hæc moni-
 tio solis medicis risum mouere possit, C A.
 Ecce aliam risus materiam, pro Græco Do-
 gmaticus esse dicendum, Cuius libertas differē-
 di amissa est, qui que in disputando non suum iu-
 diciū sequitur, sed auctoritati aliorum paret. F.
 At ego ridere an miserari debeam talem i-
 gnorantiam nescio. hæc enim periphrasis
 omnino repugnat significationi vocabuli
 illius Dogmaticus: quum ea describatür is
 qui non audeat *δογματίζειν*. quale autem hoc
 est, *δογματίζειν* dicere eum esse qui *δογματίζειν*
 non audeat? Aristoteles scilicet, quem ne-
 mo dogmaticum esse philosophum negaue-
 rit, non suum in disputando iudiciū se quu-
 tus est, sed auctoritati aliorum paruit: quum
 ne in præceptoris quidem sui Platonis ver-
 ba iurare voluerit, sed amicum Platonem,
 magis amicam veritatem esse non dissimu-
 lauerit. Memini à Sexto philosopho inter

dogmaticos primum nominari. postquam enim philosophos in tres classes distribuit: primam, eorum qui dixerunt se *διρηκέναι τὸ ἀληθές*: secundam, eorum qui *ἀπιφάνησαντο μὴ δυνατὸν εἶναι τὸ καταληφθῆναι*: tertiam, eorum qui *ἐπιζητοῦσι*: subiungit, *καὶ διρηκέναι ἑδὴ δεκοῦσιν οἱ ἰδίως καλούμενοι δογματικοί, οἳ οἱ παρὶ Δεμοτέλειον, καὶ Επικούρου, καὶ πρὸς Στωϊκοῖς, καὶ ἄλλοι γενέσθαι*. Vbi δεκοῦσι non interpretor Videntur, sed Existimant, siue Arbitrantur, cum Henrico Stephano. aut certè, Sibi videntur. Neque enim intelligit illos aliis etiam videri veritatem inuenisse. F A B. Non recordatus est Nizolius prouerbii, Ne sutor ultra crepidam. alioqui in Græcis verbis aliquem se linguæ Græcæ peritiorem in cōsiliū adhibuisset. C A. Non magis certè fidum. se monitorem exhibet Nizolius quum monet ne Pœnitendus dicamus, sed pro eo vtamur Græco vocabulo *ἀμεταμέλητος*. F A. Rideretur saltem is qui monitori illi fidem habens Græcè diceret cōtrarium ei quod Latinè dicere vellet. C A. Haud minori suos lectores, qui linguæ illius pariter sint ignari, periculo exponit in *Autodidaktos* quàm in *Dogmaticus*. Nam illic quoque periphrasin planè significationi nominis *Autodidaktos* contrariam affert. perinde ac si pro *Autodidaktos* dicendum esset, verbis vtendo Ciceronis, *Qui nullam*

artem sine interprete et exercitatione percipere potuit. In ea autem voce quæ hanc proximè præcedit, idem facit quod & in aliis, vt eadē vocabula Latinis scripta literis reiiciat & pro barbaris habeat: at si Græcis scribantur, vt verè Ciceroniana amplecti nos iubeat. nam *Authenticè* ibi barbarum est, at vero *αὐθεντικῶς*, quod ei subiūgitur, Ciceronianum. Verū hīc in terminatione quoque aliquid est differentiæ: at nō multo pōst eodem modo vox *Blasphemia* repudiatur, *βλασφημία* recipitur: itidēque vocem Cathegoremata reiicit, vocem *κατηγορήματα* admittit, verū & Latinè & Græcè aliter scriptam. nam Cathegoremata cum *th* ibi legimus, eodēmq; modo *κατηγορήματα* cum *h*: & tam Latinæ quàm Græcæ voci suam scripturam intactam reliquit & Basiliensis editio. F. A. Credidit fortasse qui editioni illi præfuit Ciceronianam esse scripturam, nō *κατηγορήματα*, sed *κατηγορήματα*, atque ideo Nizolio placuisse. M. A. R. Imò Cathegoremata barbarè scriptum inuenisse Nizolium crediderim. C. A. An ideo & illum *κατηγορήματα* barbarè scribere decebat? M. A. R. Quid? nōne fieri potest vt nō ipse Nizolius ita scripserit, sed is qui Italicæ illi editioni præfuit? quū sicut Latinam vocem literis *th* scriptam videret, ita Græcam litera *h* scribendam putaret?

F A. Quidr̃ nōne magis credibile est, utrūque errorem ab ipso Nizolio manasse, ob ignorātiā Græci huius nominis originē? quum sint & alia quæ non minus crassam eius ignorationem in iis quæ ad Græcā linguam pertinent, nobis prodant? M A R. Dices igitur fortasse vocem *Notomia* ex eius errore profectam esse, pro *Anatome*. F A B. Imò verò eum illic agnosco nō Nizolii sed barbari vulgi errorem: præsertim quum corruptæ voci integra subiungatur *Anatome*. Sed quum deprauatæ illi *Notomia* subiungi integram *Anatome* satis esset, malè totum Ciceronis locum attulit. C A. Audi audi Fabi, quod te obstupescitū reddet. F A. Quid illud est? C A. Incidi in quendam locum ubi dicit Nizolius pro Græca voce *Pleonasmos* dicendum esse *Occultæ insidiæ*. F A. Quid aliud hoc est quàm monstra loqui? quid cōmune habet vox *Pleonasmos* cum voce *Insidiæ*? C A. Interrogandus est Marcus. M A R. Estne ita scriptum non solum in Basiliensi editione, sed in illa etiam Italica? C A M. Vide ipsemet. nolo enim te meis oculis credere. M A R. Video ita scriptum esse in utraque: & me quoque valde mirari fateor quid hīc sibi voluerit Nizolius. C A. Mirarisne tantum, nō etiam obstupescis? M A R. Quasi verò Gorgonem quampiam conspe-

xerim. F. Ne in re tam seria rideamus, sed vnde natus sit ille tam monstrosus error, videamus seriò an vlla coniectura assequi poterimus. Tu Marce ne tuam nobis inuideto. M. Non inuiderem siquam haberem. F. Tu autem Camille quid coniectas? C A. Me ne habere quidem fateor quod coniectem. F A. At ego quid mihi in mentem veniat hoc de loco suspicari, nequaquam vos celare volo. C A. Rem mihi gratam facies. M A R. Mihi quoque. F A. Quum aliquis margini sui libri adscripsisset vocem *Pleonasmus* eregione horum verborum, *Ο αὐτὰ ἐν ἰσφιδίᾳ*, indicare volens adiectiuum *οὐκ αὐτὰ* esse additum per pleonasmum (quis enim insidias esse occultas non nouit, & alioqui non esse insidias?) incidit in illud margini adscriptum vocabulum Nizolius, & putauit, eum qui hoc adscripsisset, intelligere, vulgò vocari Pleonasmum quod à Cicerone *Οὐκ αὐτὰ ἐν ἰσφιδίᾳ* diceretur. M A R. Interim verò hæc tua coniectura Nizolium non excusat, sed potius scædæ illum ignorantia accusat. F A B. Quid? egone Nizolium hîc excusaturum me promisi? est certè hic error non *δυσἀπολόγητος*, sed planè *ἀνἀπολόγητος*: quicumque patrocinium Nizolii suscipiat, & quamcunque se in partem vertat. Sed vnde hic nouus risus, Camille? C A. Ex eo quòd video Nizolium

velle Ciceronē nomina vulgò recepta abolere, corúmque loco alia imponere iis etiam rebus quarum nullam omnino notitiam habuerit, & de quibus nihil vnquam audierit: quinetiam quæ nihil affinitatis habere dici possint cum earum vlla quarum ab eo sit mentio. In hoc numero sunt, *Typographus*, *Episcopus*, & *Chirotheca*. Pro *Typographus* vult Ciceronianè *Librarius*, pro *Episcopus* vult *Pontifex* dici: pro *Chirotheca* substituit *Manica*. Sed vnum est vocabulum quod nos hæc vix mirari sinit, quia multo illis est admirabilius. F A. Cur nos tam diu suspēsos tenes? C A. Quia vereor ne tuo cachinno Marcum fuges. F A. Atqui polliceor, si videam tale quodpiā à meo cachinno periculum imminere, me potius fugam statim capturum, nec priùs reuersurum quàm illū compescuerim. C A. Ridiculum id vocabulum, cui dico Nizolium præter omnium expectationem inuenisse nomen apud Ciceronem, est *cabala*. F A B. Ah, lupum auri-
bus teneo. siquidem neque à cachinno mihi temperare, neque foras eum extrudere (vt fidem meam liberem) possum. M A R. Nō satis propriè isto prouerbio vteris. F. Ego de prouerborum vsu fidem Ciceronianis habendam non censeo. C A. Istam controuersiam missam facito, ac potius qua per-

phraſi Cicero *Cabalam* circumloquatur au-
dito. F A. At ego Nizolium verbum vnum
quod vni reſponderet, apud ſuum Cicero-
nem inueniſſe exiſtimabam. C A. Itane Ca-
bala, quæ tam latè patet, vno verbo à Cice-
rone exprimi potuiſſet? F. Audiēda eſt igi-
tur illa periphras. C. Ex ſomnio Scipionis
petita eſt. *ſi accipiat proles illa futurorū hominū*
deinceps uniuſcujuſque noſtrū a patribus acce-
ptas poſteris prodere, &c. F A. Dubito an hæc
ita ſcripta ſint apud Ciceronē: ac nihil cer-
tè cabalicum in his agnoſco. C. Nihil tibi
cum cabala, quantum video. F A. Præſertim
cum Nizoliana. C A. Cur non dicis Cice-
roniana? F. Viſne Ciceronianam appellem
quam Ciceroni immerenti Nizolius affin-
git? C A. Quidni? in promptu autem erit
excuſatio, te de cabala cabalicè ſiue caba-
liſticè eſſe loquutum. Sed ecce tibi alias in-
ſuper duas cabalæ periphras, illi quam re-
citaui ſubiunctas. F A. Hæ quoque ſunt au-
diendæ. C A. Prior eſt ex libro De amicitia
(caue autem ne & hîc dicas te dubitare an
ita apud Ciceronem ſcriptum ſit) *Quod ab*
Archyta (ut opinor) dici ſolium, noſtros ſenes com-
memorare audiui, ab alijs ſenibus auditum. Poſte-
rior autem ex lib. De legibus, De ſacris hæc
ſit una ſententia, *ut conſeruentur ſemper, & de-*
inceps familijs prodantur: & ut in lege poſui,

perpetua sint sacra. Subiungūtur verò & hæc ex alio (eiusdem vt opinor libri) loco, *Demde etiam deinceps posteris prodebatur ad imperium.* F A. Ecquis, præter Nizolium, cabalā in his Ciceronis locis reperisset? C. Essēne quicquam putas quod apud Ciceronem nō reperit, aut saltem se reperisse imaginatus non sit Nizolius? quum etiam Manticham inde proferat? F A. Manticham Nizolius apud Ciceronem? C A. Et quidem Catullianam. Audi & hīc periphrasin: (falleris enim hīc quoque si verbum vnum quod vni respondeat expectas) ex Cic. opere De officiis, *Fit enim nescio quomodo ut magis in aliis artibus, quàm in nobismetipsis, siquid delinquimus.* M A R. Quod addidisti, Camille, Catullianā, faciet vt Nizolium excusē, eiusque mentem intelligam. C A. Quid? a mentem habere mentem putas? M A R. Bona verba quæso. nōne & ipse, si verum fateri velis, hunc Catulli versum, *sed non videmus mantichæ quod in tergo est*, sub illis verbis Ciceronis dices te agnoscere? C A. Esto posse sub illis verbis agnosci: poteritne quisquā sub illo etiam vnico vocabulo Mantica versum hunc agnoscere? M A R. Non equidem: sed putauit Nizolius lectoribus ex vnica voce totum statim versum in mentem esse venturum. C A. Atqui ne tibi quidem ipsi Ni-

zoli discipulo succurrebat ille versus, idco-
que in illo vocabulo Mantica hæreas, vt
ipse modò fatebaris. F A B. Ego verò ne ipsi
quidem Nizolio in mentem venisse arbi-
tror illum Catulli versum (vt omittam, pos-
se etiam in dubium vocari an Catullum vn-
quam legisset) sed Mantica alicunde eadẽ
arte qua & Pleonasmum & alia, corrasisse.

M A R. Stomachum, quantũ video, mihi mo-
uere cupis, dũ talia de Nizolio dicis. F. Ne
mea de Nizolio verba stomachum tibi mo-
ueant nō valde laboro. nam quum ille suis
hiscẽ ineptiis stomachum mihi & mouerit
& moueat, par pari relatum fuerit. Sed noli
quæso posthac nos interpellare. C A. Quum

ad illum quem institueram sermonem de
Græcis vocibus quæ à Nizolio vel reiciũ-
tur, vel contrà in Latinarum locum sub-
stituuntur, redire vellem, commodum in
quandam incidi, in qua (propter illa quæ ei
subiunguntur) eodem modo quo in dua-
bus tribusve præcedentibus lectores suos
tenet suspensos Nizolius. F A. Quænam illa
est? C A. *Microbius*. F A. Quæ Ciceronis ei
subiunguntur verba? C A. Ista, ex oratione

pro M. Marcello, *Animus tuus nunquam his an-
gustis quas natura homini ad uiuendum dedit,
contentus fuit*. F A B. Quid somniasse hĩc di-
cemus Nizolium? M A R. Etiam si me inter-

pellatorē sis vocaturus, aliquid obloquar.
 F A. At ego te obloquutorem esse nescie-
 bam. M A R. Proloquar dicere volui. F. Quid
 verò est quod siue obloqui siue proloqui
 cupis? M A R. Iniuriam hīc Nizolio fieri, si
 errasse & hīc ac perperam illi Græco voca-
 bulo hunc Ciceronis locum adscripsisse di-
 catur. Quis enim non videt illo Ciceronis
 loco periphrasticè id exprimi quod illa vox
 Græca *microbios* sonat? F A. Quid? an igitur
 quum libebit significare Ludouicū fuisse
microbion, siue *brachybion* (quo frequentius
 vtuntur Græci) id est, breuem fuisse Ludo-
 uici vitam, hunc Ciceronis locū imitabor?
 M A R. Quidni? F. Dicam igitur te autore,
 Animus Ludouici nūquā his angustiis quas
 natura homini ad viuendum dedit, conten-
 tus fuit. M A R. Non me, sed Cicerone auto-
 re, hunc locum vsurpare pates. F A. Apagē
 istas ineptias. M A R. Imò nihil minus quàm
 ineptias vocant Ciceroniani imitationes
 tales Ciceronis. F A. Nizoliani quidem cer-
 tē Ciceroniani. C A. En tibi, Fabi, non pro-
 sul ab ea qua de nunc agimus voce, quen-
 dā locum quem tuæ de Pleonasmō conie-
 cturæ approbatorem ipse quoq; (vt spero)
 Marcus esse fatebitur. Lēge hæc. F. *Metapho-
 ra. Quantos æruos facinorum reperietis? pro
 sylla. Omnino hic locus meam illam (vt*

dixisti) de pleonasmo coniecturam confirmat: ideoque posthac bonum me cōiectorem esse gloriabor. Manifestum est enim Nizolium, quum alicuius exemplaris margini adscriptam inuenisset eregione huius loci vocem *metaphora*, & hanc vocem & locum ipsum inde in hoc præclarum opusculum, quod machinabatur (ita enim ipsummet de eo loquentem audiui) transtulisse. M. Dum tuam vis coniecturam confirmare, & Nizolium magis ac magis ignorantia accusare, Interim eum (quod minimè vis) excusas. Quod enim iam de voce Pleonasmus parū verisimile erat, multo minus est certè de voce Metaphora, cū quæ huius esset significatio ignorasse. F. A. Atqui illūme adeo iudicio caruisse fateberis (quod tamen fateri necesse tibi foret) vt quum intelligeret quis horum nominum vsus esset, ea suo opusculo, quanuis omnino ἀνεργασίας, nihilque ad eius argumentum pertinentia, infarcire vellet? C. A. Responde, Marce, cum illo Terétiano aduocato, Res magna est: de ea amplius deliberandum censeo. Interim verò ad tuorum Cōciceronianorum Nizolianorum senatum rem referre tibi licebit: nunc autem oro te atque obtestor, hoc te finas oxorari vt sine vlla tua interpellatione huic quoque inquisitioni finem

imponere nobis liceat. MAR. Tuis precibus hoc dabq, quod Fabii precibus minimè daturus eram, vt sermoq̃ vestrum posthac non interrumpam. Sed quāuis tibi gratificer, rem ipse minimè mihi gratam fecisti quum meos symmystas Conciceronianorū Nizolianorū senatū cum irrisione vocasti. c. Meminerimus posthac, Fabi, symmystas illos appellare. FA. Meminero. nunquam autem antea audiueram, sicut poetas, ita etiam Ciceronianos, sua quædam sacra habere, ideóq; se mutuò symmystas nominare. Sed iam perge Camille. c. Vísne à *microbio* ad ei contrarium *macrobiū* veniamus? F. Volo. c. Qui igitur vulgò appellatur *Macrobius* voce Græca, is Ciceronianè loqui volenti (si Nizoliū sequimur) dicēdus fuerit M. *Valerius Coruius*, vel *Arganthonius*. t. Sed quomodo Nizolio licuit propriis nominibus significationem appellatiui nominis tribuere? c. An nondū nosti omnia Nizolio licuisse? Vide locum in quo vicissim pro proprio appellatiuum substituit. nā pro *Hermaphroditus* vult à nobis dici *Androgynus*. Si tamen verum est quod à vulgo dicitur, communem errorem facere ius, excusari hīc potest Nizolius. FA. Gaudeo istā reprehensionē à Marco non esse intellectam. falso enim à te reprehendi Nizoliū

diceret: nec immeritò fortasse. Quauis enim Hermaphroditus nomen propriū fuerit cuiusdam androgyni, & quidem omniū (vt quidam tradunt) primi: factum est tamē nescio quomodo vt ex proprio in appellatiuum, apud quosdam eorum etiam qui è vulgo nō sunt, transierit. & quidem Plinius ipse ita vsus est, si bene memini. c. Idē ergo vocabulo illi Hermaphrōditus, quod nōmini Bagoas, contigerit. nam ab vno eunuchō qui Bagoas vocabatur, nomen hoc omnibus eunuchis commune factum fuit. FAB. Caue ne fallaris. nam fateor quidem non vni eunuchō à scriptoribus hoc nomē tribui, sed ex Persica lingua profecta esse traditur hæc appellatio: atque id mihi fit verisimile. Scribitur autem vulgò & Bagous: vnde apud Nasōnem,

Quem penes est dominā seruādi cura Bagoe:
sed mihi suspecta est cum alibi, tum verò hīc, ista scriptura: præsertim quū versus non minus Bagoa admittat, quā Bagoe. Apud Græcos quidem certē scriptores non aliter quā *Βαγῶας* scriptum memini me legere. nam apud Plutarchum in Alexandro genitiuum *Βαγῶς* esse à nominatiuo *Βαγῶας*, ex alijs eiusdē Plutarchi locis patet. c. Scio & quosdā alios idem quod dixeram de appellatione illa sentire: sed iam tibi assentiri

incipio. Redeo igitur ad alia exēpla nominum partim priorū, partim ἐθιξῶν, quibus Nizolius significationē appellatiuorū dedit. Ex propriis est *Gallonius*. nam pro eo quod à vulgo dicitur *Gulosus*, vult à nobis, Ciceronianè loqui volentibus, dici *Gallonius*. atque adeo voci illi *Gulosus* totum Ciceronis locum subiungit, *viuit ut Gallonius, loquitur ut frugi ille Piso*. Ad ἐθιξῶν autē exēpla quod attinet, iam antea vidimus illum pro adiectiuo *sanguinarius* velle dici *Thrax*: nunc verò addo, pro *insensatus* iubere nos inter alia dicere etiam *Aethiops*. F A. Sæpe igitur in ore habeant necesse est Ciceroniani Nizoliani Gallonium, sæpe Thracem, sæpius Aethiopem. Quid verò quum de pluribus loqui volent? an Gallonios, Thraces, Aethiopes dicere illis licebit? C A. Nō permittet illis (vt opinor) Nizoliana regula ex vnitatis numero ad multitudinis numerum transire, nisi & hic apud ipsum Ciceronem extet. F A B. Quàm duras suis discipulis Nizolius leges imponit! C. Quid quod & vsu nonnullorū nominum quæ propria sunt vbiū, illis interdicit? F A B. Quorum? C A. Ex iis est *Messana*. vult enim pro *Messana* dici à suis discipulis *Mamertina ciuitas*. F A. Quod si illud dicere ausi fuerint, vapulabunt? C A M. Vapulabunt certè, nisi ante ictum manum ferulæ

ferulæ subduxerint. Vapulabunt itidem si *Adriaticus* dixerint, non *Adrianus*: veluti si nō *Adrianum mare* sed *Adriaticum* vocarint. Quinetiam vsu proprii nominis *Medusa* illis interdicat, eiusque loco vt *Μήμοι Γοργείων κεφαλῶν* dicant præcipit. Itidémque ne nomine *Myrrha* vtantur, prohibere velle videtur: quendam Ciceronis locum subiungēs, qui tamen quid ad *Myrrham* pertineat non video. F. A. Recita eius verba. C. A. *Myrrha*. Cic. De nat. deorum, *Pallantis filiam Mineruam amasse, & ab ea necatus dicitur*. F. A. Non credibile est ita legi apud Ciceronem. C. A. Ideo locum apud eum quæro. Eum iam inueni, vbi sicut plures *Veneres & Dianas*, ita etiam *Minervas* recenseri tradit. *Quinta* (inquit) *Pallantis, quæ patrem dicitur interemisse uirginitatem suam violare conantem*. Non dubium est autem quin hîc nominatiuus filia post genitium *Pallantis* subaudiendus relinquatur. Sed quid hæc ad *Myrrham*? F. A. Hîc quoque diuinatione opus est. Aliquis igitur (nisi me coniectura fallit) propter id quod in fabulis de *Myrrha* narratur, margini è regione huius loci nomen eius adscripserat; inde verò *Nizolius* in suū hūc libellum transcripsit, quum & hanc vocem quam non intelligebat, ad Ciceronianū sermonis leges pertinere existimaret. Quicū-

quæ tamen is fuerit qui illi Ciceronis loco Myrrhæ nomen apposuit, non recordatus est fortasse, non idem de Myrrha poetas quod Ciceronem de quinta Minerua, Palantis filia, tradere: quum Myrrha patris amore capta, contra verò huius Mineruæ amore captus pater eius fuerit. CA. Vult etiã pro quibusdã adiectiuis nominibus substantiua vsurpare Nizolius, si modò putidi (puti volui dicere) Ciceroniani esse velint, nam pro *Incombustilis* vult dici *Lituus*, addito etiã genitiuo *Romuli*. FA. Ergo quamcunq̃ rem Nizolij discipuli dicere volent non posse comburi, non eam vocabunt incombustilẽ, sed lituũ Romuli. Verum nihilne additur ad illa verba, vel in Italica vel in Germanica editione? CA. Vide ipsemet, si mihi non credis. FA. Video nihil aliud vtrobique legi, quàm hæc, *Incombustilis, Lituus Romuli*. CA. Quid verò putas mouisse Nizoliũ vt pro hac voce barbara (vt quidẽ ipse iudicat) illas substitueret? FA. Suspicio Nizolium, quum audisset, lituum Romuli, fuisse ex iis quæ igni resisterent, atque id ab ipso etiã Cicerone scribi idẽ verò & à Plutarcho traditur, si bene meminì) postea quum ad illud adiectiuũ *Incombustilis* venisset, minimẽque Latinam vocẽ inueniret quam in illius barbarę lo-

cū reponeret, dedisse suis discipulis quod ex auditione habebat, nimirum lituū Romuli. C A. Vbīnā verò Cicero de lituo Romuli hoc perhibet? F A. Libro posteriore De diuinatione. Sed perge Camille: ac primum si qua supersunt de Græcis vocibus dicenda quæ à Nizolio repudiātur, vel cōtrā in aliarum locum substituuntur, ea expedi. C A. Nimium multā supersunt, idcōque missa ea facere & ad Latina me conferre decreui. F A. Ea tantum Græca volo à te adiici quorum recordaris, ita ut minimè quærere necesse sit. C A. Ex iis certè est vox *Misanthropus*, pro qua vult dici, *Hominum aspectum lucemque uitare*: non considerans Græci illius nominis aliam vim esse, & posse fieri ut aliquis hominum aspectum lucemque vitet, qui tamen non sit misanthropos, id est osor hominū. Idem præcipit suis discipulis ut pro *Hypothetica* dicant *Connexum*. F A. Debuerat igitur addere substantiuum *Propositio* illi adiectiuo *hypothetica*. Neq; verò *Connexū* tantum (quod dicitur ut à Stoicis τὸ συννημμένον) sed etiā id quod cōnectitur, ex Cicerone afferre poterat, in libro De fato. C A. De voce *Eclogarij* idē ab illo nō docetur quod ab aliis. placet enī ei ut qui vulgò *Interlocutores* nominantur, M.ij.

ab illis *Eclogarij* vocentur. atq; huic vocabulo ista subiungit, *Nomina eorum qui in dialogis loquentes inducuntur.* Idem prohibet suis ne *Thermas* dicant, iubetque τὰ θερμά dicere. Prohibet etiam ne verbo *Disquiro* utatur: & tantum verbo *Exquiro*, aut Græco ἐξετάζω uti permittit. Alicubi verò significationes permiscet: veluti quum scribit, *Dignitas, Postulatum, Αξιωμα.* Alicubi voces Græcas affert tãquam barbaras, quæ apud ipsum duntaxat vulgus, & quidem apud ipsam vulgi fœcem, barbaræ sunt, utpote illis abutentem: veluti quum pro *Ecclesiâ* vult dici *Aedes sacra* vel *Templum*. quis enim ecclesiæ appellatione pro templo utitur, nisi omnino ferè sit ἀναλόγητος? Sed à Græcis vocabulis ad Latina mihi iã trāsire concedito: ad Latina, inquã, illa quibus Græca minimè sunt intermixta. De barbaris autem nonnullis, quibus tanquam Latinis vteretur quidam, dictum antea fuisse meministi. F. A. Hoc tibi per me licet. C. A. Aliud etiã mihi permittas velim, nullum certum ordinem tenere, sed pro arbitrio à Nominibus ad Verba, à Verbis ad Nomina rursus trāsire. F. A. Hoc quoque permitto. C. A. Interdicit igitur noster Nizolius suis discipulis usu nominis *Equiso*, & pro eo ut nomine *Agitator* utantur imperat. F. A.

Atqui *Equiso* est qui Græcis *ἵππικός*, at
verò *Agitator*, qui ab iisdem *ἀρμαπλάτης* si-
ue *διφρηλάτης* appellatur. C A. Hoc & ipse
nouit: sed vapulabunt Nizolij discipuli, ni-
si ei pareant. Prohibet idem ne vocabulo
Fauilla vtantur, & in eius locum Scintilla
substituit. F A. Atqui tantum est inter hæc
duo discrimen, quātum inter *σποδός* & *σπιν-
θήρ*. nā Scintilla est *σπινθήρ*: at Fauilla (præ-
fertim si minus exactè distinguatur à Cine-
re) *σποδός*, siue *σποδα*, siue *μαερίλη*: aut deniq;
πέφρα. Quinetiam vox *αἰθάλη* alicubi hac
in significatione posita inuenitur. C A M.
Quid? an si Nizolius nullum inter Fauil-
lam & Scintillam discrimen statuit, tenen-
tur eius discipuli vllū agnoscere? F A. Sal-
tem non erit cur vapulent, si suo magistro
bene dictata reddant. C A. *Sculptor* dice-
re fas non est Nizolij discipulis: sed pro
hoc dicendum illis est *Fictor*. Quinetiam
Statuarius ex illis est nominibus quorum v-
sus minimè illis est cōcessus: & huius quo-
que loco *Fictor* dicere iubentur. F A. Sed
tamen multum hæc inter se differunt. nam
Sculptor est qui Græcis *γλύπτης* siue *γλυφτής*:
Fictor, qui *πλάτης*: *Statuarius*, qui *αἰδριανόπι-
θός* siue *ἀγαλμασπιθός* appellatur. C A. Quin-
etiam *Macresco* suos dicere non finit Nizo-
lius, sed pro eo vt verbo *Extabesco* vtan-

tur præcipit. F A. Absit ut quicunque macrescant, tabescant. nam *Macresco* siue *Macæscō* est tātum *ἰσχνίζομαι*, at *Extabesco* est *ἐξίσχω*: sicut *Macies* est *ἰσχύς*, at verò *Tabes*, *φθίσις*. C A. Audi *ἀμαρτία* quod non minus quàm vllum ex præcedentibus miraberis. *Decimare* suos dicere prohibet: pro eo uti verbo *Decussare* iubet, addens, *hoc modo* X. F A B. Meritò certè dixisti non minus errorem hunc quàm vllum ex præcedētibz mirum mihi visum iri. non minus enim est crassus: quum *Decimare* sit *δεκατεῦν*, siue *ἐκδεκατεῦν*: at *Decussare*, *χάσσειν*. Ac, si ex iis erroribus quos proximè recensuisti vllus est ob quem vel pueri flagris digni videri possint, hic certè vel maximè. C A. An velles vapulare Ciceronianos vel pueros, vel viros, si sui doctoris præceptis obsequuntur? an velles illos ultra sui magistri dictata sapere? F A. Heu miseros discipulos. C A. Misericiores tamen futuros, si immerētes vapularent, & sua terga poenæ magistro suo debitæ vicaria præbere cogerētur. Verum oblitus eram verbi *Insesto*, cuius etiam vsum suis non permittit, & *Insestum* reddo dicere eos iubet. an verò meministi te verbum *Insestare* hac in significatione legere? F A. Tu verò an putas vllum vnquam ita vsum esse? C A. Non equidem. Sed iā

à verbis ad Nomina (ita enim mihi pro arbitrio vagari permisisti) reuertendum censeo. Credisne igitur *Classicum* & *Bellum* vnum atque idem significare? F. A. Nequaquã. C. A. Hoc tamẽ suos credere iubet Nizolius, qui eos nõ *Classicum* sed eius loco *Bellum* vult dicere. F. A. Qui tamen hoc credent, quid non credituri sunt? C. A. Pro *Dociliter* vult eos dicere *Intelligenter*: pro *Mucus* iubet dicere *Humor*: necnon *Humidus* pro *Aqueus*. Pro *Cicuritas* vult ab illis dici *Mansuetudo animi*: perinde ac si cicura animalia non essent quæ feris opponuntur, vt Græcè *ἡμερὰ ἀρείνῃς*. Hæc autem quum ita sint, nihil mirum fuerit si in illis quæ ignotiora sunt, cum peccare videamus: veluti quum pro *Cuspide* iubet *Mucronem* dicere. multos enim esse scio qui *Cuspidem* propriaque significatione à *mucrone* differre ignorent. quum in hasta (exempli gratia) *cuspis* dicatur nõ solùm *ἡ αἰχμή*, sed etiam *ὁ σαρπητήρ*, quo terræ infigitur: at *mucro* propriè sit non tota *αἰχμή*, sed eius acumen. Sed cum qui in triuialibus errarit, in *ᾧς*, quæ perinde vulgaria non sunt, errare mirum videri non debet. Ideo etiam non miror nomen *Infumibulum* ab eo cum nomine *Vaporarium* confundi: nec voces *Pulmentarium* & *Plantarium* cum vocibus

Pulmentum & *Planta* confundi : & dicere *Fundus* idem esse quod *Feudatarius*. Quinetiam seu verum seu falsum quarundam vocum usum non in vno loco ponit. Exempli gratia, quum pro *Circumferentia* dicere *Libramentum* iussisset, rursus in voce *Superficies* illam *Libramentum* pro hac substituit. Et quum in *Conditionalis* præcepisset suis ut vocabulo *Connexum* pro illo uterentur, iterum in nomine *Hypothetica*, illud huius locum reponit. In hoc etiam peccat quòd ea vocabula quorum alioqui latius patere potest significatio ad dito genitiuo non restringit, ut ita dicam. F. A. Nisi exemplum afferas, vix assequar quod nunc à te dicitur. C. A. Duo afferam. Pro *Corporatura* vult dici *Habitus*, quum adiecto genitiuo *corporis* dicendum esset, *Habitus corporis*. Alioqui enim est *Habitus* non solum corporis, sed etiam peculiariter oris : est & vestis habitus : est denique & habitus animi. Sic pro voce barbara *Complexio* præcipit ut *Constitutio* dicatur, quum addendus esset idem ille genitiuus *corporis*. Solet enim adiacere, nisi eius iam facta fuerit mentio, aut aliquid præcesserit quod ad ipsum referri ostendat. F. A. Nunquam ego credidissem Nizolium tam multa ignorantiae suae pariter & negligentiae testimonia in illo suo o-

pusculo reliquisse. C A. Multos alios esse scio qui id nunquam sibi persuadere potuissent. Sed addendum etiam est audaciæ. perinde enim ac si per quãdam metempsychosin rediuiuum in seipso Ciceronem sentiret, ea etiam verbis Ciceronianis à se efferri posse existimauit quæ non solum incognita & inaudita Ciceroni fuerunt, sed ne vllam quidem cum ijs affinitatem habent quæ ille cognouit. Hinc fit vt non solum pro Episcopo nomen quoddam tanquam Ciceronianum substituere audeat, (inuēturus fortasse & quod pro Cardinali ex eodẽ Cicerone substitueret, si fœcūdū concutere pectus voluisset) sed etiam quomodo *Missæ* Ciceronianis verbis appellanda sit tradat. F A. Sed vtro modo vult suos Ciceronianos loqui? vtrum *Missam* audire, an *Missam* videre, vult ab illis dici? Nam Italos sequendo *missa* videtur, ab alijs autẽ multis *missa* audiri dicitur. C A. Ad hæc arcana non penetrauit. Sed audi quomodo illud etiam quod vulgò dicimus, *Euangelium secundum Lucam*, ex Cicerone emēdet. F A. Quænam est, obsecro, illa emendatio? C A. *Euangelium Lucæ*. F A. Et fuit tamen Christianus Nizolius. M A R. Tūne hac etiam de re dubitas? F A. Propemodum dubitare me cogit illud quod à Camillo ex

eo affertur. quomodo enim illi in mentem non venit, fore ut se horrendo crimine læsæ maiestatis diuinæ contaminaret, si quod ipsi Euangelistæ appellarunt IESV CHRISTI Euangelium, eorum ipse Euangelium vocaret? Quomodo non animaduertit, si itidem pro his verbis *Euangelium secundum Marcum*, substitueret illa, *Euangelium Marci*, lectorem miraturum, quod in titulo dictum sit *Euangelium Marci*, statim post ab ipso Marco Euangelium IESV CHRISTI appellari? M. Aliud est, Latinè (præsertimque Ciceronianè) aliud, Christianè loqui. Adde quòd ipse Paulus suum Euangelium alicubi vocat, ni fallor. F A. Vocat quidem certè, sed alia ratione: neque dubium lectori relinquit quomodo id intelligendum sit. quum enim passim *Ἀγγελίον τοῦ Χριστοῦ* appellet, alicubi etiam *Ἀγγελίον τοῦ Κυρίου*, siue *τοῦ Θεοῦ*, suum vocare se satis ostendit cuius factus sit *Ἀπόστολος*, ut alibi loquitur: ita ut τὸ *Ἀγγελίόν μου* alijs eius ipsius verbis exponi queat τὸ *Ἀγγελίον* τὸ *Ἀγγελιστὴν* ἢ τὸ *ἔμολ*. Denique quum dicit Euangelium meum, perinde est ac si diceret, Euangelium à me prædicatum, siue promulgatum: aut Prædicatio mea siue promulgatio Euangelij, vel, Doctrina Evangelica quæ à me promulgatur. M A R. Aliud est,

inquam, Latinè loqui (præfertimque Ciceronianè) aliud, Christiane. C A. Non animaduertis Fabi, Marcum eandem semper velle cantilenam canere? & de his apud eum differere, nihil aliud esse quàm fabulā asino canere? surdo dicere volui. Itaque desinamus in illam eius censuram inquirere qua reprehēdit eos interpretes qui *καὶ Λου-
καῖ* reddiderūt Secundum Lucā: & demus illi, non satis Ciceronianè loquutos esse: quid? eīne ipsum etiam Ciceronem in illo ipso vocabulo reprehendere per nos licebit? F A. Imò verò ne per Ciceronianos quidem ei licere debet Ciceronem reprehendere. Quid enim aliud hoc fuerit quàm suę ipsos doctrinæ fundamenta conuellere, & quasi nauem suam perforare? C A. Ostendā tamen hoc ab eo fieri. nam *secundum virtutem uiuere* reprehendit; tanquam non Ciceronianè dictum, quum tamen ipse Cicero illa præpositione siue illo aduerbio *Secundum* ita vtatur. M A R. Dicitne Cicero *Secundum* virtutem uiuere? C A. An huic accusatiuo iungat, nescio: sed ab illo dici scio *Secundum* naturam uiuere. M A R. Diuersi sunt isti accusatiui. C A. Quæ est ista Ciceronianorum Nizolianorum superstitio? si apud Ciceronem lego *secundum naturam uiuere*, item *Enatura uiuere*, cur non

pro eo quod ab illo dicitur *Ex uirtute uiuere*,
dicere etiā liceat (si varianda sit oratio) *secundum uirtutem uiuere?* M A R. Tanta libertas nobis non conceditur. F A. Misera est igitur Ciceroniastrorum natio, quæ se tam arctis compedibus vinciri sinit, vel potius ipsamet tam arctas compedes sibi impingit. Sed quæ est illa tam attenta cogitatio in qua Marcum nunc versari uultus eius præ se fert? C A. Non aliud eum cogitare puto quàm miram esse eorum qui in Ciceronis verba non iurarint licentiam: quippe qui hanc etiam Ciceroniastrorum appellationem sibi permittant. F A. Valde miratus & ipse Nizolius fuisset talem appellationem, ac nequaquam Latinè, nedum Ciceronianè eam posse dici contendisset. Imò verò ne illud quidem aduerbium Ciceronianè pro Ciceroniano habendum dixisset. C A. Quid mirum, quum etiam quædā verba ex ijs quæ apud Cicronem extant, & quidem absque vlla deprauationis exemplarium suspicione, Nizolius pro Ciceronianis non habeat? Possit tamen utcunq; huic errori venia dari, quòd eum aliqua ex parte agnouisse videatur. Nam in ea illius opusculi inscriptione quæ est in prima editione Italica (Basilienfis enim valde diuersam habet) postquam dictum est, *vocabula*

quædam barbara, uel Latina quidem, sed non Ciceroniana, quo pacto Ciceronis more, id est Latinissimè & elegantissimè, dici possint: additur, In quibus tamen nonnulla sunt quæ mihi, quum hæc scriberem, Ciceroniana uidebantur: sed librum aut locum in quo essent, non memoria tenebam. F A. Atqui hæc addens, non minus accusare se quàm excusare videtur. dum enim vult nobis persuadere se suspicatum esse illa extare apud Ciceronem, suam in illis nihilominus repudiandis temeritatē prodit. C A. Alius est non minus periculosus error, quem non itidem agnouisse dici potest. F A. Quisnam? C A. Quòd, sicut adimit Ciceroni quædam ex ijs quæ eius sunt, ita vicissim nonnulla quæ eius non sunt illi tribuit. F A. Memini me in quodam Henrici Stephani Dialogo, qui inscriptus est Pseudocicero, aliquot legisse vocabula, quæ ille Nizoliū ita Ciceroni affingere queritur. C A. Me quoque ibi ea recordor legisse: sed multo inuenire plura potuisset, si plus temporis in quærendo ponere uoluisset. Ab eo enim vnà cum nomine *Fætosus* non commemoratur etiam nomen *Maleficiosus*, quod alioqui est eiusdem ordinis: neque ubi fit mentio diminutiui *Capitulum*, aliud quoddam ei additur, *Disculus*. F A. Quid? nonne & *Mendaciunculum* cum

his commemorandum esset, quanuis non
 solùm à Nizolio, sed ab alijs etiam quibus-
 dam pro Ciceroniano agnoscat? F A. De
 hoc dubito. sunt enim qui non *Mendacium-
 culus* apud Ciceronem legant, sed *Mendacio-
 lis*: verùm non desunt qui illud defendant.
 Quinetiam nomen illud *Disculus* talè di-
 minutionis formam non habere fateor ut
 ob eam repudiari debere videatur: sed fal-
 sò tamen ex quodam loco epistolarum ad
 Atticum affertur. Hoc enim est cuiusdã ex
 libro quarto principiũ, in primis editioni-
 b⁹, *Multa me in epistola tua delectarunt: sed mihi
 magis quàm patina tyrotaricha cœnam parari
 disculo. Quod scribis, μύπω μέγ' ἔπης, &c.* quũ
 scribendum sit (ut postea ex veterum libro-
 rum fide scriptũ fuit) *Multa me in epistola
 tua delectarunt: sed nihil magis quàm patina
 tyrotarichi.* Nam de raudusculo quod scribis,
μύπω μέγ' ἔπης, &c. Hac autem voce exiguũ
 æs significatur, quòd æs prisce raudum ap-
 pellarent: hũc autem ea Cicero exiguum
 sumptum intelligit. qui eadem aliquota-
 lijs locis vtitur: sed in iisdẽ illis primis edi-
 tionibus scriptũ fuit litera maiuscula eius
 principium, perinde ac si loci nomen esset:
 quinetiam alicubi raudusculo in Randuscu-
 lo fuit mutatum. F A. Perge in enumeratio-
 ne illorum vocabulorum quæ Henricum

Stephanum addere potuisse dicis ijs quæ Nizolius falsò Ciceroni adscribit. C A. Ex ijs est etiã *Cohærarium* & *Æquilibrium*. ceterorum autem ne ipse quidem recordor. Sed memini me apud Nizolium hanc quoque nouitatem obseruare, quòd ex duabus vocibus vnã, ex vna vicissim duas faciat. veluti quum vult vnicam esse vocem *Benedicta* in hoc Ciceronis loco, *Bene dicta* malè interpretari: & vicissim *Malefacta* in duas diuidi, in isto, *Beneficia* malè locata, malè facta arbitror. Quam lectione si sequeremur, pro Ciceroniano habendum esset hoc loquendi genus, *Beneficium* facere malè. Quòd si hoc, etiã illud, *Beneficium* facere bene. F A. Sicut attulisti exempla eorum quæ Nizolius Ciceroni falsò adscribit, ita velim exempla quæpiam proferas eorum quæ illi adimit. C A. Non loquar de ijs vocabulis quæ exemplarium discordia controuersa potest reddere (quorū in numero est *Incorporeus*, præsertim quum à Gellio minimè pro Ciceroniano agnosci videatur) neque de ijs quæ si apud illum extant, valde saltē rara sunt, vt verbum *sæuere*, verbale *Contemptus* (quæ, sicut alia multa, & quædam etiam loquendi genera, ex quibus est, *Bona uerba*, etiamsi non extarent in vllò eorum quæ ad nostram ætatem peruenerunt Ciceronis

librorum, eiusmodi sunt tamen ut credibile sit in quopiam eorum qui interciderunt extare: sicut nonnulla in vnico loco eorū omnium quos habemus eius librorū videmus reperiri) nō iam, inquam, de illis loquar: sed de vno quod meritō valde suspectam omnibus Nizolij fidē reddiderit.

FA. Dic sodes quōdnam illud sit. CA. *Malus*. FA. Etiamne vocabulum *Malus* à Nizolio tāquam minimē Ciceronianum reii-citur? CA. Reii-citur in illo Indice. FA. Etiamne in editione Italica? CA. De Bast-liensi saltem affirmare possum. FA. Mirum si in illa potius quàm in altera repudietur illud nomen, quum contrā Cælius Secundus, qui ei præsuit, hanc saltem maculam eluere debuerit. Sed quænam Ciceroniana pro illo *Malus* minimē Ciceroniano ibi substituuntur? CA. *Flagitiosus*, *Nequam*, *Impurus*, *Improbis*, *Sceleratus*. FA. Ergone quicunque malus est, is Ciceronianè loqui volentibus est flagitiosus? est impurus? est sceleratus? Proh quàm periculosum fuerit haberi malum à Ciceronianis Nizolianis! CA. Malos certè homines nos vocare Marcus non ausit; at flagitiosos, nequam, impuros, sceleratos appellare non dubitet, si superiorum altercationum recordetur.

FA. Quid? an *Malus* homo Ciceronianè dici

dici putas? C A. Vnde tibi in mentem venit hac de re dubitare? F A. Quia recordor, diu multumque dubitatum esse à quibusdam Ciceronianis an Ciceronianum esset dicere Bonus homo : & an sicut Bonus vir , ita etiam Bonus homo à Cicerone diceretur. non minus autem videtur esse rationi consentaneum vt de illis vocibus Malus homo, quàm vt de his Bonus homo, ambigatur. C A. Ate facta boni hominis & boni viri mentio in memoriam mihi reuocauit Nizolianam quandam præceptionem quam prætermiserā. F A. Quænam ea est? C A. Vt dicamus *Bonis temporibus*, non autem *Antiquitus*: & quidem Ciceronem hîc quoque sequendo. F A. Vbi, quæso, Ciceronem ita loqui dicit? C A. Libro De off. secundo. F A. Ipsumne locum affert? C A. Nequaquam: sed eum facîle inueniam. F A. Iam inuentum cuperem. C A. Desine hoc cupere. nam voti es compos. Audi igitur: *Quanquam intelligo in nostra ciuitate inueterasse iam bonis temporibus ut splendor ædilitatû ab optimis uiris possituler.* F A. Si igitur Nizolio fidem habeamus, hæc verba, *inueterasse iam bonis temporibus*, dicemus idem valere quod *inueterasse iam antiquitus*: at ego Ciceronē non tam voluisse antiqua tempora significare dico, quàm simpliciter superiora tempora (vt

etiam Superiori memoria solet dicere) quibus bonus erat reip. status, ob incorruptū disciplinæ genus. Alioqui fateor valde illo etiā seculo laudatū fuisse antiquorū disciplinam & mores: adeo quidem ut antiqui mores & antiqua disciplina velut in proverbium abierint. Fateor etiam in Gallico sermone hanc boni temporis appellationē aliquādo dari priscis tēporibus: veluti quū dicitur *A la maniere du bon temps*. Verūm ut eò redeam vnde sum digressus, non minus rationi consentaneum mihi videri dico ut de his vocibus Malus homo, quā de his, Bonus homo, dubitatio iniiciatur. C A. Imò fortasse aliter iudicāres si Ciceronianus Nizolianus esses. F A. Hanc ego metamorphosin deprecor. C A. Hoc tamen ex ea metamorphosi commodum perciperes, quòd omnes scriptores præter Ciceronem impunè negligeres. F A. Etiamne Plautum, Terētium, Cæsarem, Sallustium? C A. Etiam hos. F A. Quomodo autem aut quo iure Plautum etiam & Terentium reiiciunt qui ab ipso Cicerone tantum abest ut reiecti, ut magno in pretio, quod ad sermonem attinet, habiti fuerint? C A. Nulla omnino coram illis Plauti facienda est mētio: quia statim clamabunt omnia apud eum esse obsoleta. F A. Mentientur quidem certē

sed missum tamē faciamus Plautum: quid verò causæ dicent quin Terentium admittant? *Sequiturque sum* (inquit ad Atticum ipse Cicero) *non dico Cæcium* (malus enim autor Latinitatis est) *sed Terentiū, cuius fabellæ propter elegantiam sermonis putabantur à C. Lælio scribi.* C. A. Quid prætexere possint nescio: sed ab eorū præceptore Nizolio reiici aliquot vocabula video quæ apud Terentiū etiam extant. ex quibus sunt, *Incogitans*, *Infortunium*, *Ringor*, *Remordeo*. Quòdque indignissimum atque adeo contumeliosissimum est, hæc quoq; Terentiana vocabula in medio illius colluiei, in qua cū alia tum etiam *Barbitonsor*, & *Becchata* & *Homagium* iacere diximus, collocat: tanquam *πάρτα ὑπὸ μίαν Μύκωνον* ponenda sint. Quid mirum autem si quædam reiiciat quæ nos non alijs quàm Plauti aut Terentij auctoritate confirmare possumus, quū eum nonnulla repudiare non pudeat quæ non tam quis quàm quis non usurpauerit ex primarijs linguæ Latinæ scriptoribus, quærendū est. Exēplo erit aduerbium *Properé*. hoc enim nō tātūm Plautus & Terentius vsi sunt, sed Sallustius etiam, Cæsar, Liuius, Virgilius, Horatius. F. A. Itāne hoc etiam vocabulum reiiciendum censuit Nizolius? C. A. Si mihi fidem nō habes, hæc lege. F. A. Non

quòd tibi fidem derogem, sed præ admiratione ita loquutus sum. Quod autem aduerbium in locum illius substituit? C A. *Festinanter*. F A. Sicut *Festinare* & *Properare* inter se differre quidam olim putauerunt, ita etiam inter *Festinanter* & *Properè* aliquid esse discriminis aliquis fortassis obiiciet. C A. Quomodo verò vllam inter hæc differentiam Nizolius perspicere posset, cuius oculi ne ad eam quidem quæ est inter *Properus* & *Præproperus* perspiciedam sunt satis acuti? F A. Non tantum parum acutos sed valde hebetes mihi narras oculos. C A. Tales sunt tamen. nam si id perspicere discrimen potuisset, non dixisset quod hîc vides, pro *Properus* dicendū esse *Præproperus*. F A. Video sanè: simul verò & aliud quod ei valde est propinquū, & à te miror fuisse prætermisum. C A. Quid? an omnia huius Nizoliani opusculi siue *σφάλματα*, siue *πλάσματα* me tibi allaturum promiseram? F A. Insigniora saltem omnia à te expectabam. C A. Ne ea quidem omnia me tibi exhibiturum receperam. Sed quòdnam illud est, quod tu inter insigniora numerandum censes? F A. Quòd vult pro *Propatulus* dici *Proptius*, quasi hoc idē valeat quod illud. C A. Imò verò multa sunt à me prætermisssa *πλάσματα*, quæ multo sunt isto insigniora. vîsne

aliqua proferam? F. A. Malim nos vnde digressi sumus reuerti. C. A. Ne ipse quidē id nolim. F. A. Putásne Nizolium, quum aduerbium *Properē* reiiceret, sciuisse, Plautū, Terentium, Sallustium, Cæsarem, Liuium, Virgilium, Horatiū, eo vsos esse? C. A. Eum hoc minimè sciuisse persuasum habeo, & quosdam ex his ne legisse quidem vnquā: sed etiā si apud illos omnes extare vocabulum illud non ignorasset, non minus reiecturū fuisse puto, non alia de causā quā quod apud Ciceronem non cōpareret. F. A. Atqui multorū vocabula recipit Nizolius qui Ciceronis quidem ætate vixerunt, sed Ciceronianè nō scripserunt. Nam primū quidem quod ad illos attinet quorum epistolæ Ciceronianis insertæ sūt, quotusquisque eorum eundem habere stylum dici potest? Ipse filius à patre hac quoq; in re degenerat, si ita hoc vti verbo licet: ac nihilo magis frater orationis fraternæ elegantia & succum assequitur, vel in suis epistolis vel in suo De petitione cōsulatus libello. De alijs autem quid dicemus? totus liber octau⁹ habet M. Cœlij epistolas, decimus non paucas Planci, tres Asinij Pollionis, duas M. Lepidi, vnā Ser. Galbæ: libro duodecimo duæ sunt Lentuli, vna Trebonij, vna Matij. libro quarto insertæ sunt duæ

Seruij Sulpitij, vna Marcelli : libro quinto, duæ Q. Metelli, duæ P. Vatinij, vna Lucceij: denique per totû illud epistolarum volumen sparſæ sunt & aliorum epistoia, Catonis, A. Cæcinnæ, Curij, Dolabellæ, Bithynici, præfertimque Caſſij, D. Bruti, & M. Bruti: cuius etiam nonnullæ extant inter eas quæ à Cicerone ad ipsum scriptæ fuerunt, & ſeorſum editæ. Inter epistolâs autem ipsius Ciceronis ad Atticum, quædam sunt eiufdem Bruti, quinetiam Cæſaris & Pompeij. Ex his verò omnibus epistolâs quas eſſe Ciceronianas, id eſt, Ciceroniano ſermone ſcriptas, dicere poterimus, & quidem aſſentientibus illis qui ſe Ciceronianos haberi volût? Ipſe Paulus Manutius, eorum velut anteaſignanus (hos autê à Ciceronianis Nizolianis diſtinguo) ſuis in epistolarum volumê ſcholijs de Cæliani ſermonis in epistolâs aſperitate queritur, eadêmq; Aſinio Pollioni obiicit. Idem de hoc loco epistolæ cuiusdam Ciceronis filij loquês, *Nam cûm omnia mea cauſa uelles mihi ſuccèſſa, tum etiam tua, poſitû eſſe ait Succèſſa pro Succèſſiſſe: quod tamê Latini ſermonis cõſuetudinê vix ferre videri. Quibus addit, Omnino mirari ſatis nō poſſum, nō modò ab elegâtia & copia ſed interdum etiam à proprietate paterni ſermonis lōgè diſtare*

orationē filij. quod volūtatis potius quàm naturæ vitium esse arbitror. Verùm ego etiam si dem Manutio, sermonem filij Ciceronis à paterni elegantia longè abesse, nō tamen dederim eum ita hīc scripsisse: potiusque voces illas, *mihi successa*, aut *mihi successisse*, adiectas esse ab aliquo crediderim cui nouum illud genus loquēdi videretur, *Omnia mea causa uelles*. Ac videtur profecto magnam Ciceronis filio iniuriam facere Manutius quum eum ita scripsisse credit. Vt autem quū dicitur, *Omnia mea causa uelles mihi successisse* (nam hoc etiam modo potius quàm altero scriptum fuisse putato) non dubito quin redundant hæc, *mihi successisse*: ita vicissim quum dicitur *Vo'o tua causa*, suspicetur fortasse quispiam deesse *omnia*. C A. Magnam ea in re à Manutio fieri Ciceronis filio iniuriam, tibi assentior: sed magis miror ab eodem Manutio locis plerisque Ciceroni patri sollecissimos obijci: ac multo hanc siue iniuriam siue contumeliam grauiorem esse dico. F A. Quid ais? C A. Quod verum esse comperies, si libeat nuper editum Henrici Stephani dialogum, qui Pseudocicero inscribitur, legere. M A R. Imò ego (iam enim ira silentium me cogit rumpere) ipsum Manutium à te magna iniuria affici cōtendo, quippe

qui criminis falsò à te insimuletur. CA. At ego te non patiar hinc priùs discedere, quàm te dialogus ille Henrici Stephani (cuius acerrimo certè patrocínio Cicero aduersus Manutium defenditur) non autè me mendacij conuicerit. FA. Huic priùs sermoni finis est imponendus: præsertim quum iam Marcum, sicut antea, auditore simus habituri. CA. Illi priùs finè imponi & ipse cupio. FA. Dicebā, Marce, me mirari, à Nizolio cùm alios quosdam è primarijs scriptoribus excludi, tum verò Terentium: interim tamè multos recipi qui etate quidè Ciceronis vixerunt, sed nequaquam Ciceronianè scripserunt. MAR. Audiuì quæ à te super hac re dicta sunt: sed aures præbere me tuo sermoni dissimulabam, ne tibi respondere cogerer. Respondebo tamè quod Ciceronianos quosdam respondentes audiui. FA. Rem vtrique nostrum gratissimā facies. MAR. Quū videret Nizolius noster, eorum quos nominasti epistolas illis esse insertas quæ ab ipso Cicerone sunt scriptæ, itidémque quandam Sallustij orationem orationibus ipsius esse insertam, quinetiam Q. fratris libellum De petitione cōsulatus illius operibus adiectum esse; quæ tam longa series annorum à Cicerone non disiunxisset, disiungere se à suis in Ciceronem ob-

seruationibus non debere existimauit. F A. Nullumne alioqui delectum, nullum iudicium adhibuit? C A. Quod iudicium ab eo adhibitum esse velles qui iudicio caruerit? M A R. Bona verba, Camille. C A. Atqui, vt dixit tragicus, Οὐκ ἔς' ἄπ' ἔργων μὴ καλῶν ἔπῃ καλὰ. qui autē me ἀληθείην negabis? nōne videmus eum non solū illorum omnium quos nominauimus vocabula, sed vetustorum etiam poetarum, Ennij, Accij, Pacuij, Lucilij quædam omnino obsoleta, vocabulis Ciceronis sub eiusdem nomine immiscuisse? Quinetiam siquid Cæcilij nactus est, quanuis eū Cicero malum auctore Latinitatis fuisse queratur, non sub alijs quàm ipsius Ciceronis nomine protulit. Quæ enim Ciceronis vocabulis apud eum permista leguntur, non præfixo alijs scriptoris nomine, vt internoscantur, cui alij quàm Ciceroni adscribēda existimentur? F A. Non satis sum memor, an vbi illorum veterum poetarum affert vocabula, lectorem moneat. C A. Ego verò optimè recorder minimè ab eo moneri. sed in rem præsentem ire satius fuerit. Hic iam habemus *Adulo, as*: & *Adulor, aris*: tanquam vtrunque ab ipso Cicerone dicatur: quum tamē illa vox actiua sit ex versu cuiusdam veteris poetæ, qui à Cicerone citatur. F A. Illius

versus memini. C A. Hic verò est *Lætificus*. & subiungitur, Cic. *Tuscul. Vites lætificæ non intermittunt pampinus pubescere.* F A. Ne *Tristificus* quidem, ut opinor, & *Luctificus*, omiserit. C A. Nisi autem vererer ne tibi horrorem incuterem, ostenderem etiam *Horrificus*, & *Horrifonus*. Sed ecce tibi aliud adiectivum, quod itidem ad tristitiâ pertinet, *Obnubilus*, & ipsum tanquam Ciceronis vocabulum. En tibi aliud eodem pertinens, *Tenebricus*. Sed nescio quomodo hæc ad tristitiam pertinentia vocabula sese alia ex alijs offerūt. vercor ne hic talium verborum concursus mali sit ominis. Addendum tamen est *Biformatus*. F A. Quàm bellum hoc vocabulum, & Ciceroniano sermoni conveniens! Verùm aliquas etiam voces profer ex earum genere quas grammatici ad eam orationis partem referunt quam verbum appellant. C A. Ex illis est *Grandescere*, *Incurvescere*, *Verrũcare*, *Expectorare*. F A. Quædam sunt ex vocabulis à te commemoratis, aliisque eiusdem generis, quibus si utitur Nizolij discipuli, tanquam Ciceronianis, haud fortassis excusandi fuerint: etiã à Nizolio minimè admoneantur, Ciceronis non esse, quanvis apud Ciceronem inveniuntur (talìa autem sunt ista, *Horrifex*, *Anxifer*, *Flammifer*, *Tardigradus*, *Biformatus*

& inter illa quæ appellantur à grammaticis verba, *Verruncare*, *Expectorare*. quis enim ex ijs cui tantillum sit iudicij, hæc nomina esse poetica, nullique soluto sermoni, nedum Ciceroniano, conuenire non videat, quum nescio quid poeticum, & quidem tragicum, præ se ferant?) sed alia sunt vicissim quæ vt pro Ciceronianis à Nizolio exhibentur, ita tâquã Ciceroniana ab illis recipi, & suo sermoni soluto adhiberi, & non mirum & venia dignum fuerit. Nam vt *Horrifer* & *Horrisonus* suspecta habere poterit, quòd talibus compositis Ciceronem non gaudere videat: non etiam *Horrificus* (exempli gratia) suspectum illi fuerit: quippe qui contrà terminationem hanc in quibusdam compositis à Cicerone amari obseruari. Idem & de nomine *Cordatus* dico, & de verbo *Grandescere*. quis enim hæc Ciceroniana non esse, quanuis legantur apud Ciceronem, suspicetur? præsertim verò quum multa apud eum extent vocabula in quibus non minorem nouitatem & insolentiam aut etiam audaciam agnoscamus? M A R. Quid? tunc etiam nomen *Horrificus* & verbum *Grandescere* in eorum numero ponis quæ licet apud Ciceronem extent, non sunt tamen Ciceroniana? F A. Pono quidem certè. M A R. Atqui non aliis

poetæ quàm Ciceronis est hic versus,

Lentiscus triplici solita grandescere fœtu.

F A. Fateris interim non esse Ciceronis oratoris, sed Ciceronis poetæ. M A R. Quasi verò Cicero orator, historicus, philosophus, poeta, non sit vnus idémque Cicero.

F A. Quasi verò quū de Ciceronis sermone loquimur, de alio quàm de soluto (ita enim vocare possum) intelligamus: & quasi nō habeamus alios ex quibus melius quàm ex Cicrone poeticum sermonē petere possimus. M A R. An igitur Nizolium vocabula quibus Cicero in carmine tantūm vtitur, à cæteris separare oportuit? F A. Nullus, nisi qui verè Nizolianus sit, negauerit quin Nizolius hoc facere debuerit. Non tamen ita separare vt seorsum ponerentur, sed aliqua saltem nota distinguere, aut certè in singulis lectores admonere. C A. Potuisset etiam semel lectores præmonere in sua præfatione, vt in suo sermone nō omnibus promiscuè vocabulis vterentur quæ in Ciceronis Phænomenis Arateis legerent, sed quædā carmini reseruanda esse scirent. at nunc vnde nosse poterit Nizolij discipulus *Parillus* (exempli gratia) Ciceronis quidem esse, sed duntaxat Ciceronis carmen scribentis? M A R. Ad illud verò adiectiūm *Horrificus* quod attinet, id non in carmine duntaxat

vsurpat Cicero, sed etiam in soluto sermone: nimirū in oratione quā habuit pro domo sua: *Sed quid ego uestrā crudelitatem expromo, quam in meipsum ac meos adhibuisti? qui parietibus, qui tectis, qui columnis ac postibus meis horrificum quoddam et nefarium omni que imbutum odio bellum intulisti?* F. A. Controuerfam ibi esse hāc lectionem respondeo: & annotari pro *horrificam* repēriri in quibusdam vet. libris *hostificam*. ex quo faciendū videri *hosticum*. Verū esto, hanc vocem ibi minime posse in dubium vocari, id certē non pro Nizolio sed contra Nizolium facit, atque id quod dixi comprobat. Nam si etiā *horrificam* vsurare in soluta oratione non dubitat Cicero, quanuis carmini sit aptius, nōne malē de suis discipulis meretur Nizolius, dum lectorem non admonet quānam ex illis ita sint obsoleta ut mirum non futurum sit si plerisq; sordeāt: (ut obsoleti tecti sordes dixit Flaccus) aut quānam ita poetica ut nullum alibi quā in carmine locum habere possint? Alioqui enim respondebunt discipuli, se poetica quādam in soluta oratione vsurpantes, Ciceronis sequutos esse exēplum. C. A. Quomodo, obsecro, expectanda fuisset hāc admonitio ab homine qui iudicio (ut antea dixi) carebat? M. A. R. Caruit iudicio Nizo-

lius? C A. Nihil quidem certè iudicij in opere suo adhibuit. M A R. In quare ad illud pertinente iudicium desideras? C A. Imò verò dicere vix possim in qua non desiderem. Prima est, quòd eas sine delectu ex omnibus scriptis quæ Ciceronis nomē præferebant, collegerit: adeo vt orationibus insertas declamationes quasdam, quæ nihil minus sunt quàm Ciceronianæ, perinde ac si non minus pro Ciceronis orationibus habendæ quàm vllæ aliæ essent, non minori honore dignatus fuerit. F A. Eam intelligis quam habuisse dicitur ad populum & equites Romanos antequam iret in exiliū: eam item qua respondere Sallustio dicitur. C A. Eas profectò. F A. Nónne autem & ex Sallustiana (vt vocatur) in Ciceronem oratione vocabula & loquendi genera collegit? C A. Dubitas? si qua scripta Nizolius non dicam Apuleij (qui fortasse non tam malus est autor Latinitatis quàm vulgus putat) non dicam Solini, non dicam Spartiani, non Lampridij, non Vopiscij, non Trebellij Pollionis, non Ammiani Marcellini, non Macrobij, non Iulij Firmici, non Fulgentij, non dicam denique C. Sollij Sidonij Apollinaris, aut aliorum huius farine, sed eorum à quibus leges illæ Salicæ, Allemannorum, Boioariorum, aliorumque

multorum conscriptæ sunt, libris Ciceronis inserta reperisset, pari certè honore in colligendis suis obseruationibus ea affecisset. F A. Mirum est profectò quædam ab eo pro Latinis recipi quòd in illa oratione extant quam Sallustio falso adscribi manifestissimum est: quum interim in illa quam modò examinauimus Appendicula, siue in illo Indice, multa tanquam barbara reiciantur, quæ in libris verè & sine controuersia Sallustianis extant. C A. Imò minimè hoc mirum esse debet in homine iudicio carènte. Sic etiam, quanuis ea quoque vocabula repudiarit quæ apud Terentium extant, quòd ea non legerit apud Ciceronem, ea tamen quæ sunt in ijs locis quos citat Cicero, admittit, sed tanquam Ciceroniana, nulla Terentij facta mentione. Quòd si cōtigisset vt bona comœdiarum huius pars Ciceronianis libris esset inserta, non minus libenter quæcunque in ea occurrissent sine vllò discrimine admisisset. F A. Sed aliud est, locum aliquem scriptoris cuiuspiam ab ipso Cicerone citari: aliud, scriptum aliquod Ciceronianis esse insertum. Adde quòd hæc comica quæ Ciceronianis intermiscet, Terentij sunt, non Pseudoterentij: at verò illa oratio cuius itidem verba & loquendi genera inter Ciceroniana ponit,

(lectorem non admonens, aliū quā Ciceronis illa esse) non Sallustij est, sed Pseudosallustij. C A. Fateor, multo magis hīc quā illic à Nizolio, & cum multo maiore lectorum periculo peccari. Sed iam recordor, inter scripta quę Ciceroni falso adscribuntur nō enumeratam fuisse iliam ad Octaviū epistolam. F A. Illam certē ipse quoque alicuius esse puto qui se declamatorum more exercere voluerit. neque verō dissimulabo, mihi quoties & hanc epistolā & orationes illas Ciceroni falso adscriptas lego, in mentem venire verba illa quę cum alibi tum in Anthologia Græcorum epigrammatum leguntur, *Τίνας αὖ εἶποι λόγους.* C A. Non satis memini ipse horum verborū. F A. Non recordaris horum quę libro primo leguntur? *Τίνας αὖ εἶποι λόγους Πύρρος ὅπως δὲ Τροίας.* item, *Τίνας αὖ εἶποι λόγους Διὶ δάμεια, ὅδ' Πύρρου πορθήσαντος πλὴν Τροίαν.* item, *Τίνας αὖ εἶποι λόγους Ἀχαιῶν Ἀγαμέμνονος πρῶτον.* item (vt alios prætermittam qui interiecti sunt locos) *Τίνας αὖ εἶποι λόγους Ἐλένη μοι μαχρῶν Μενελάου καὶ Πάριδος.* C A. Incipio iam in memoriam horum verborū redire, *Τίνας αὖ εἶποι λόγους,* eāque & alibi me recordor legisse. Sed quod ad illam Octavio scriptam epistolam attinet, non ita eam omnes docti vno cōsensu reiiciunt vt illæ oratio-

orationes. F A. Hoc inde fit quòd Cicero-
 nis stylum autor eius paulo melius imite-
 tur. Sed iam verba illa, *τίνας αὖ ἔπει λόγους*, si
 non ad hanc epistolam, at certè ad quam-
 piam ex orationibus illis aptemus: atque
 (exempli gratia) in locum istius tituli La-
 tini, *Cicéronis oratio antequàm iret in exilium*,
 hunc Græcum substituamus, *τίνας αὖ ἔπει
 λόγους ὁ Κικέρων πρὶν φυγαδεύθῃαι*, siue *μέναν
 φυγαδεύθῃαι*, aut *ἐξοριθῃαι*. C A. Nunquàm
 ne Fabi quandam Aonij Palcarij orationē
 vidisti quam in L. Murenam scripsit? F A.
 Fama duntaxat mihi nota est illa oratio,
 nunquam à me lecta. C A. Nunc mihi in
 mentem venit, si in editione qua vsus est
 Nizolius, orationi Cicéronis pro Murena
 typographus eam subiunxisset; eodem il-
 lam quoque honore affecturum fuisse
 Nizolium quo Pseudosallustianam affecit.
 F A. Cui dubium esse hoc potest? C A.
 Marco fortasse dubium erit. F A. Nihil mo-
 ror eius iudiciū, præsertim quū suspectum
 sit. Sed tenēsne memoria quid piā ex ea ora-
 tione? C A. Duas periodos primas me posse
 recitare arbitror. F. Recita. C. *N V N Q V A M*
 ego putavi, iudices, quū vel fortissimus vir
 ciuitatis C. Piso legem de ambitu ferret,
 vel M. Tullius restituendam curaret sum-
 ma contentione, ludibrio læsum iri digni-

tatē populi Romani. quæ si vel ijs tam chara esset quàm solent prædicare qui primo quoque verbo Patres patriæ, custodes libertatis, cōseruatores fortunarum nostrarum appellari volunt, nunquam profectò L. Murena consul nisi saluis legibus renūtiatus ac defensus fuisset. F A. Estne in tua bibliotheca illa oratio? C A. Est certè, cum alijs eiusdem scriptis excusa. nam & alias quasdam orationes reliquit, & quatuor libros epistolarum: necnon de animorum immortalitate libros tres carmine hexametro. F A. Eum cras ad me mittas velim. C A. Mittam. F A. Nunc autem ad secundā rem venito, in qua iudicio caruisse Nizolium, quum Observationes suas scriberet, dicis. C A. Magis laboro ne quampiam earum omittam (quoniam Nizoliano Marco gratificari cupio) quàm vt certum ordinem teneam. Sed antequam ad secundam veniam, duò ad primam pertinentia adiciā. F A. Quæ sunt ea? C A. Vnū est id de quo antea diu multumq; sum cōquestus, quòd non contentus vocabula multa ex aliorū quàm Ciceronis epistolis afferre, & cum Ciceronianis confundere, etiam quæ sunt ex carminibus veterum poetarum, quia Cicerone passim citantur, illis permiscuit: neque interim de hac farragine lectorem

commonefecit. nisi fortè in illa Italica editione aliqua est hac de re admonitio quæ me latuerit. F A. Alterum autem quod est? C A. Quòd inter illa quæ ab ipso Cicerone vel *ποινικῶς* (vt in Arateorū *phænomenon* interpretatione, & in alijs quibusdam versibus, vel *ῥηαικῶς* (vt in libris De legibus) dicta sunt, & inter cætera eius verba & loquēdi genera nullum discrimen ponit. F A. Horum vtrunque ad eam rem quam proposuisti primam, pertinere & ipse existimo. Ad secundam transi. C A. Secunda res ob quam meritò quilibet iudicium in Nizolio desideret, est locorum falsā citatio, vt ita loquar. Hoc autem quum dico, non intelligo, locū ab eo vnum pro alio citari (quod & ipsum tamen verè à me dici posset) sed afferri aliud verbum quàm quod apud Ciceronem. legatur: quanuis testimonio eius quem affert loci vsum illius verbi quod proponit, velit confirmare. Ex ijs autem quædam ab Henrico Stephano enumerari scio in dialogo quem inscripsit *Pseudociceronem*. ea autem sunt, *Capitulum*, *Facetosus*, *Multissimi*, & quædā alia. sed illum multo plura quàm attulerit, afferre potuisse dicò, si plus temporis euoluendo Nizolij operi impendere voluisset. ea saltē quæ antea cōmemorauī addere potuisset,

O.ij.

Maleficiosus, *Cohærens*, *AEquilibralitas*, & reliqua. MAR. Quid? an etiam ipsa exemplaria Nizolium præstare oportet? eiusne culpa factum est quòd in deprauatos libros inciderit? C A. Hoc ego nequaquam dixerim: non adeò sum iniquus iudex: sed si non defuisset Nizolio iudicium, non defutura illi fuisse meliora quàm quibus vsus est exemplaria dico, quod ad quosdam saltem locos attinet. F A. Video paratum esse Marcum hanc de exemplaribus altercationem persequi: sed tu eius verbis aures occlude, & quæ sit tertia res ob quam iudicium in Nizolio, id est in Nizolij Observationibus, desiderare debeamus, expone. C A. Non vna certè res superest, sed plures. primum enim in eo reprehensione est dignus quòd Ciceronis locos qui eiusdè quidem vocabuli vsus, sed in diuersis significationibus, ostendunt, permisceat. Deinde (qua in re multo periculosius ab eo erratur) quòd pro synonymis ponit quæ tantum abest vt synonyma dici possint, vt etià valde diuersam significationem habeant (cuius erroris plurima exempla protuli) interdum verò vicissim pro contrarijs quæ contrariam significationem non habent. Postremò, quòd multæ expositiones planè esse falsæ (& harum quoq; non pauca exempla vidimus) nonnullæ sermone parum La-

tino, nedum Ciceroniano, alicubi Ciceroniano quidem, sed planè alium in sensum detorto, scriptæ comperiuntur. nam & de hoc quëror in Obseruationibus Nizolij, quòd plerunquë dum metuit ne à Cicero-
 nie discedat, & non aliter quàm Ciceronia-
 nè vult loqui, ineptè Ciceronis verba vsur-
 pat, in alium omnino sensum (vt dixi) de-
 torquens. veluti quum in earum principio
 (optimè memor scilicet illius prouerbij
 aut saltem præcepti Pindarici, ἀρχαῖος οὐ
 ἔργου παρὸν παρὶ χεὶρ διὰ πλεονείας) *effata* vo-
 cat quæ vulgò Loquendi genera, aut Lo-
 quendi formas, vel Sermonis formas aut
 formulas appellamus. Postquam enim ista
 attulit, *Ab aliquo facere, Cum aliquo facere:*
Ab aliquo stare, Cum aliquo stare: *Ab aliquo*
esse, Pro aliquo esse: *Ab aliquo dicere:* addit,
Hæc atque alia si qua sunt huius generis effata,
hanc habent vim ac sententiam ut si diceret Ad-
iuuare & defendere aliquem, uel Causam ali-
cuius defensionemque confirmare. F A. Ineptis-
 simè profectò & valde ridiculè vocì *Effata*
 vsum illum tribuit. C A. Illam autem expo-
 sitionem, *Causam alicuius defensionemq; con-*
firmare, qualem esse dicis? F A. Quo eam
 nomine aptius & verius appellare possim
 quàm si dicam esse verè Nizolianā? M A R.
 Proh, quàm seuerè in Nizolium pergis in-
 Q. iij.

quirere, Camille, vt te non immeritò iudicium in illo desiderare ostendas. Ego verò ad illud tantum nunc respondebo, quòd dixisti Nizolium non contentum vocabula multa ex aliorum quàm Ciceronis epistolis afferre, & cum Ciceronianis confundere, etiam quæ sunt ex carminibus veterum poetarum, qui à Cicerone passim citantur, illis permiscuisse: neque tamen lectorem de hac farragine (ita enim ipse valde odioso nomine appellas) admonuisse. Ego enim illum, in illa editione Italica, statim initio Indicis seu explanationis notarum siue verborum quorundam amputatorum, quibus singula Ciceronis opera in illis Observationibus citantur, dico præmonuisse, has notas, *Ci. Ep.* significare, *Cicero in Epistolis, quæ familiares vocantur*; & addidisse, ex quo volumine nonnunquam etiam citantur epistolæ infra scriptorum autorum, Bithynici, D. Bruti, A. Cæcinnæ, Calsij, Catonis: aliorumque nomina his subiunxisse. De poeticis autem vocabulis quæ inseruisset, quum facile internosci possent, quid mouere opus erat? c. A. Hæc de variis variorum epistolis illum fronti suarum Observationum præfixisse, nec tibi nunc nego, nec certè antea negaui, vt opinor: sed an putauit lectores suos fore OEdi-

pos? ita vt in singulis vocabulis aut loquē-
 di generibus quæ horum cuiuspiam peculia-
 ria essent, ea non Ciceronis sed huius vel
 illius esse, coniectura vel potius diuinatio-
 ne assequi possent? Ad ea autem vocabula
 quod attinet quæ ex veterum poetarū aut
 etiam ipsius Ciceronis carminibus sumpta
 sunt, nonne lector, vt ab ijs sibi caueret, ad-
 monendus, si non singulis in locis, saltem
 semel & simul, sicut de illis varijs variorum
 epistolis, fuerat? Sed hoc itidem à Nizolio
 factū fuisse fingamus: an cuiusuis lectoris
 esse putas poetica internoscere, & ab ijs
 sibi cauere? Cuiusuis fuerit fortassis qui a-
 pud Nizolium *Induperator*, ex Cicerone
 De diuinatione leget, animaduertere hanc
 epenthesein esse poeticam: quotusquisque
 autem alia quamplurima, quæ tamē nō mī-
 nus sunt poetica, internoscere poterit? nūc
 enim de lectore discipulo Nizolij loquor:
 eūque à Nizolio immerentem vapulatu-
 rum fuisse dico, quòd verbis alioqui poeti-
 cis locum in sua oratione soluta dedisset.

F A. Sed quid si plus quàm seipsū iudicio
 valere, plus quàm semetipsum sapere di-
 scipulos suos voluit Nizolius? C A. Quàm
 iniquum esset hoc à discipulis postulare vt
 plus ipso magistro saperent. F A. Quid? nō
 meministi versus Græci? Non dubito certè

quin memineris iam pridem prouerbio iactatum esse,

Πολλοὶ μαθηταὶ κρείττονες διδασκάλων.

quò alluisse puto Iuvenalem, quum dixit,

—meliozem praeſto magiſtro Diſcipulum.

C. A. Illi⁹ Græci prouerbij recordor, à Cicerone uſurpati: ſed ego τῶν ἡγεμόνων διδασκάλων, nō autem τῶν ὄντων, & ſemper intellexi, & nunc quoque intelligo. F. A. At ego in ijs quæ ad Nizolium & totā Nizolianam nationē pertinent, omnia ſe aliter quàm apud cæteros mortales habere puto: adeo ut quod de alijs incredibile mihi eſſet, utpote prepoſterum, de Nizolio & quibuſdā Nizolij diſcipulis credibile futurum ſit,

Πολλοὶ μαθηταὶ κρείττονες διδασκάλου,

& quidem τοῦ ὄντος διδασκάλου. Sed quum Nizolianus noſter Marcus, & Nizolij defenſor acerrimus, ſe tandem hinc proripuerit, vel (ut Plautus loquitur) ſe nobis ſurriperit, ne cum laruiſ, aut tanquam laruæ cum mortuo luctari dicamur, huic ſermoni finem imponamus. C. A. Id me lubente fiet, ut eundem comicum loqui memini.

F I N I S.

